

EKALESIA FAAPOTOPOTOGA KERISIANO SAMOA
CONGREGATIONAL CHRISTIAN CHURCH SAMOA

TUSI A'OGA MO AUTALAVOU
TEXTBOOK FOR THE YOUTH

2024



MATAGALUEGA O A'OA'OGA KERISIANO
DEPARTMENT OF CHRISTIAN EDUCATION

EKALESIA FAAPOTOPOTOGA KERISIANO SAMOA
CONGREGATIONAL CHRISTIAN CHURCH SAMOA

TUSI A'OGA MO AUTALAVOU
TEXTBOOK FOR THE YOUTH

2024



MATAGALUEGA O A'OA'OGA KERISIANO
DEPARTMENT OF CHRISTIAN EDUCATION

UPU TOMUA

E mua'i faatalofa ma faafeiloai atu i le paia tele o le Ekalesia Faapotopotoga Kerisiano Samoa i ona tulaga faalupeina, i le Suafa pele o Iesu Keriso lo tatou Taitai Sili. Ua faamalo le soifua manuia ia outou susuga i Toeaina, susuga i Faafeagaiga, Faifeau, A'oa'o ma Faletua, tainane foi afioga i Tiakono, susuga i alii ma tamaitai Faiaoga o tatou Aoga Aso Sa, faapea foi peresetene ma taitai o tatou Autalavou. Ia viia lo tatou Alii, i la outou molimau atu, o fita i tuga ai mo le Alii ma le Tala Lelei, e ala atu i mataupu a le Aoga Aso Sa ma Autalavou.

Ua tatou talitonu, o le Tusi Paia o le Upu a le Atua mo tagata uma, ma ua i ai i totonu vaega uma ua tatou naunau ia iloa, ina ia tumau mausali pea lo tatou sootaga lelei ma le Atua, ma ia tatou ola ai i le ala tatau e tusa ma lona finagalo. O le mea lea ua tatou talitonu ai, i le matuā taua o le a'oa'oina tatau o fanau laiti ma talavou mai le Tusi Paia. E ao ina a'oa'oina atu ma le faautauta lelei, le uiga moni o vaega o le Tusi Paia ua fia a'oa'oina atu, i se auala talafeagai e tusa ma le matutua ua i ai tamaiti.

1. O le Tusi o Aoga Aso Sa ma Autalavou, ua saunia lava faapitoa mo Aoga Aso Sa ma Autalavou a le Ekalesia Faapotopotoga Kerisiano Samoa. O lona uiga o le meatotino lava a le EFKS, e le faatagaina faaletulafono ona toe lomina e se tasi, e aunoa ma le faatagaga a le Ekalesia. O lea e fautuaina ai foi le Aufaigaluega, o faiaoga o Aoga Aso Sa ma Taitai o Autalavou, i le taua o le teu faalelei pea o Tusi Aoga, e toe saili i ai mo se fesoasoani pe a moomia.

2. O Mataupu o Tusi Aoga Aso Sa ma Autalavou 2023, ua maua lea i le upega Tafailagi (website) a le EFKS; www.cccs.org.ws. Faamolemole ia fesootea mai lo tatou Ofisa i Mulinu mo se fesoasoani, ma nisi vaega e fia malamalama i ai, i le telefono 24340, po o le e-meli-extneduc@cccs.org.ws.
3. Ua lē o toe fa'aalia i le faasologa o Mataupu i Aso Sa taitasi, vaega masani o le a'oa'oina o mataupu, e pei o le Tatalo Amata, Faafeiloai le vasega, faamanatu mataupu talu ai, tatalo e faapaia ai le sene ma le Tatalo Faaiu. Peitai o vaega masani nei e tatau lava ona fai i Mataupu o Aso Sa taitasi.
4. Mo le silafia e Tamā o le Ekalesia ma le aufaigaluega faifeau, e i ai le taimi e toe saili mai ai e lo outou mamalu le ofisa o le MAK, mo nisi Tusi Aoga. Peitai, ua māua e le ofisa nei, o nisi tagata, e lē o ni tagata lotu iā tatou, auā latou te leiloa le suafa o lana faifeau. O lea e tatalo atu ai, o le a lē toe taliaina ni tagata faapea e omai i ni Tusi, sei vagana faafeagaiga ma ē omai ma se faamaoniga mai lana faifeau. E lē mafai foi ona faamatuu atu ni Tusi Aoga i nisi o la matou aufaigaluega e aunoa ma se faamaoniga mai le faifeau.
5. Afai ua i ai se lape i le galuega nei, e matua atu i la outou tofā faale-Atua e magalo ai le aufaigaluega vaivai. Pe afai foi e i ai ni fautuaga taua mo le faaleleia atili o le galuega, faamolemole fesootea'i mai lo tatou Ofisa i tuatasi o i luga, pe lafo mai i le Pusa meli 163, Apia.

6. Ua saunia le Tusi Aoga mo le Autalavou Matutua e le susuga Luulau Taulagi FS, Lavea'i Fonomaalii AM, Ioane Samuelu AM ma Paie T Legalo AM

Ia faamanuia le Atua i le galuega o lenei tausaga, auā le a'oa'oina o alo ma fanau a le Ekalesia, ina ia tutupu a'e ma le fiafia e faitau le Tusi Paia ma ola matata'u i le Atua.

Soifua ma ia manuia
O la outou auauna

Malieifua Tanielu
(Faatonu A'oa'oga Kerisiano)

FAASOLOGA O MATAUPU MO ASO SA TAITASI 2024

IANUARI

28 O le soifua tautua o Tupulaga Talavou o le EFKS
(Aso Sa Tupulaga) 2 Timoteo 2: 1 – 13

FEPUARI

04 Ia e faamalosi, ma ia e loto tele Teuteronome 31: 7 – 8
11 Ia lava taoso le malaga Ioane 6:5-13
18 O le tautua ‘aitaumalele 2 Korinito 9:1-15
25 ‘Ai i le matagi Failauga 2:1-11

MATI

03 Faatuatua faamaoni Eperu 11:1 – 11
10 O le sa’olotoga o le filifiliga Salamo 1: 1 – 6
17 Aua le popole Numera 22: 1 – 14
24 Faasinomaga o le tagata ma lona
(Aso Sa o le Laupama) Luka 2_ 41 – 52
31 E le o le malosi Roma 6: 1 - 14
(Aso Sa o le Toetu)

APERILA

07 Tofi e le pala 1 Peteru 1: 3 – 9
14 Ia fai lou talavou ma ma’aola 1 Peteru 2: 4 – 9
21 Teuga’oa e le pala 1 Peteru 3: 1 – 6
28 O le talavou usita’i, e ofu i le loto maualalo
1 Peteru 5: 5 – 7

ME

05 Tautua Tuavae Ioane 13: 3 – 11
12 Toreka Galuega 9: 36 – 43
(Aso Sa o Tinā)
19 Malologa o le Fono Tele
26 E itiiti a lega mea Luka 19: 1- 10

IUNI

02 O mea lelei uma, e mai le Atua Iakopo 1: 16 – 18
09 O le tagata e ‘ana’ana i le Upu Iakopo 1: 22 – 25
16 Fa’ailoga tagata Iakopo 2: 1 – 7
23 Mamanu o le Faatuatua Iakopo 2: 14 – 26
30 Leaga o le laulaufaiva Iakopo 3: 1 – 12

IULAI

07 O Iesu ma le tulafono Mataio 5: 17 – 20
14 O le oa natia Mataio 5: 25 – 33
21 Faalogo a le tagata poto Mataio 7: 24 – 29
28 O Iesu ma agaga leaga Mataio 8: 28 – 34

AOKUSO

04 O le leleiga 1 Korinito 1: 10 – 17
11 Talavou mo le Atua Failauga 11: 7 – 10
(Aso Sa o Tamā)
18 O lou taimi lenei 1 Timoteo 4: 11 – 16
25 E lavea’i mai le Atua Salamo 13

TUSI AUTALAVOU 2024

ASO SA: 28 IANUARI 2024 (Aso Sa o Tupulaga)

MATĀ'UPU: O LE SOIFUA TAUTUA O
TUPULAGA TALAVOU O LE EFKS

TUSI FAITAU: 2 Timoteo 2: 1 – 13

FESOASOANI MO LE TA'ITA'I:

Si'osi'omaga o le Tusi Faitau

Manino i le molimau a le Feagaiga Fou, le fa'aaogaina o Timoteo i le galuega tala'i o le Atua. Mai lava i lona talavou – i le taimi sa o ai ma Paulo i ana malaga fa'amisionare. Fa'a-so'o i lona matua – i le avea ma ta'ita'i o ekalesia i nu'u ese'ese o Asia. Atonu o lona fa'asinomaga (o lona Tina o le Kerisiano Iutaia, a o lona Tama o le Eleni) na fa'apea ai Paulo e aoga tele le tama lea, ae maise ai ona o fa'afitauli sa tulai mai i le lotoifale o le ekalesia i le va o Kerisiano Iutaia ma Kerisiano o nu'u ese. Tatou te iloa foi i le fa'afetai a Paulo (2 Tim. 1:5) sa fofoaia le soifua fa'aleagaga o Timoteo e lona Tina, ma le tina o lona tina mai lava i lona la'itiiti. Peita'i, e le'i fa'apea na solo lelei i taimi uma le soifua auaina a Timoteo. E tele foi faigata, fe'ese'ese'iga ma lu'itau sa feagai ma ia i totonu o le galuega. A o se vaitaimi faigata foi i le Aposetolo o Paulo ina ua ia lagonaina ua latalata mai le oti. Manino lava le fa'amoemoe o Paulo i ana tusi mo Timoteo, o le faufautua ma fa'amalosi'au i lona atalii pele. A o le vaega lēnei o le tusi (2 Tim. 2:1-13), e fa'apea o le tualuga lea o apoapoa'iga fa'apitoa a Paulo mo Timoteo ma lona soifua 'au'auna.
2 Timoteo 2:1-13

E pei e lima manatu autu o lo o fa'asoa i ai Paulo i le fuaitau. O lo o fa'apupula mai ai se va'aiga atoa o le soifua fa'aleagaga o le Kerisiano.

1. O le malosi mai le alofa tunoa (f. 1)

O le ogatotonugalemu o lenei fuaiupu, o le “alofa tunoa o lo o ia Keriso Iesu.” Ua silasila lelei e Paulo, e lē faigofie le galuega o lo o feagai ma lona “atalii.” O le ala lea o lona fautua ia Timoteo, ina ia fa'avae ma fa'atupu lona malosi i le alofa tunoa o ia Iesu. O le uiga o le “fa'amalosi,” e lē tasi se taimi e fa'atupuina ai, ae ia fa'aaauu pea. O le malosi lea o le alofa tunoa e le tāgatasi pe manofonofa (static or stagnant), ae o le fa'atupu malosi e gaoioi (active) i totonu o le tagata Kerisiano. O lona uiga, o le galuega o le Atua e le fa'atinoina i se malosi fa'aletagata ae fa'alagolago atoatoa i le alofa tunoa o lo o ia Iesu, e fa'atupuina ai lo latou malosi.

2. Fa'asoaina o le Tala Lelei (f. 2)

O le fa'atonuga lea a Paulo o lo o atagia ai se tasi foi o vaega tāua o le olaga fa'asoo (discipleship) – o le tu'ufa'asolo lea o le Tala Lelei i isi augātupulaga mulimuli mai. Tāua foi lea vaega i le galuega tala'i, ina ia tupu pea ma ola le mau, aemaise foi o le maua o ni agaga se tele mo le Atua ma Lona malo. O le talitonuga a Paulo, e fa'apena le galuega fa'alelotu. E pei ona mulimulita'i Timoteo ia Paulo ma ia mātau le faiga o le galuega a le Atua, o lea ua oo mai i lona taimi ua fai mai Paulo, ina ia saili i nisi e mulimuli ia te ia ma fa'aaauuina le galuega a le Atua. O le so'otaga fa'ale'aiga o le Atua lea e tapu'e ma fa'afaileleina e i latou e mulimuli mai.

3. O le tigaina mo le Tala Lelei (f.3-7)

O le “onosai” o lo o fa'aaogaina e Paulo, e uiga tutusa ma le fa'asoa (share) lea foi o i le (1:8). O lona uiga, e ao lava ona onosai fa'atasi ma le isi o ou uso-a-Kerisiano i mea e tiga ai. E pei ona fa'aaoga e Paulo o ata fa'atusa (metaphors) e uiga i le tagata tau, ma nisi ata e pei o le tagata taaalo, ma tagata fai fa'atoaga e

fa'amatalaina le soifua atoatoa fa'a-le-fa-atuatua o le Kerisiano i le tino, mafaufau, fa-apea le agaga. O le soifua tautua lea i le Tala Lelei o lo o finagalo ai Paulo, tusa lava po o a ni fa-afitauli e fetaia'i ma oe, finau pea auā o i le Atua le manuia i le lumanai. Ma o le auala tonu lea o lo o finau ai Paulo e mafai ona onosaia fa'atasi tiga uma e feagai ma le Kerisiano.

4. Fa'atutua i le Tala Lelei (f. 8-10)

O le manu lauti lea o le galuega talai a Paulo: Ia 'aue ne'i galo le Tala Lelei ia Iesu Keriso. O le auga lava lea o le soifua o le Kerisiano. Mai lava i le amataga o le fuaitau a o folafola o itu uma o le savaliga fa'a-le-fa-atuatua. O le taualuga lea o ia mea uma, o le fa'aolataga e ala i le Alii Fa'aola ma le nofo fa'atasi ma Ia i le Ola Fa'avavau. O le fa'amausaliina lea o le galuega talai o le Atua, a o le fa'amoemoe, ina ia aua nei maua e le toatasi, a ia sao atu foi lou uso-a-tagata.

5. O le fa'amaoni o le fa'aolataga (f. 11-13)

Ua fa'ai'uina e Paulo le fuaitau, i le tu fa'afeagai o le fa'amaoni o le Atua ma le vaivai o le fa'atutua o tagata. E tauala mai lea i se pese, e amata la i le fa'amausaliina o le manu lauti o le Tala Lelei: o le e onosaia faigata, fa'atasi ma Keriso, e mautinoa ai lo latou pule fa'atasi ma Ia i le lumanai. Peitai, e le alo ese lea ma vaivaiga fa'a-le-tagata. Lea ua lapataia ai, mai le fa'afiti ia Iesu. Silafia lelei e Paulo le lē faigofie o le savaliga fa'a-le-fa-atuatua. E tele ma anoanoai faigata ma luitau e feagai ma le tagata, ma e tauau ina fa'avaiavaia ai le fa'atutua. Ma o le eseese lea o le fa'afiti ma le lē fa'amaoni. Auā e lē mafai lava ona lē fa'amaoni le Atua i ona tagata, o le tagata na Ia faia i lona lava fa'atusa. A o se fa'amafanafanaga tāua foi lea mo Timoteo, e fa'atumauina ai le ilo o lo o tumau lava le fa'amaoni o le Atua e fa'avavau.

GALUEGA FA'ATINO: SU'ESU'EINA O LE SOIFUA TAUTUA A TIMOTEO

Su'esu'e i tusi si'i o lo o lisi i lalo, ma fa'amatala mai le vaega o le soifua tautua a Timoteo.

1. Galuega 16:1-5
2. Galuega 17:14-15
3. Galuega 19:22; 20:4,
4. 1 Korinito 4:17
5. 1 Korinito 16:10-11
6. Filipi 2:19-24
7. 1 Tesalonia 3:2 & 6

O ni fesili e ta'ita'iina ai le su'esu'ega:

1. O le a se aoga o Timoteo i le galuega tala'i o le Atua?
2. O ai o lo o fa'atasi ma Timoteo, po o ai foi o fesoasoani ia Timoteo?
3. Pe lē o atagia manatu e lima o lo o fa'amatalina e Paulo i vaega ia o le Feagaiga Fou?

AOTELEGA:

Atonu o se fa'amanatu lea mo i tatou uma, aemaise tupulaga talavou a lo tatou Ekalesia. Le tāua o le soifua tautua o le tupulaga talavou i le galuega a le Atua, ae le gata i lea, o le ituaiga ola 'au'auna e ao ona mulumulita'i i ai. Manino i a'oa'oga a Paulo, o le soifuaga fa'a-Kerisiano e le alofia faigata ma luitau o le lalolagi. E ui ina eseese faigata sa feagai ma Paulo ma Timoteo, fa'apea o nai tua'ā ma tatou matua i lo latou lava vaitaimi, ma mea o lo o tutupu ia i tatou i lenei vaitau. A o lo o tumau pea lea fa'amaoni o lo tatou Atua.

O le upu moni, ua lē mafaitaulia le tele o fa'afitauli ua feagai ma tupulaga talavou. A o le fa'amalosia'au a Paulo, ia aua ne'i avea ia

tiga ma mea e fa'avaivai ai lou fa'atuatua. Ia fa'atupuina pea lou malosi i le alofa tunoa o lo o ia Iesu. Ia onosaia fa'atasi ma isi o ou uso-a-Kerisiano i mea uma e tigaina ai. Ua tatou iloa foi i ata fa'atusa na fa'aaoga e Paulo e uiga i le olaga fa'a-Kerisiano, e lē faigofie. E leai ma se ata o le tagata tau, tagata ta'a'alo, ma tagata fai fa'atoaga, na aumai e Paulo e foliga e faigofie. A o le fa'amamafa o le Aposetolo, ina ia le gata ina ia tapena atoatoa le soifua fa'aleagaga o le tagata, a ia fai fa'atasi ma isi o ona uso-a-Kerisiano. Tatou te fefa'asoa'i foi ma onosai fa'atasi i faigata ma fa'afitauli uma o le olaga nei.

O le aoga lena o le tatou mulimulita'i i nai o tatou matua ma tagata matutua. E pei o le mau o le atunuu, "e au le tauola, au le fagota." E pei o le tama e mulimuli i le matua ma maitau le faiga o le faiva; e pei o Timoteo na mulimuli ia Paulo ma maitau le faiga o le galuega. Ia fa'apena ona tatou mulimuli i nai o tou tua'a ma o tatou matua. O le fa'amoemoe ina ia oo mai le taimi e avea tatou ma taitai o le galuega a le Atua, a ua lava tapena atoatoa lou soifua fa'aleagaga e ala i lou soifau tautua i totonu o lo tatou Ekalesia. O le soifua tautau e mulimulita'i i le alafua ua fa'ataoto e Tama o le Ekalesia, susuga i Toeaina, Faifeau ma Faletua, fa'apea tagata matutua, ma o tatou matua o lo o tapu'eina ma aoaoina i tatou i ala o le Atua. O lou soifua tautua i totonu o le Ekalesia, e ala lea i lou tu ma lou savali, o lau tautala ma lau amio. O auala uma ia e mafai ai ona fa'amalosi ai lou uso-a-Kerisiano, aemaise mo isi augatupulaga fa'asolo mai. O le sini aoao o autalavou o le EFKS – *Ia ola ia Keriso* – ia maua le mafutaga ma Kerisio, ola ia Keriso e ala i a'oa'oga, mafutaga, tapuaiga, galuega, taaloga, fa'afiafiaga ma isi mea. A atagia la o ia mea uma i lou soifua tautua fa'a-le-autalavou, aisea la e lē tosina mai ai nisi i le olaga ia Keriso?

.....

ASO SA: 04 FEPUARI 2024

MATĀ'UPU: "IA E FA'AMALOSI, MA IA E LOTO TELE"

TUSI FAITAU: Teuteronome 31: 7 – 8

FESOASOANI MO LE TA'ITA'I:

Atonu ua tatou iloa, o Iosua, o se tasi lea o ta'ita'i fa'afitafita silisili ona maoae, sa malosi foi lona ola fa'aleagaga. E mafua ona maoae, ona sa fa'amaoni Isaraelu i le Atua i le taimi atoa a o ola Iosua. Peitai, o le a taoto ia lona avea ma ta'ita'i ae tatou vaai i le avea o Iosua ma soatau po o le fesoasoani ia Mose, aemaise le ala ua ia uia ua mafai ai ona avea o ia ma ta'ita'i o le nuu.

E muamua ona tatou vaai ia Iosua, ina ua maea ona ta e Mose le papa e feinu ai le nuu, i le o atu o Amaleka e tau ma Isaraelu i Refiti (Esoto 17:8-13). Peitai, e le o ta'ua mai po o ai Iosua. Fa'ato'a manino mai, i le (Esoto) mataupu 33, fuaiupu 11, lea o lo o fa'amatalaina; o Iosua, o le auauna a Mose, o le atalii o Nuno, a o le taulealea foi.

I le gasologa o le tala ia Isaraelu, mai le o ese i Aikupito seia oo atu i le fa'aiuga o Teuteronome, tatou te vaai ai i le suiga o le soifua auauna a Iosua. Mai i lona avea ma soatau ma fesoasoani ia Mose, i le taitaina o Isaraelu i le nuu folafolaina. Ua loa foi tausaga o fai Iosua ma soatau o Mose, mai lona taulealea (Esoto 33:11). Ma ua loa foi lona fa'atuatua, o se tasi o le au toa na asiiasi i Kanana, e na o ia foi ma Kalepo sa fa'atuatua e fesoasoani le Atua ia Isaraelu e fa'atoilalo Kanana i lona vaitau. Manino foi la le mafana o le mafutaga a Mose ma Iosua, aemaise foi le tele o le aoga i le tapenaina o ia e taitaia Isaraelu i le nuu folafolaina.

Teuteronome 31:7-8

Ua sauni atu Isaraelu e sopoia le Ioritana, ma ulufale atu i le nuu “sa tauto ai le Alii i o latou tamā na te foaiina atu ia te i latou.”

Peitai, ua le mafai e le toeaina o Mose ona latou o. A o upu fa’amalosi’au lenei a Mose mo le nuu, aemaise foi mo Iosua o le a taitaia i latou. E fa’aiva (9) ona fa’aaogaina le fuaiupu lea “IA E FA’AMALOSI, MA IA E LOTO TELE” i le tusi o Teuteronome ma le tusi o Iosua. A o lo o fa’asino uma i le sui tulaga o Mose e Iosua. O le fai atu foi o Mose i luma o le nuu atoa, o le fa’amausaliina lea o le tulaga a Iosua o le a ia savalia.

O le “fa’amalosi” e mafai ona faasino i le malosi fa’aletino, po o se malosi fa’afouina e manaomia e toe malosi ai se tasi mai i se gasegase o le tino. E tele ina fa’aaoga e fa’amalosi’au atu i se tasi, o lo o manaomia se malosi e fa’ataunuu ai se fa’amoemoe.

A o le “loto tele” o lo o fa’amatalaina ai se malosi o lo o taoto i totonu o se tagata, e fa’aalia i taimi e na te fetaia’i ma fita ma luitau o le olaga. Ona fa’atupuina ai logona o le filiga ma le fa’amaoni, fa’apea le naunau.

Ua iloa e Mose, e lē faigofie le galuega o le a feagai ma Iosua, aemaise foi Isaraelu ma lo latou faigamalaga. O le afuaga lea o le fa’amalosi’au atu o le toeaina, aemaise o le toe fa’aluaina i le fuai’upu 23. A o se fesili fa’atupu manatu pe a mafaufau i le malelega a Mose, pe mafua mai fea le malosi lea o lo o talanoa ai Mose?

Atonu e mafai ona fa’apea e tutupu mai i totonu o le tagata lava ia. Peitai, o lo o manino i le fai mai o Mose, “o le Alii lou Atua, lua te o fa’atasi ma ia” (f.6). E afua mai la i le Atua le malosi lea o lo o fai mai ai Mose. E pei ona fai mai le fuaiupu e 8, “o ia na te savali i ou luma; lua te faatasi ma ia, na te le tu’una oe, na te le lafoai ia te oe.” O le luitau sili sa feagai ma Iosua o le maua o le loto tele. Ae sa ia maua le malosi ma le loto tele ona sa ia iloa le fa’atasi o le Atua ma ia, sa ia fa’atuatua foi, o le a faia e le Atua mea uma na ia folafolaina mo Isaraelu.

GALUEGA FA’ATINO: SU’ESU’EINA O LE SOIFUA TAUTUA A IOSUA

Su’esu’e i tusi si’i o lo o lisi i lalo, ma fa’amatala mai le vaega o le soifua tautua a Iosua.

1. Esoto 17:8-13
2. Esoto 33:11
3. Numera 14:6-10
4. Numera 27:18-20
5. Iosua 1:1-5
6. Iosua 24:15

Fa’atalanoaina po o le a se vaaiga i le soifua tautua a Iosua o lo o atagia ma aoga i lo tatou vaitau. Aemaise i le olaga fa’a-le-fa’atuatua o tupulaga talavou i totonu a lo tatou ekalesia.

AOTELEGA:

O le va’aiga i le soifua tautua a Iosua, o se ata manino foi lea i le ola ‘au’auna e ao lava ona mulimulita’i ai i tatou. E pei ona tatou vaai ia Timoteo i le Feagaiga Fou i le vaiaso ua tuana’i atu, e fa’apena foi le tutupu ae o le soifua tautua a Iosua i le mulimuli i le Atua ma Mose.

Fai mai le mau o le atunuu, “e au le tauola, au le fagota” (Manaia ae saili se fa’asoa o le tino matutua o le autalavou i le fa’amatalga o le afuaga o le upu lea). Atonu o lo o fa’apena foi se ata o le soifua tautua a Iosua. O le soifua tautua i le Atua na amata lava i lona taulealea i lona mulimulita’i ia Mose. O le ata manino foi la lea mo i tatou tupulaga talavou, ia tatou mulimuli i e o lo o matutua o lo tatou autalavou, aemaise lava le afaigaluega tofofi o le Atua.

E lē faigofie, o lo o tatou i ai i le lalolagi o fita ma faigata. O fa’alavelave foi ma fa’afitauli e matua luitauina ai lava le fa’atuatua. Ae le gata i lea, a o le tele foi o suiga fou e mapuna a’e

mai lea vaitau ma lea vaitau. A oo ina fetuleni fa'atasi mai mea ia, ona lē iloa e le tagata ona fa'avasega. O ī e lagona ai le vaivai o le mafaufau, e lagona ai foi ma le lē mautonu, ona fa'afuase'i ai lea ona atuatuva le loto o le tagata, ma amata ai ona tatou fesiliga le moni ma le fa'amaoni o le fa'atasi mai ma le fesoasoani a le Atua. Ae atonu e aoga foi le fa'amalosi'au a le toaina o Mose i si ona atali'i o Iosua mo i tatou, "ia e fa'amalosi, ma ia e loto tele." Fa'alagolago i le Atua o Ia o le punavai o le ola ma le pogai o mea lelei uma. O le Atua o le vavau, o le Alii o lē na faia tulu'iga o le lalolagi, e lē vaivai o ia, e lē tigaina foi. Na te avatua le malosi i e ua vaivai, a o e ua leai se malosi, na te fa'atuputele i ai le malosi. O a lava mea e tutupu i le gasologa o le soifuaga ma le olaga, pe feagai ma puapuaga, pe fa'afesāga'i ma faigata, fai mai Mose, "ia e fa'amalosi, ma ia e loto tele." O le Atua lava tatou te maua le malosi e fa'atino ai le 'au'aunaga ma le tautua i lana galuega.

.....

ASO SA: 11 FEPUARI 2024

MATĀ'UPU: IA LAVA TAOSO LE MALAGA

TUSI FAITAU: Ioane 6: 5 – 13

FESOASOANI MO LE TA'ITA'I:

O le mea ua masani ai tatou, a alu se malaga, e ave se oso. O le fa'amoemoe o le oso, e fai mea alofa ai i e o fa'atali mai i le isi itu. [umu-fuauli & palusami, chips, koko, etc]. Ae i ai foi le isi oso, e ave i le malaga, e fa'aaoga e le au malaga i faigamalaga. O meaa, o meainu, e ave ma le fa'amoemoe, e fa'atupu ai le malosi, ina ia mafai ona fa'aaau le malaga, ma ia taunu'u manuia. E fua foi la le tele o le oso, i le mamao e alu ai le faigamalaga. A pu'upu'u le malaga, e la'ititi le aofai o mea'ai e ave. Ae a umi, e

fa'apena foi ona fuafua i ai le aofai o le oso e ave. A o le mea taua, ia lava! Ia lava le oso e ave.

O le tala i le tusi faitau, o le tala i se oso na ave i le malaga. E foliga la'ititi i le va'ai a le tagata, ae na matua lava ma totoe, e fafaga ai le motu o tagata e toatele. O le tusi lenei a Ioane, e ta'ua vavega na faia e Iesu, o Fa'ailoga. O le mafua'aga lena e fa'aigoa ai le tusi lenei, o le tusi o Faailoga. E 7 fa'ailoga na faia e Iesu: a o le lona 4 lea o fa'ailoga, lea na fagina ai e Iesu le motu o tagata.

O le motu o tagata na o e fa'aloglogo i a'oa'oga ma lauga a Iesu. Ua latalata ina po, a ua finagalo le Alii, e tataua ona aai, ua alu le aso. Fai mai ua tapa atu i ona soo, e avane ni meaa e fafaga ai tagata, ae fai mai le au soo, e lē lava ni areto e fafaga ai tagata ua toatele tele.

E na o Ioane e ese ai lana molimau mai le isi toatolu, i fuaiupu e 6 ma le fuaiupu e 9, "Ua fa'apea atu Iesu, o lana tofotofa ia te ia, aua ua silafia lava e ia le mea o le a na faia... O lo o iinei le tama o ia te ia areto karite e lima, ma nai i'a iti e lua lau...".

E i ai le taua, na mafua ai ona fa'aopoopo e Ioane fuaiupu ia e lua i lana tala. O le fuaiupu e 6, o lo o fa'atatau i le fesili a Iesu i le fuaiupu e 5. "O ifea tatou te fa'atauina mai ai ni areto, ina ia aai ai i latou nei?" Afai e fesili mai Iesu ia tatou i le fesili lava lea, o le mea muamua lava e oso mai i le mafaufau, o le faleoloa. Aua o lea ua fesili Iesu, po o fea e fa'atau ai ni areto. Ma o le tali foi lena a le au soo. Okomeki a na oso le mafaufau o le au so'o, e fa'atau mai areto. O lona uiga e o ese i se isi mea e saili mai ai ni areto. E lē maua iinei, ae o e saili i se isi nofoaga.

Le ala lea o le tulaga ese o le fuaiupu e 6, fai mai o le tofotofa a Iesu, aua ua silafia lava e ia le mea o le a na faia. O le a? O le a le mea o le a fai e Iesu? E faigofie ona tatou faapea, o le a fafaga e Iesu tagata. Ae fafaga i ni a? Leai se oso na aumai, le iloa po o fea e faatau ai ni areto, ae fai mai e fafaga?

O i, lea e oso fa'alava ai le tama. Fai mai o lo o iinei le tama, o ia te ia karite areto e lima, ma nai i'a iti e lua lau. Manatua foi, e leai

se tama i tala a isi au fai evagelia. Ae fai mai Ioane, o le tama na sau ma meaai ia. O le fesili, O ai lea tama? A o fea e sau ai? Afai e le iloa e le au soo le tama lea, o lona uiga o le tama na o mai ma Iesu. Aua o lea e sau le tama ma areto, ae fai mai le au soo e leai ni areto. O lona uiga, latou le le iloa le tama lea. Ae fai mai le fuaiupu e 9, “ua silafia e ia le mea o le a na ia faia.” O le sau a le tama lea, e le o se mea na oso faafuasei mai i le tala. Leai. O le oso e lima karite areto ma nai i’a iti e lua lau, o le tapenaga lona a Iesu mo le malaga. E lei iloa e le au soo ona e lei tau i ai se mafaufau o seisi. Le ala popole vale lona ma fememea’i. Ae a Iesu? “Fai i tagata e taoto.” O lona uiga o le a fai meaai. Aumai le oso na tapena e Iesu, sei taumamafa tagata ua fia aai. O le fagaina o tagata i le vao, na fagaina i le oso na tapena e Iesu. Silafia lelei e Iesu le mea o moomia e le tagata, tapena i ai lo tatou Alii.

GALUEGA FA’ATINO: *O le a sau oso o tapena mo lenei tausaga?*

A fua i le fesili o lo o i luga, ia taitasi ma faasoa i le autalavou po o le a so latou oso o lo o fuafuaina mo le malaga o lenei tausaga. A tuu i se itu faafaigofie, o a ni faamoemoe lelei (goals) o lo o galue ai le tagata i lenei tausaga?

AOTELEGA:

O la tatou faigamalaga i lenei tausaga, lea ua faatoa 6 aso Sa. 46 aso Sa ia e totoe. E umi. E moomia le vaai lelei o se ta oso e ave. Ua faia e Iesu le faataitaiga mo tatou, ia ola tapenapena. Vaai se oso o le malaga.

O le tapenaga a Iesu, na i ai le mea lilo na misi i le vaai a le au soo. Manatua foi le oso, e na o le lua i’a iti. E le masani ai le tusitala o Ioane ona faapea, aua o Ioane o se tusitala e fiafia i numera. E taua ia Ioane le numera 7, e mafua ai ona fitu faailoga i lana tusi. E taua foi le numera 3. E pei ona i ai i le amataga lava

o lana tusi, e faatolu lava ona ta’ua le Upu, “Sa i le amataga le Upu, sa i le Atua le Upu, o le Atua foi le Upu.” A o lea ua oo mai i le tala lea, ua na o le lua i’a. Lua lona, i le vaai a le tagata. Ae e i ai le talitonuga foi e le lua.

Silasila foi, o tagata o le ulua’i ekalesia, sa lamatia ma faasauaina. A fetau i nofoaga faitele, e faaeteete i latou. E le tautatala i le suafa o Iesu. Ae faaoga le ata o le i’a e fesootai ai. O lona uiga, o Iesu, e tolu i ai i’a o le oso.

Le i’a lona tolu lea na le iloa e le au soo, o lea lava na latou malaga mai ma le i’a i le latou malaga. Karite areto e lima, lua i’a iti, ma le i’a tele e tasi, ua lava ma totoe le oso mo le malaga. O le a le tali, e lei uma na ai meaai. Lava ma totoe, e faaauau ai le malaga.

Vaai ne’i ama la ta vaai i le i’a lapo’a o lo o tatou malaga faatasi. Le i’a lona na te faaatoatoaina a ta tapenaga, mo se oso lelei o le malaga. Le i’a lona e le toe tupu ai le misi i le ala, ae feofoofota’i ai tagata uma i le fealofani ma le fe’oe’oe a’i. Auā e misi loa i le ta vaai le i’a lea, tupu loa le mea na tupu i le au soo. Fememea’i, ma mananao e tutuli ese tagata.

.....

ASO SA: 18 FEPUARI 2024

MATĀ’UPU: O LE TAUTUA ‘AITAUMALELE

TUSI FAITAU: 2 Korinito 9: 1 – 15

FESOASOANI MO LE TA’ITA’I:

O le faauigaina faigofie o le tautua ‘aitaumalele – o le tautua mamao. O lona uiga, o le tautua e fai i se nofoaga e ese mai i lou faasinomaga. Faataitaiga, o le sau mai Savaii ae aumau i Upolu ma tautua atu ma saili manuia mo nai aiga, nuu ma alalafaga. Po o

le aumau foi i atunuu mamao e saili manuia mo nai o tatou aiga, nuu ma Ekalesia i Samoa.

Atonu e foliga faapea le galuega tele na feagai ma le Aposetolo o Paulo, o le 'aitaumalele i nuu ese, e saili manuia auā le atia'eina o le ekalesia, a o se fesoasoani foi mo le au-Kerisiano i Ierusalema.

I le tusi faitau, ua faamatalaina ai e Paulo le faatauaina o le soifua foi ma le mea e tatau ona fai. Ae e afua foi ona laga e Paulo lenei mataupu, ona ua faalotolotolua tagata lotu o le ekalesia i Korinito.

Ua tosina tagata lotu o le ekalesia i aoaoga sese a nisi, o lo o faapea e sili atu lo latou silafia ma lo latou mamalu i lo le Aposetolo. Ua latou faaleaogaina lava aoaoga a Paulo sa ia faavaeina ai le ekalesia i Korinito. Ma ua oo lava ina fesiligia ma faitioina Paulo i le faatinoina o ana galuega mo le Atua.

O se tasi lea o faafitauli sa tula'i mai i le va-feagai ai o nisi o tagata lotu i Korinito ma le Aposetolo. Ua o latou saili, pe o sa'o ea ma faamaoni le faatinoga e Paulo o lana galuega. Ua tupu a'e ai se masalosologa ma se manatu, ua faaoga e Paulo le Talalelei e su'e ai lona tamaoiga.

O le mafuaaga foi lea e tau mamafa ai upu ua faaoga e le tusitala. O le faaogaina e Paulo o le gagana faaviivii ma le gagana faifai e avatu ai le feau ma le faamanatu mo le au-Korinito. E faailoa atu ai, le lē sa'o o a latou faitioga i lo latou va feagai ai i le galuega a le Atua.

Lea e pei ona amata ai le mataupu e 9. Ua faaviivii e Paulo le au Kerisiano i Korinito, i le faamatalaina o lona mitamita ia i latou i le au Kerisiano i Maketonia. Fai mai, o lo latou maelega "na tupu ai le losilosu i le toatele." Ua avea le galuega a le au Kerisiano i Akaia (Korinito) ma auala e faamalosi'au ai i isi ekalesia o lo o tau atia'eina e Paulo. A ua faaogaina foi e Paulo le tali leleiina o Maketonia e toe lu'i ai tagata lotu o Korinito. E uma atu le faaviivii a Paulo, ae soso'o atu ai ma ana upu faifai i le ekalesia.

A o le faa'ete'etega a Paulo, "ina ne'i faaleaogaina," lona mitamita; "ina ne'i faamaina" i latou pe a o atu ma ni Maketonia. O se popolega moni sa i le Aposetolo, a o le naunauta'iga lava, ina ia maua e le au Kerisiano i Korinito le agaga o le loto foi. O le

faatauaina lava lea o le tapena mamao o le foi mo le Atua ina ia lelei.

O le mafuaaga lea o lana faamalosi'au ina ia mae'ae'a le tapenaga o a latou meaalofa. Ina ia uma ifo, o le foi ua faia o se meaalofa – foi ua faia ona o le alofa. E uiga tutusa le mea alofa ma le faamanuiaga, po o le faamanuia. O le faamanuia atu i se tasi e ala i se mea ua e foaiina atu. A o le foi foi e faia i le alofa. O lona uiga, o le meaalofa, o le foi ua faia i le alofa e manuia ai se isi. O le faatinoga foi o lea foi o le meaalofa, ua faia ona o le alofa i le Atua, ae le ona o ni mafuaaga faaletagata.

E pei ona faamatalaina i le fuaiupu e ono (6) ma le fitu (7), A o la'u lenei e fai atu, o le ua itiiti ana saito e lulu, e itiiti foi ana e selesese mai; a o le ua tele ana e lulu, e tele foi ana e selesese mai. Ia taitoatasi ma foi e pei ona filifili i lona loto; aua ma le tiga, aua foi ma le faatauanauna; aua e alofa le Atua i le ua foi ma le loto malie.

O le manu lauti lea o aoaoga a le Aposetolo i le au Kerisiano i Korinito. O le ala tonu e tatau ona faatino ai lo latou soifua foi. Manino, i le ta'ua mai e Paulo e i ai le tau i le foi, ae fua lava foi i le tele po o le itiiti o le foi. E tulimata'i foi le faatinoga o le foi a se tagata i le filifiliga a lona lava loto. O lona uiga, o le faatinoga o le foi o le meaalofa, e foi mai i totonu o le loto ua faatumulia i le alofa, mai i le loto ua le faatuaoia le alofa. E alofa atu ai i le isi uso-a-tagata, ae le o le loto tiga. Ae o le loto foi, e afua ai le naunau e faatino le foi fua. Le foi fua e le tau faatalitali ma fua i le vaaiga o mata ae afua mai i totonu o le loto. Loto lea e fia fai measili mo le Atua ina ia maualuga ai pea le viiga o le Atua.

A o le atoatoa o lea foi, e i ai ma lona tau i le foi mai e le Atua. O le a lea tau? O le lagona o le olioli e puna a'e i le loto ona o le galuega lelei ua faia, na faia lava mo le Alii. Manino lava i le tala a Paulo, e faafaula'i e le Atua ia te i latou o meaalofa uma. E saga faafaulai lava e le Atua le olioli o tatou loto i mea lelei uma ua tatou faia mo Ia. Le foi lea mai le Atua e toe faaopoopoina ai o nisi o galuega lelei e faatinoina. Manuia ia o lo o natia ai le

suamalie o le ola tautua e le afaina ai le feagai ma tiga ma faafitauli o le olaga, ina ua faasili le alofa i lona uso-a-tuaoi, aemaise le faasili o le Atua.

GALUEGA FA'ATINO: SAILIGA MA TALANOA

I le tusi faitau ma isi tusi ia: Kalatia 2:1-10 & Galuega 11:27-30, vaevae le autalavou ma fai se sailiga i fuaitau ia, pe faapefea ona atagia le tautua 'aitaumalele?

Faatalanoa foi i le autalavou, po o le a se aafiaga o le tautua mai i nofoaga mamao? O le uiga o le fesili, pe o i ai se faafitauli o lo o tutupu mai i aiga i le va o i latou o lo o nonofo i Samoa ma i latou o lo o 'aitaumalele i atunuu e mamao?

AOTELEGA:

O le faamatalaga o le faatinoga o le foai e pei ona fai atu Paulo ia Korinito, ua au mai ai foi se ata e ao ona tatou mulimulita'i i ai i le faatinoga foi o a tatou sailiga manuia i taimi uma, i soo se nofoaga. Po o le tatou saili i tuavae pe saili 'aitaumalele. O a tatou sailiga manuia, e amata i le Atua, e i'u foi i le Atua.

O lo o tatou i ai i le lalolagi o fitā ma faigatā, a'o luitau foi ia oloo feagai ma le au kerisiano, o le tofotofoina o le ola fa'atuatua i le Atua. Tatou saili manuia. Saili manuia mo o tatou aiga, o nu'u, o soo se fa'alapotopotoga, sili ai lo tatou saili manuia mo le tautuaina o Le Atua e ala i lana ekalesia.

E le o le manuia i le tele o tupe ma le tamaoaiga. Ae o le manuia o le olioli e puna a'e i le loto, ona o se taumafaiga vaivai, ua gata ai se mafai mo le Atua. Ae fa'afefea ona saili le manuia, lea o le olioli le loto? Saili ile faamaoni o le soifua tautua mo le Atua.

Le auaunaga e le faalogologotiga. E le faailoga tagata – e tutusa tagata uma. E mafua ai ona tatou foa'i o measili, fa'atino le ola foa'i ma le agalelei atu, ia i latou oloo mana'omia moni se fesoasoani. Le ola foa'i e le fa'atali ai sei augani atu so ta tuaoi mo sa ta fesoasoani, e tau le laeia ai le ma'aosofia, ae tula'i e

fesoasoani. Le foa'i e mai i totonu o le loto ua malie, o le foa'i e viia ai Le Atua..

Ua le na ma le laina, le tele o foa'i a le tele o fa'alapotopotoga ma sosaiete ua agiga ma fa'ailoa i luga o upega tafa'ilagi, o leitio ma televise, mo malo, o tagata ma i latou o lo o mana'omia nei fesoasoani. E aoga le fa'ailoa ina ia lu'itauina ai o tatou tagata, ia o tatou faia foi ma fa'aauau ia foa'i, e augatupulaga fai mai o si o tatou atunuu.

Ae aua lava nei faia nei foa'i ina ia iloa ai e le lalolagi ma viia ai o tatou tagata, ina nei le nanea ai le agaga o le foa'i mai i le loto malie, ma galo ai le viiga e fa'afo'i i le Atua. Tatou galulue pea, ma fai measili mo le galuega a Le Atua, aua e le fesiligia ona manuia. Manino lava le tala a le Aposetolo, i manuia e maua e le tagata ua foa'i ma le loto malie. E fa'amanuia mai i ai le Atua. E fa'afaula'i ai e Le Atua manuia ma meaalofo uma.

.....

ASO SA: 25 FEPUARI 2024

MATĀ'UPU: 'AI I LE MATAGI

TUSI FAITAU: Failauga 2: 1 – 11

FESOASOANI MO LE TA'ITA'I:

O se tasi nei o faaupuga e fa'aaoga e le tusitala e faaleo ai ona lagona faanoanoa pe a manatu i nisi o vaega o le soifuaga. O isi upu foi e masani ona faaaoga e le Failauga, o le upu "e faatauvaa mea uma" ma le isi, "e leai se mea e fou i lalo o le la."

O ai i le matagi po o le tulituli o le matagi i se isi faaliliuga, o se galuega e leai se uiga. E fiu e tulituli le agi o le matagi e le maua. E leai sona aoga, pei ona fai mai le Failauga, e faatauvaa lava.

A o le faatatau lea a le tusitala o lo o ave i galuega ua ia faia, o le fiafia ua ia oo i ai , ma le tamaoaiga ua ia maua – o ‘ai i le matagi, e peiseai o lo o tulituli le matagi – e leai se aoga.

Aisea? E le o manino le mafuaaga ua faapea ai le vaai a le tusitala. Pau le mea o lo o iloa, e fua lana faaiuga o ai i le matagi i mea ua ia “vaai i ai.” E le o fua i ni mea na faitau i se tusi po o ni aoaoga mai se isi. Ae ua afua mai lava i lona vaai ma lona olaga.

E maioio lava ma laualuga le manatu o lo o maioio i le Feagaiga Tuai, ae maise i aoaoga a Mose i le tusi o Teuteronomie; e manuia lava tagata amiotonu, ae malaia le tagata agasala. Ae i le “vaai” a le tusitala, e tele ona le ogatasi le futia ma le umele – e le fesootai mea ua aoaoina mai e Afioga Paia a le Atua, ma mea ua ia vaai i ai i le soifuaga.

Atonu o le Failauga o se tagata na manuia ona o le amiotonu, ina ua ia maua le tamaoaiga, ae i lana vaai, e leai se aoga – a fa’asolo le faitau i le fuaiupu e 18, ona manino lea o le mafuaaga ua ia manatu fa’atauvaa i galuega. Ona o le a manuia ai le mulimuli mai. E tigaina ia e galue, ae manuia ai le tagata mulimuli mai po o lona sulii e le’i galue ai.

O ‘ai i le matagi la ia mea. Atonu e fa’apea foi le soifuaga o lo o tatou feola ai, e fiu lava e fa’atino galuega lelei, ae uma ane, o lo o i ai foi i latou e le o faia galuega lelei ae o lo o manuia lava.

O le a le sa’o o lea mea?

O manatu lava a le Failauga, o fesili fa’atupu manatu e tatou te mafaufau foi i ai. Fai mai o ‘ai i le matagi, ae mafai ona tatou fa’apea, e a la pe afai o ‘ai i le matagi?

I le va’ai faa-Samoa, e le o se mea faatauvaa le ‘ai i le matagi – auā o le faaupuga o le tagata saili manuia, o le tagata e saili matagi.

E lē o se mea faatauvaa auā o le mea lea ua tatou ‘ae’ae ai nei i manuia, ona o le saili matagi o nai tua’a ma tatou matua. A o se alafua foi se saili matagai ai foi i tatou mo manuia o e mulimuli mai.

GALUEGA FA’ATINO: TALANOA – O LE A LE UIGA O LENEI OLAGA?

Fa’atalanoa le uiga o le ‘ai i le matagi e tusa ai ma le fa’amatalaina o le matā’upu, fa’atasi ai ma le fesili, o le a le uiga o le olaga, ae maise foi mo i tatou tagata EFKS, ma tagata Samoa?

AOTELEGA:

Ua sailiili le Failauga i le uiga moni o le olaga. Sa ia vaavaai i mea e fa’afiafiaina ma fa’amalieina ai le loto o le tagata. Sa ia faia galuega tetele, sa ia fa’atauina ana auauna ma lafu manu, sa faaputupu ana oa, sa fa’atau ana tagata pese, sa fa’aopoopo ana tamaoaiga, sa avea foi ia ma tagata silisili ona malosi ma taualoa. Peitai, e leai ma se tasi o nei mea na fa’amalieina ai lona loto. O sailiiliga ia a le Failauga na oo ai lana fa’ata’ita’i i mea lelei ma le aoga, atoa ma mea le lelei; ae e oo i mea lelei, sa avea mulimuli ane pei o ni mea na fa’amaumau ai le taimi o le Failauga, sa leai se aoga tumau. E ao ona tatou va’ava’ai i tua atu o galuega, i mafua’aga e ala ai ona fai galuega, ae maise o taunu’uga e maua mai ai. Po o lo tatou sini ea o le sa’ili o le uiga o le olaga, po o le saili o le Atua o Le e afua mai ai le uiga o le olaga?

Sa fausia e le Failauga fale e tele atoa ai ma le malumalu o le Atua, sa ia fa’avaeina ma fa’atumauiina le malo, sa ia fa’avaeina foi aiga. Ua tatou iloa sa fa’aumatia ma soloieseina nei mea uma. Fai mai foi le Salam 127:1 “Afai e le atiina ae e le Alii le fale, e galulue fua i latou o e atiina ae. Afai e leoleo e le Alii le aai, e mataala fua o le na te leoleoina.” Ua avea le tusi o Failauga ma se vaega o le molimau e uiga i taunu’uga o le aiga e fa’agalo le Atua. E ao ona tatou toe va’ava’ai i a tatou faufauga ma fa’amoemoega: e mai fea le naunau ua mafai ai ona tatou fa’avaeina ma fa’atino na mea uma? Afai e le mai le Atua, ua le aoga lava.

Ua fa’apea ona aotele e le Failauga ana sailiiliga fa’atatau i le uiga o le olaga, o le ‘ai i le matagi. Tatou te fa’alogoina le agi o le matagi, ae lē mafai ona tatou pueina pe taofia mai. Tatou te lagona

le fiafia i taimi tatou te ausia ai ni galuega, itiiti pe tetele; peitai, e le ni lagona e mafai ona fa'atumauina. Tatou te le maua le saoglemu, tatou te lē iloa fo'i le tāua o o tatou tagata (self worth) ona o mea tatou te faia, ae maua i le isi la'asaga i luga atu – o le alofa o le Atua. Tatou va'ava'ai i mea o tatou fa'atauaina i le olaga nei – o le taimi, o le malosi o le tupe. Fa'amata tatou te toe to manatu i tua i se aso, ona tatou fa'apea lea, o mea uma foi nei ua na o 'ai i le matagi?

.....

ASO SA: 03 MATI 2024

MATĀ'UPU: FA'ATUATUA FA'AMAONI

TUSI FAITAU: Eperu 11: 1 – 11

FESOASOANI MO LE TA'ITA'I:

O le fa'atuatua fa'amaoni i lona fa'auigaina lautele, o le talitonu o se tagata i le Atua ina ua taliaina le Atua e fai ma Atua i lona ola. Ua fusia i lea talitonuga le ola usitai ma fa'alogi i le Atua i mea uma, e ala i le musumusuga a le Agaga Paia, o aoaoga a le Tusi Paia, ma le ekalesia. O le mafuaaga lea ua fai ai le fa'atuatua ma malosiaga, e fa'avae ai le ola feso'ota'i o le tagata i le Atua, e ui ina le vaaia o Ia.

Ua talitonu le tagata, o lo o soifua le Atua ma o lo o sili ona latalata mai ia te ia ma alofaina o ia i lona alofa e fa'avavau. Ua fa'apea manatu o nisi, e le mafai e le tagata ona fa'atuatua na o ia i le Atua e aunoa ma le mana o le Atua e galuea'ina o ia. O le mafua'aga lea o le manatu, o le fa'atuatua, o le mea alofa a le Atua i le tagata agasala e ala i lona alofa tunoa. Ma le tali atu a le tagata i le papa'i mai o le Atua e ala i le salamo ma le fa'alologo i ona luma.

O le fa'amaoni, o le tumau o le loto ma le agaga i le fa'atuatua i le Atua ina ua atoatoa lona talitonu i le fa'amaoni ol e alofa o le Atua. O le mafua'aga lea e tāua ai le fa'amaoni ua fa'amatalaina ai le fa'atuatua i le autu o lo tatou matā'upu. O lona uiga, o le fa'amaoni o le fa'atuatua o le tagata i le Atua, e fa'alagolago tasi i ai le gasologa atoa o le ola fa'atino o le tagata nei e o'o i le fa'avavau.

A fa'amaoni le fa'atuatua o le tagata, ua fa'apea foi ona tumau i le Atua, ua fa'atuatua ma talitonu i ai. Peita'i, a leai se fa'amaoni, o le amataga foi lea o le solomuli o le ola talitonu, ma fa'atuatua i le Atua.

O le fa'afitāuli lea, o ulua'i Kerisiano Iutaia, na talia Iesu ma fa'atuatua ia te ia, ina ua amata ona mou le fa'amaoni o le fa'atuatua, ina ua tetele sauāiga ma faigatā na latou feagai, ona o le Suafa o Iesu.

Ua le mafai e lo latou fa'atuatua, ona tali tiga, o le sauāina, ma le oti fa'amāturo i le Suafa o Keriso, ona ua fa'alotolotolua, ma ola masalosalo, i le fa'amaoni o le alofa o le Atua. Maua i le fefe ma le pala'ai. O se vaega tele, o ia sauāga na latou feagai, e āfua mai i le lotu Iutaia, ma ona ta'ita'i. I latou na taulāmua i le fa'asatauroina o le Alii, ona o le leai, o se fa'amaoni, o lo latou fa'atuatua i lo latou Atua, e ala ia Iesu Keriso.

Ua fa'atauasoina i le matau'a ma le ita, ua le talia ai le ala ua asiasi mai ai lo latou Atua, e ala ia Keriso. O lo latou le talia o Iesu Keriso, ua tutusa ai lava, ma le ola sauā o Roma, i le fanau fa'atuatua a le Atua, o e na tauivi e fa'atumauina lo latou fa'atuatua, i le fa'amaoni e tatau ai.

O le talitonuga o le tusi tala, o le tusi i le 'au Eperu, na o le pau lea o le malosi, e mafai ai ona feagai le Ekalesia, ma tiga o sauāga, o le fa'atuatua fa'amaoni – i le Atua. O le uiga lea o le fa'amamafaina e le tusitala, o le fa'atuatua, i le mataupu e 11, "A o le fa'atuatua, o le fa'alagolago lea, i mea ua fa'amoemoe i ai, o le mautinoa lea, o mea e le o vaaia."

O le talitonuga o le tusitala, o le tagata fa'atuatua i le Atua, o le tagata lea, ua fa'alagolago ma le atoatoa, i mea uma ua

fa'amoemoe i ai. O le fesili – po o a ia mea uma, e ao ona fa'amoemoe i ai le tagata fa'atuatua? O le tali – o manuia ua uma ona folafolaina e le Atua, talu mai le amataga. O manuia ua fa'atatauina, mo lana fanau fa'atuatua. O le mautinoa lea, o mea, e le o va'aia. O manuia e le fa'atusaina i mea o le lalolagi nei.

O ia manuia, e talitonu le tusitala, o le tusi i le 'au Eperu, e fa'amāoaigaina ai, le tagata fa'atuatua fa'amaoni, i le Atua. Le tagata e talitonu, po o a fa'afitauli e fetai'a i ma ia, o lo o soifua le Atua. O lona uiga, o le fa'atuatua o le tagata Kerisiano, o le fa'atuatua mautinoa, e i ai le Atua i mea uma, o le ola taumafai o le tagata Kerisiano. O le fa'amaoni lea, o le Atua, e le tatau lava i se Kerisiano, ona fesiligia, pe masalosalo i ai.

Le mautinoa, e 'auai mai le Atua, i le tagata, e maua ai le loto tele, e feagai ai ma tiga ma fa'afitauli o le ola. O lona uiga, o le manuia o le fa'atuatua fa'amaoni, e amata atu i nei. E iloa ai, e le o se mata'utia o so tatou fa'atuatua, tatou te manuia ai, ae ona, o le alofa silisili ese, ma le amiotonu a le Atua, e ala ia Iesu Keriso.

O le mafua'aga lea, o le tōlauina e le tusitala, o tagata uma, na fa'atuatua i le Atua, i le tala fa'asolopito o Isaraelu. E fai ma fa'ata'ita'iga, mo tagata Kerisiano Iutaia. Tagata o le nuu, o le Atua, sa ola i le olaga. Tagata fa'atuatua, na taumafai e fa'atino le finagalo o le Atua, i le lalolagi. E pei o Apelu, Enoka, Noa, Aperaamo, ma Sara.

O le fa'atuatua na tutupu ai vavega ma mea ofo'ofogia, ona o le mautinoa, o lo o 'au le Atua ma i latou, i taimi uma. O le Atua o lo o muamua ma mulimuli, a o folau lona nu'u i matagivale o le olaga na latou feagai. O le mafua'aga lea o le talitonuga o le tusitala, o le fa'atuatua o le Kerisiano, o le fa'atuatua, e tatau ona mautinoa, i taimi uma o le ola.

Ona e amata atu i lalo nei, mo le tagata fa'atuatua, ona fa'atino le fa'atuatua lea, e na te maua ai le ola i lugā. O le fa'amaoni e tumau le fa'atuatua i le Atua, e tusa lava po o le oti. Po o le fa'atuatua lea o le Atua i lana amiotonu, na fa'aali i le talafa'asolopito o le nu'u, lea foi ua fa'aalia ia Iesu Keriso, ma o lo o fa'apea fo'i, ona fa'atumaui i le Ekalesia puapuagatia a

Keriso. E iloa ai, o le tagata fa'atuatua fa'amaoni, o le tagata e ola mata'u i le Atua.

GALUEGA FA'ATINO: TALANOA

Fa'atalanoaina po o a ni isi ata o le fa'atuatua e mafai ona maua e ese mai i tagata sa tolauluina e le mataupu 11 ma le 12. A o le a foi se aoga o ata ia mo le savaliga fa'a-le-fa'atuatua o tagata Kerisiano i nei ona po?

AOTELEGA:

Ia fa'amaoni lo tatou fa'atuatua i le Atua, i taimi uma, o lo tatou ola. E le mafai e se malosi, ona vaoia lo tatou a'afia ma afaina, i fa'afitauli e tele o le olaga. Tatou te tigaina ma mafatia ai, ma tauau ai ina solomuli le ola fa'atuatua i le Atua. Aemaise lava pe a oga'oga le papa'i mai o mafātiaga ia i tatou.

Peita'i, o le fa'atuatua fa'amaoni i le Atua, o lo tatou taliaina lava lea, o le Atua alofa, ma le amiotonu, e fa'avae ai o tatou olaga. O lo tatou fa'atuatua lava lea o le Atua, o ia o le Pule Aoao o mea uma lava. O le mafua'aga lea, e suamalie ai, i le Kerisiano, aso uma o lona ola, e tusa lava pe feagai ma tiga, e tumau pea lona fa'atuatua, i lona Atua, ma lona alofa tunoa.

O le mautinoa o le Atua, tusa lava pe le vaaia, ae o ia, ua fa'avae ai, le mautinoa o mea uma. O manuia ua folafolaina e le Atua mo i tatou uma. O manuia, e fa'avavau, o le ola i le Malo o le Atua, ua fa'amoemoe i ai, lana fanau fa'atuatua. A fesiligia e se Kerisiano mea e tutupu, i lona ola pe aisea, o le fesiligia lava lea o le Atua. Tusa lava, po o puapuaga, tatou te feagai mai i lea taimi i lea taimi, ia tumau pea le fa'amaoni e fa'atuatua i le Atua.

Le Atua, o lo o fa'amaoni pea lona alofa, i lana fanau, o i tatou uma, i taimi uma, e o'o i le fa'avavau.

.....

ASO SA: 10 MATI 2024

MATĀ'UPU: O LE SA'OLOTOGA O LE FILIFILIGA

TUSI FAITAU: Salamo 1:1 – 6

FESOASOANI MO LE TA'ITA'I:

Filifiliga: upu fa'avae – fili/filifili. Fili tupetoga – Filitagaga – Fili i le tai se agavaa. O lona uiga, ia saili le mea sili. “Your decision determines your destiny, be careful what you choose.” “O lou uiga e fa'alagolago i lau fa'aiuga, fa'aeteete i lau filifiliga.”

O lona uiga, o a tatou fa'aiuga e fai, e faia ina ua uma ona soalaupule itu uma o se mataupu. A o lei faia le fa'aiuga a le fa'amasinoga, e faia muamua ana suesuega. Fefulia'i fa'ala'au mamafa itu uma o le mataupu, seia oo ina fa'amalieina, ona faia loa lea o lana fa'aiuga. A tuu i se isi fa'aupuga, e vaai i mea ua uma ona tutupu, o a aafiaga i le lumanai, ona fa'atoa fai loa lea o lana fa'aiuga.

E amata le salamo i le tau fa'amatalaina o le olioli e maua mai le usitai i le Atua, ae maise o le alo ese mai e upu leaga ma fa'a'amu'amu. E tele ni uiga le manuia a o tatou uo tatou te ono pisia ai, e ui foi tatou te le matauina i le tele o taimi. Afai tatou te pipi'i i uo e le manatu mamafa i le finagalo o le Atua, e i'u ina tatou agasala ai pe a tatou fulitua ma ia. E le ese lava ma se tagata e faifai i le Atua. E fa'apea'i o tatou uo? O ni tagata e fesoasoani e fa'atupu lo tatou fa'atuatua, pe na ona soloia ai i lalo? O uo moni e fesoasoani e fa'atumau lo tatou va felata'i ma le Atua.

E le fa'amasinoina tatou e le Atua ona o so tatou tupua'iga (race), itu'aiga (sex), po o se fa'asinomaga fa'alemalo (nationality). E fa'amasinoina tatou i le tulaga o lo tatou fa'atuatua ma le auala tatou te tali atu ai i lona finagalo fa'aalia. E fa'amanuiaina le tagata e taumafai ma le naunau e fai le finagalo o le Atua. E avea latou ma tagata fiafia ma le maloloina, pei o ni la'au e fua tele mai

ma malolosi o latou a'a (Jeremia 17.5-8), e leoleo le Atua ia i latou, e ta'ita'iina foi latou e le atamai o le Atua. A o le tagata e le fa'amoemoe ma usitai i le Atua, e leai se uiga po o se 'ano o lona ola, e tafi'eseina fa'apei o le 'efu'efu.

E na o le 2 lava ala o le olaga – o le ala o le Atua e fa'avae i le usitai, ma le ala o le fouvale ma le malaia. Tatou filifili i le ala o le Atua, aua e fa'amoemoe lo tatou taunu'uga i le ala tatou te filifilia.

Tatou te maua le auala e mulimuli ai i le Atua pe a tatou a'oa'o ma mafaufau i lana Afioga Paia. E ao ona fa'aavanoa lo tatou taimi e faitau ma mafaufau ai i mea ua tatou faitauina. I le ma lea, e tataua ona tatou fesili ia i tatou lava, pe fa'apefea ona suia o tatou olaga, ina ia tatou ola ai e pei ona finagalo le Atua. O le iloa o le Atua ma le to'aga e faitau i lana Afioga Paia, o le la'asaga muamua lea i le apalaiina o lana Afioga Paia i o tatou ola faifaipea. Afai tatou te manana'o e mulimuli i le Atua ma le fa'amaoni, e ao ona tatou malamalama i mea ua ia fetalai mai ai.

O le 'tūlāfono a le Alii' e fa'asino lea i le Afioga Paia a le Atua - o tusi e 5 a Mose, o tusitusiga a le au perofeta, ma isi tusitusiga. O le si'itia o lo tatou malamalama i le upu o le Atua i lona aotelega, o le tele foi lona o tamaoiga ma sosia tatou te maua, e ta'ita'iina ai o tatou fa'aiuga fai i aso uma.

Afai tatou te fiafia e mafuta i le Atua, o le a sili atu ona fua mai mea lelei i o tatou ola (i o tatou tagata ma o tatou mea e fai). Ae afai e tata'iina tatou e tagata e inoino i le Atua, e fa'amativaina tatou, aua ua tatou motu mai le sosia o lo o fafagaina ai o tatou agaga. E tataua ona tatou feso'ota'i ma tagata e le fa'atuatua, tatou te molimau ai i le Atua mo latou; ae aua nei tatou auai pe fa'ata'ita'i i o latou amioga leaga, sei vagana ua tatou mananao e fa'amuta lo tatou fa'amoemoe mo le olaga. Ae afai o tatou sa'ilia le oliolisaga o le Atua, e moomia ona tatou mafuta atu i e alolofa i le Atua ma lana Afioga Paia.

'E manuia foi mea uma na te faia' – e le fa'apea o le a saoloto ai le tagata mai faigata ma toilalo. E le fa'apea foi o le a mautinoa lona maua o le soifua maloloina, po o le tamaoiga, po o le fiafia.

O le fa'auigaina e le Tusi Paia o le manuia e fa'apea: afai tatou te fa'aaogaina le atamai o le Atua, ona fua mai ai lea o fua lelei, e finagalo malie foi le Atua i a tatou taumafaiga. E pei lava ona mimiti e le laau le vai e fa'atupu ai fuala'au 'aina lelei ma le suamalie, e fa'apena foi ona tatou fa'aaogaina le Afioga Paia a le Atua, e fua mai ai amioga ma galuega lelei e viia ai le Atua. Afai tatou te manana'o e aoga o tatou ola, ia i ai le upu o le Atua i o tatou loto.

O le 'aputi' o le atigi lea e tataua ona fofu'e ese mai le fatu aoga o lo o i totonu. A le o le nunuti o le aputi i lima, e fa'aaoga le povi e solisoli ai; o le auala lea na fa'amatalatala ai fatu (threshing). A uma ona nunuti saito ona tuu lea i totonu o le ato ae lafo a'e i luga i le matagi; e mama lava le aputi, na o sina matagi itiiti lava e manaomia e fa'alelea ese ai, ae toe to'u'ulu ifo ai na o fatu mamafa i le ato (winnowing). O le aputi o le fa'ailoga lea o le olaga ua leai se fa'atuatua, a ua na ona lealea i le matagi, ua leai se mea mautu e aga'i ai. O le saito lelei o le fa'ailoga lea o le ola fa'amaoni ma le fua lelei, e mafai ona fa'aaoga e le Atua. E le o tatou o ni saito; o lona uiga, e ia i tatou le filifiliga po o le a le ala tatou te uia.

GALUEGA FA'ATINO: FINAUGA / DEBATE

O le fesili e avea ma ta'iala o le finauga: Po o i ai se saolotoga moni i le filifiliina e mulimuli i le Atua?

AOTELEGA:

O a mai lau faiga filifiliga i lenei vaitau? Ua tele mea o tutupu i lenei talutalufou, ua fesiligia ma ua lu'itauina ai lo tatou ola fa'a-le-fa'atuatua i le Atua ma lona alofa. Fai mai ua matitiiva tagata ona o le lotu. Ekalesia fai mea soo. A o mea ia ua solomuli ai isi, ua le toe lolotu ai isi, ma ua sui ai foi tapuaiga a isi. O tatou filifili ea e usiusita'i i le Atua?

Ia 'ana'ana i le Atua ma fai lona finagalo, ona tatou manuia lea. E lē se'i iloga o tupe ona iloa lea ua manuia. Leai. Ae fa'apefea lo tatou saogalemu i mea o tatou fea'i ai? Ae fa'apefea fua o a tatou galuega, e auala eseese mai ia i tatou? Ae a le tausiga o aiga; o mafai na tausi o tatou aiga? Afgai o mafai na fai uma na mau mea, o manuia na o a tatou filifiliga o fai.

Vaavaai foi i le au aposetolo, e leai ni manuia i la le tino na latou maua. E leai ma se isi na tele ni ana tupe. Ae na sauaina, na inosia, na fasiotia. O a manuia na latou maua? E moni e leai ni manuia i le tino, ae na matua taumasuasua o latou manuia i la le Agaga. Aisea? O le latou filifiliga.

Na filifili e usita'i. Na filifili e alofa. Tusa lava po o le a le tele mai o tala a tagata, na faatino lava le latou galuega, ona o le latou alofa i lo latou Alii, o Iesu. O se faamanatu taua foi lenei mo tatou uma i lenei taeao. Tatou faamaoni ia tatou filifiliga. Aua o lo tatou iuga, e faalagolago pe na faapefea ona faatino a tatou filifiliga. Na faamaoni pe leai? Vaai ifo lava le tagata ia ia te ia lava.

.....

ASO SA: 17 MATI 2024

MATĀ'UPU: AUA LE POPOLE

TUSI FAITAU: Numera 22: 1 – 14

FESOASOANI MO LE TA'ITA'I:

O le popole, o se lagona fa'a-le-natura o le tagata soifua. E fua i mea e vaaia, ma mea e mafaufau i ai. A vaaia atu pe mafaufau i se mea e ono lamatia ai le ola, ua oso le popole. E i ai itu lelei o le popole, e pei ona fa'alogoina soo i fesoasoani i a'oga lauga. E aoga le popole, e iloa ai le loto maualalo i luma o le Atua. A lata

foi i suega, ua oso le popole o isi. E popole foi matua pe a o ese atu le fanau e o i le aoga. Popole ia e le mafai ona vaoia.

Ae a ogaoga loa le popole, ona maua loa lea i le lē to'a, ua femēmēa'i; ua lē mautonu. Po ua mafai loa ona fa'apea i le upu ua fa'aperetania ai le autu, ua panic. Ua lē mautonu, po ua lē maua se tonu e fai. O le isi la'asaga lea i luga e oo i ai le popole pe a tele na'ua. Pe mafai foi ona fa'apea, ua atuatuvaile. Ua atu le loto i mea ua vaai atu i ai. Ua oo i lagona o le fefe, ma o isi e i'u lava ina fetagisi.

Mo le au kerisiano, pau le fofo o le popole ma le fefe po o le atuatuvaile, o le tatalo i le Atua, ma fa'amoemoe i ai e maua mai se tali e fa'anofu filemu ai le loto, ma tafi esea ai le popole.

O le tala i le tusi a Numera, o lo o atagia ai uiga ogaoga o le popole i le tupu o Palako ma tagata o lona nu'u o Moapi. Ua lē gata ai i le popole, a ua o'o i le atuatuvaile, ma ua matua fefefe lava. Le malaga a Isaraelu i le vao, lea ua to'a i le lau'ele'ele laugatasi o Moapi e fa'afesaga'i ma Kanana. Ua tuana'i le ala fita sa ui mai ai i le toafa, ua tuana'i atu faigata sa feagai ma feto'ai i le ala. A o lea ua mapu ane i le fanua laugatasi o Moapi. O la ua iloa atu Kanana i le isi itu o le vaitafe o le Ioritana.

Ae ona o le nuu o Isaraelu ina toatele, fa'atasi ai ma le 'a'ave mai o tala i le latou fa'atoilaloina o isi tupu ma mālō na latou tau mai i ai, ua avea ma mea ua tupu ai le atuatuvaile i le loto o Palako le tupu o Moapi ma le nuu atoa. Fai mai le tatou matua, "Ua iloa e Palako le atalii o Seporu mea uma na faia e Isaraelu i sa Amorī. Ona matua fefe lea o Moapi ona o le nuu, auā e toatele i latou; ua atuatuvaile foi Moapi ona o le fanauga a Isaraelu." Ua iloa, ona matua fefe ai lea, ma ua atuatuvaile. Uiga ia o le popole o lo o atagia i le tatou matua. O le popole ua o'oo'o i ona o'oo'oga. Ae aisea ua so'ona popole ai fa'apea Moapi?

Ao le a la se fofo o le popole o Palako ma le nu'u o Moapi? Ua manatu Palako ma le nuu o Moapi, pau lava le vai fofo o le latou popole, o le fa'atoilaloina o Isaraelu.

O le ala lea o le auina o avefeau ia Palaamo le atalii o Peoro. O le tagata vavalo, pe mafai foi ona fa'apea, o se perofeta. Ua sa'ili

fesoasoani i ai le tupu, auā ua fia maua se vai fofo o lona fefe, ma lona atuatuvaile. O le fe'au, ina ia sau Palaamo e fetu'u le nu'u lea ua laupae mai ona luma. O le 'āmiga foi o Pala'amo, ona ua i ai pine o lana galuega. Fai mai Palako, o lē e fa'amanuia i ai Pala'amo e manuia, a o lē e fetu'uina e Pala'amo e malaia. O lana lea fofo, aumai Pala'amo e fetu'u le nu'u lea, ona fo'ia lea o lona popole.

A tatou su'esu'e atili ia Palaamo, o se tagata na te iloa lelei le Atua o Isaraelu, ma e talanoa foi ma le Atua o Isaraelu, e pei ona i ai i le tatou faitauga. Ma atonu o le ala foi lea o le manuia o ana galuega, auā o lea e iloa lelei e Pala'amo le Atua. O le feiloa'iga foi a Pala'amo ma le sāvāli na alu atu, o lo o atagia ai le fa'alagolago o ana fa'aiuga i le finagalo o le Atua. Fa'afofoga foi, "Ia outou tofafā iinā i le po nei, ou te aumai ai se upu ia te outou e fetalai mai e le Alii ia te a'u." Fa'atali iina, sei ou sa'ili po o le a le finagalo o le Atua i le tou matā'upu.

Ua fa'ataatia e Pala'amo le alafua e tatau i soo se tagata ona mulimuli ai, pe a maua i le loto popole. O le a? Fesili i le Atua. Ae peitai, e i ai le itu lē lelei o le galuega a Palaamo. Auā o le i ai o le totogi fa'atulagaina po o le standard fee mo lana galuega, e iloa ai seiloga e totogi, ona fa'atoa fa'ailoa lea o le finagalo o le Atua. Ua fa'atau e Pala'amo le finagalo o le Atua i e o mo'omia le fesoasoani.

Lea ua fesili i le Atua, fai mai le Atua; 'aue e te alu, 'aue foi e te fetu'uina le nu'u, auā ua fa'amanuiaina i latou. Ua matuā lava ma totoe le tali lea a le Atua, e fa'anofu filemu ai le loto ma le mafaufau o Palako. O le fofo lea o lona fefe ma lona atuatuvaile. Auā o lea ua manino le mata o le vai, o le nu'u lea e fefe i ai ma atuatuvaile i ai lona loto, o le nu'u ua uma ona fa'amanuiaina e le Atua. E lē tatau ona toe fetu'uina e se isi. E lē tatau foi ona si'i taua i ai nisi.

Peita'i ua 'ese le fa'auupuina e Pala'amo o le tali ma le finagalo o le Atua. Fa'afofoga foi i lana tali na fai i toeaina i le taeao, "Inā maliu ia i lo outou nu'u, auā e le mafai i le Ali'i ona tu'u ia te a'u e o ma outou."

Atonu e fa'apea nisi, e leai se afaina o le tali a Palaamo. Peita'i a tatou toe vā'ili'iliina le tali lea, o lea ua mimilo e Pala'amo le tali a le Atua. Ua fa'aaoga e Pala'amo na o le vaega muamua o le tali ina ia 'aua nei alu, a ua le ta'uina le mafua'aga e lē tatau ai ona alu. Ua tuua'i i le Atua lona le alu. O le uiga o le manatu, e mafai ona toe fa'aupu le tali a Palaamo, "se ou te fia alu ma outou, a o lea e taofi a'u e le Atua."

Ma a fa'aaau le faitau i le tala, o le ala lē fa'amalieina lena o le loto o Palako, ma ua atili ai ona popole, auā na pau le mea o lo mana'o i ai, ia oo mai Palaamo e fetu'u le nu'u. Ae masalo ana iloa e Palako, le moni o le finagalo o le Atua, o le nu'u lea e fefe i ai, ua uma ona fa'amanuia ina, ailoga e toe naunau e fa'atoilalo Isaraelu? Se manū ua uma ai lona popole, ma uma ai lona fefe. Ae peitai, o le tali na ia maua, ua atili ai lona atuatuvalet, ma lona fememea'i.

GALUEGA FA'ATINO: TALANOA

Su'esu'e atili i ni isi tala o lo o atagia ai le popole, a o le a foi ni mea ua tatou popole ai i lenei vaitau? O a foi nisi fofo o le popole o lo o mafai ai na fa'afilemu tagata?

AOTELEGA:

'Aua le popole. Ae fa'ato'ato'a lelei le vaai ma le mafaufau, ia manino le vaai fa'ale-agaga ile Atua ma lona alofa mo i tatou. O le popole lava ia, o se vaega o le ola fa'ale-natura o le tagata soifua. Ma e le mafai ona vaoia le tupu o lea lagona i totonu o le tagata. E lasi foi ma tele mafuaaga e mafua ai ona popole le tagata, ma e eseese foi uiga ma foliga vaaia o le tagata popole.

A o le fa'amanatu, o ai e maua ai le fofo o le tatou popole? Ua na o le Atua lava. Afai e popole ona ua lata su'ega, o le Atua na te foa'i le loto finau ma le onosa'i e fai ai meaaoga. Afai foi ua maua i le loto fa'anoanoa ma le loto popole ona o nisi o fa'ataotolia i ma'i o le tino, pe ona o mafutaga ua motusia ona o le

oti, ua na o le Atua lava na te foa'ia le mafanafana ma le to'afilemu i o tatou loto. A leai le Atua, e tumau pea ona tatou feagai ma le loto popole. Le finagalo o le Atua na fa'aali ia Pala'amo, e le i oo ia Palako. O le ala lena o le tūmau pea o le loto popole ma le loto atuatuvalet o Palako, auā ua lē i ai le Atua. E taua ai lo tatou mafuta i taimi uma i le Atua e ala i le tatalo ma le fa'atoga, tatou fesili i le Atua mo le tali o tatou popole.

Lenei foi vaitau i le pepesi ai o fa'ama'i eseese ua fano ai le soifua o le toatele o le lalolagi, e leai lava se isi e lē o maua i le popole. Lea ua lalata mai i o tatou laufanua. A popole, tapa i le Atua mo se fofo. Tatalo ma le loto talitonu, e faia e le Atua le mea sili, e fo'ia ai le tatou popole.

Mo le tupulaga talavou, e tele ina maua i tatou i le popole pe a oo i suega, pe feagai foi ma ni fita o galuega o galulue ai. O le fa'amanatu foi lea mo i tatou: mafuta i le Atua i le tatalo, ma fa'atino mea ua fa'asino mai e le Agaga o le Atua mo i tatou.

Ua aogā foi le toe fa'amanatu mai ai, e tāua foi lo tatou sao i le fa'ate'aeseina o le popole o isi tagata. O a tatou upu ma tala e lafo, e mafai ona te'a ai le popole o isi, po o le atili ai ona atuatuvalet isi, aua e taugā aafiaga o a tatou upu ma tala. Taofi e Pala'amo le isi vaega o le fe'au a le Atua na ta'u i ai. E talitonu, o le vaega na ia lē fa'aioaina, o lo o taoto ai le fofo o le popole o Palako. Ioe, e telē le sao o a tatou upu ma tala e fai.

Ua valaauina i tatou e talai le finagalo o le Atua. Pe faifeau, po o se isi lava galuega o tatou galulue ai. Ia avea i tatou ma ni ave feau e fa'amaoni e ave le finagalo o le Atua e te'a ai le popole, ae le o le mimilo o le tala e fa'atupu atili ai le popole i isi.

Fai mai upu a le pese a le tama pese lauiloa o Bob Marley, "don't worry about a thing, 'cause every little thing is gonna be alright."

.....

ASO SA: 24 MATI 2024

MATĀ'UPU: FA'ASINOMAGA O LE TAGATA MA LONA (Aso Sa o le Laupama)

TUSI FAITAU: Luka 2: 41 – 52

FESOASOANI MO LE TA'ITA'I:

Atonu e le tau fa'amatalaina le uiga o le fa'asinomaga (ae manaia ae saili i le tino matutua o le autalavou i so latou manatu). Ae i le tusi faitau, o lo o fa'amatalaina ai Iesu ma lona tuātagata, le fa'asinomaga na fa'avae ai le amataga o le galuega tala'i a Iesu.

E atagia i le amataga o le tala le aumaiga e Luka le fa'asinomaga na tupu ma olaola ai le tama o Iesu. Aua fai mai, o le masani o le ō o matua o Iesu i Ierusalemā mo le tausamiga o le paseka. Foliga o le aiga ua fa'avae i le Atua, ma le aiga e tausi mamalu tu ma aga aua lo latou soifua tautua i le Atua. E ui la ina fai mai Luka o le 12 tausaga o Iesu na o a'e ma ona matua i le tausamiga o le paseka, ae atonu e le o le taimi muamua lea na vaai ai Iesu i ia faiga.

Peitai, e i ai le mea malie na tupu, ina ua mae'ae'a uma fuafuaga o le paseka ua toe malaga atu Maria ma Iosefa i Nasareta, a o ua nofo pea Iesu i Ierusalemā. E tu'u-fesili po o le a le mafua'aga ua ala ai ona nofo Iesu, ae le toe foi ma ona matua. Aua fa'ato'a manino mai lava i le tali o Iesu i lona tina, e pei ona i ai le fuai'upu ua avea nei ma matua: Ona fai atu lea o ia ia te i laua, "Se a ea le mea na oulua sa'ili mai ai ia te au? Lua te le iloa ea e tataua ona ou i le fale o lo'u Tamā?"

Atonu e le'i faigofie le sa'iliga o le tama e ona matua ina ua la iloa ua le fa'atasi o ia ma lo latou aumalaga. 3 aso na mavae ae fa'ato'a maua i le malumalu o lo o nonofo ma le au aoao. 3 aso o lo o popole ma le nofo filemu. A o le tolu foi lea o aso, e pei o lo o fa'ailoa mai ai le tolu o aso talu na maliu Iesu, ae alu loa ma le sa'iliga a tina i le tu'ugamau. E tai tutusa foi la le tali a Iesu i ona

matua, ma le tali a agelu i fafine na o i le tu'ugamau: Aisea ua outou saili ai Iesu? E foliga mai e le o se fesili, ae o le fa'amanatu. Talofa i le alofa fa'amataua lea e atagia i le fesili a Maria. O le upu tiga o lo o fa'amatala ai lo la sa'iliga o Iesu, o lona uiga, o tiga e le gata i le itu fa'aletino, ae fa'apena foi ma le mafaufau. E uiga tutusa ma le upu pologa po o le le mautonu.

O le lagona ootia lea sa oo ia Maria ma Iosefa, le ogaoga o le atuatuvaale ma le popole. Lona uiga, ua o la matuā tiga atoa i le sa'iliga o le la tama. Ae malie i le fa'afofoga le vaega lea o le tala, aua e foliga pei o lo o fa'afeagai le fa'asinomaga fa'a-le-lalolagi o Iesu ma lona fa'asinomaga fa'alelagi. Aua o le fesili a Maria o lo o fa'asino i lo latou mafutaga ma lona tamā o Iosefa, ae tali mai Iesu ma fa'asino i lona Tama o i lagi, lona Tama e ona le malumalu na maua ai o ia, o le Atua.

O le ulua'i taimi foi lea o lo o fetalai pe tautala ai Iesu i le tusi a Luka. Sa le manatu e lagona lona leo i le taimi lea, ae atonu ua alagataua ina ia fa'manatu ia Maria ma Iosefa lona fa'asinomaga. O la e iloa e Maria ma Iosefa, ae ai ua galo. Auā e uma le fesili a Iesu, ae leai se tali a Maria ma Iosefa. E foliga mai ua leai se tali, ona ua sa'o le fa'amanatu a Iesu.

O le upu tataua i le tali o Iesu, o lona uiga, e ao lava ona fa'atino ina ia fa'ataunuu. Fa'ataunuu le a? Fa'ataunuu le finagalo o le Atua.

O lona uiga, o le afuaga lea o le nofo o Iesu i Ierusalemā i le malumalu, ina ia fa'ataunuuina le finagalo o lona Tama. Auā o le fa'amoemoe lava lea na auina mai ai o Ia. O le fa'amamafa foi lea o le tusitala a Luka, e le o le vaai i le fa'afeagai o fa'asinomaga a Iesu, a o le va'ai ua lava tapena o ia i lona fa'asinomaga na ia tuputupu ma ola ai, mo lona fa'amoemoe ma lona fa'asinomaga o le a agai atu ai e ala i lona galuega tala'i. Manino lava i le mea ua amata ai, o le fale o lona Tama, lea na ofo uma ai i latou na fa'atasi ma Ia. Ua o'o lava i ona mātua.

GALUEGA FA'ATINO: AOAONA FA'ALUPEGA

Aoao i tupulaga o a latou fa'asinomaga, e ala i fa'alupega – e lē gata la i nu'u ma alalafaga, a fa'apea foi ma fa'alupega fa'a-le-ekalesia. Ia iloa lelei e nai fanau o latou fa'asinomaga ua lē gata o tagata Samoa a o tagata EFKS foi.

AOTELEGA:

E taua lo tatou iloa ma malamalama, o lou fa'asinomaga o le amataga lea o lo tatou valaauina. Fa'apei o Iesu, ina ua oo i le fale o lona Tama, o le fale na manino ai tagata sa i ai ma ia, fa'atasi ma ona matua, i lona fa'asinomaga, ma ole amataga foi lea o lana galuega i le lalolagi. Ina ua ofo ai i latou i lona poto, ma lana tali atu i ana upu.

O lona uiga, na amata mea lava lona fa'asinomaga mai i le maota o lona Tama i lana galuega tala'i i le lalolagi. O le nofoaga na maua ai le malosi ma tumu ai utu i le iloa e fa'atino ai lona vala'auina, ma ia faailoa.

O le mea lea, afai o le fa'asinomaga o Iesu na amata mai ai lana galuega tala'i, aisea la tatou te le faapea ai? Tele ia o maota tau'ave o lou soifua ma lo'u ola, o lou aiga, o lou nuu, o lou atunuu, aemaise o lau ekalesia.

O maota nei, o lo o taoto ai o tatou fa'asinomaga, ma sa amata mai ai foi ona a'oa'oina i tatou ina ia iloa tu, savali, tautala, ma galue. Ia aua la ne'i galo lou tama ma lou tina, i le faleoo sipasipa ona ole mativa, tutulu ile alofa, patupatu i ma'ama'a o lo o fola ai. Le fale o nai ou matua sa amata tausi ma fafaga, fa'afailele ai lou ola.

O fale o lo o taoto ai o tatou fa'asinomaga, a lea ua o tatou 'oa'oa ai nei, ma sa'a i ma'a o mālie, 'aua nei galo. Ae a nai o tatou aiga, nuu, ma si o tatou atunuu, o maota tetele ia o lo o tatou mitamita ai nei ile lalolagi. Aua o lo tatou fa'asinomaga lea. I la ta aganuu, lau gagana, aea ou gafa ua ta'ua nei o maota tau'ave e te mitamita

ai. O tatou fa'asinomaga ia na fa'avae mai ai le amataina o lo tatou soifua 'au'auna, ma le soifua tautua.

Ae a le ekalesia, tasi lea faletele ia aua nei galo lona taua. O le nofoaga na amata ai ona tapu'e le ola fa'atuatua i le Atua, ma o tatou iloa ai Lē na faia i tatou, e ona le malosi uma lava, ma le iloa e faatino ai o tatou vala'auina i soo se ala.

O lou lea fa'asinomaga i le ola fa'a-Kerisianoina, ia aua nei vale tu'ulima. 'Aua nei galo, le maota o lou Tama, o le fagufagu lea ma le fa'amanatu lea a Iesu, ina ne'i saili mai i tatou, ae ese le fale o lo o tatou o i ai.

Ne'i le o i le maota o le Tamā, ae eua i fale kalapu, o papu, ma fale fa'afiafia. Ne'i avea fale nei ma o tatou fa'asinomaga, ona uma lea ua tupu ai ni fa'alavelave, malepe ai aiga, misa ai matua ma fanau.

.....

ASO SA: 31 MATI 2024 (Aso Sa o le Toetu)

MATĀ'UPU: E LĒ O LE MALOSI

TUSI FAITAU: Roma 6:1 – 14

FESOASOANI MO LE TA'ITA'I:

O se fesili fa'atupu manatu pe a tatou mafaufau i le manatu autu o lenei aso, “afai e lē o le malosi, po o le a la?” – “If not by power, then by what?”

Atonu o lo o ta'oto le tali o lea fesili i le tusi faitau. Manatua foi, sa lauiloa lava le tuputupu ma le olaola o le ekalesia i Roma, ia ae le masino foi le tele o fa'afitauli sa feagai ai ma i latou; ua o'o lava ina fa'aluaafesasi ai le au fa'atuatua.

Fai o le mata'utia o le sauāina o tagata Kerisiano i le malosi o le pule'aga o le malo a Roma; a o fa'afitauli foi i le lotoifale o le

ekalesia lava ia, i le va o Kerisiano Iutaia ma Kerisiano o nuu ese, o tapuaiga fa'apaupau, fa'apea ma talaiga taufaasese.

O lenei la tusi, e taumolimoli ai alofa'aga, o a'oa'oga, aemaise o le fa'amalosi'au ma tima'iga a le Aposetolo o Paulo. A o le tusi foi, na tusia a o lumanai ai lana malaga e asia le ekalesia. I le tala lava lea, o lo o fa'amatalaina e le Aposetolo le tu faa'feagai o le agasala ma le alofa tūnoa o le Atua, e ala ia Iesu Keriso. Fa'atasi ai ma le mea e ao ona fai e le tagata fa'atuatua.

O lo o fa'aauau lea va'aiga i le mataupu e 5, i le ese'esega o Atamu ma Iesu fai mai Paulo: "faapei ona fa'asalaina o tagata uma lava i le agasala e tasi, e faapei foi ona ta'uamiotonuina o tagata uma lava i le amiotonu e tasi, latou te ola ai." O le matā'upu silisili lea o lo o laualuga ai le finauga a Paulo, aua ua fa'aseseina nisi o le au Kerisiano i aoaoga e faapea, e ta'uamiotonuina le tagata ona o le tūlāfono, ae le o le fa'atuatua.

Toe fo'i mai la i mataupu e 6 sa tatou faitauina, o le afuaga foi lea o fesili e uiga i le ola agasala o tagata ma le taliaina o le alofa tūnoa o le Atua e ala i le maliu ma le toetu a Iesu Keriso. Ma ua manino lava i le fuai'upu ua avea nei ma matua, o le tali lea i le malosi o le agasala ma fīta o le olaga: "O lenei, ua tatanu fa'atasi i tatou ma ia i le papatisoga i lona maliu; ina ia tatou savavali i le ola toefuataiina, pei ona toe fa'atuina mai o Keriso nai e ua oti, i le mamalu o le Tamā."

Manino i le fa'amatalaina e le Aposetolo, e lua ni vaega taua o lo o fa'amamafaina e Paulo. O le oti, ma le ola, a o le ituaiga ola lea, fai mai Paulo o le ola ua toefuataiina. A toe fuata'i se mea, o lona uiga ua toe fonofono, ua toe fa'aleleia, ua toe fa'afou. Lona uiga, o le ola ua faafouina. O le uiga lea o le "tatanu fa'atasi o le tagata ma Iesu i le papatisoga i lona maliu," o le avea lava ma tagata fou ina ua tanu lona tagata tuai ma Keriso. O le tatanu fa'atasi lava foi lea ma o tatou agasala.

Ua toe fa'afouina o a tatou tagata i lona lava toe tu manumalo mai i le tu'ugamau. Lea e fai mai, "afai ua fa'atasia i tatou i le fa'atusa i lona maliu, e fa'apea foi i tatou i lona toe tu mai." O le fa'aolataga lava lea ua ta'uamiotonuina ai le tagata, ua avea ai o ia

ma tamafai o le malo o le Atua. O le ta'uamiotonuina, o lona uiga, o le mamā ma leai se mea e sala ai, ua le toe eleelea i le agasala.

Lona uiga, o le maliu ma le toetu a Iesu Keriso, ua motusia ai noataga o le agasala, ua suia ai le tagata tuai i le tagata fou, ua na fa'asaolotoina foi le tagata mai le malosi o le pule a le tūlāfono, ma ua fa'apena ona maua ai e le tagata le filemu moni, atoa ai ma le olioli loloto ua fa'atupuina, ina ua ola fa'atasi ma Keriso.

O le uiga lea o le fa'amalosi au a le Aposetolo i le ekalesia i Roma. Ina ia latou fa'amoemoe lava i le alofa tūnoa o le Atua e ala i le maliu ma le toetu o le Alii Fa'aola. Auā o le ese'esega lea o le agasala ma le alofa tūnoa o le Atua. O le agasala e gata lava i le oti. A o le alofa tūnoa o le Atua, e fa'aauau pea pe a mavae le oti.

Mo le au fa'atuatua i Roma, e ui la i le malosi o le pule'aga a le malo. O le malosi lea e gata, e pei foi ona muta le malosi o isi malo na muamua – tulai mai Asuria, uma le malosi, tulai mai foi Papelonía uma foi lona malosi, fa'asolo mai ia Peresia ma Eleni, uma foi le malosi, lea ua tulai mai Roma i le taimi o Paulo, ae ua mautinoa lava e Paulo, e oo mai foi lona gata'aga. A o le mālō e le muta, e le fa'atoilaloina, o le malo o le Atua e ala ia Iesu Keriso, ma Lona Alofa Tūnoa. O le ola sauaina o se tiga e mavae, ae tumau manuia o le tagata pe a salamo mai agasala ona o le maliu ma le toetu o Iesu Keriso.

Manino i le fa'amanatu a le Aposetolo, o le maliu ma le toetu o Iesu Keriso e mafai ai ona feagai ai ma luitau ma faigata o le olaga. Ma o le naunautaiga lea o Paulo, ina ia tumau le fa'atuatua ma talia le alofa tūnoa e ala ia Keriso ma ola i ala o le Atua. Auā e leai se isi malosi e sili atu nai lo le satauro o Iesu. O le toetu mai foi o le Alii Fa'aola, o le ata lava foi lea o le fa'aolaina o le tagata mai le loloto o le agasala.

GALUEGA FA'ATINO: TALANOA

O le a se taua o le toetu a Iesu i lou olaga? O se fesili fa'atupu manatu e taitai ai le talanoaga mo le autalavou.

AOTELEGA:

E le o le malosi, a o le alofa tunoa o le Atua e ala i le maliu ma le toetu o Iesu Keriso, e mafai ai ona tatou feagai ma luitau ma faigata o le ola nei.

O le a lava la le pesi mai o matagi malolosi o fa'afitauli o le ola nei, o le a le lualuta mai o puapuaga ma faigata o le lalolagi, ae o le a foi le matagofie ma le matalasi o fa'atosina ma mailei a le tiapolo e taumafai e lepeti ai lo tatou mafutaga ma le Atua. E le mafai e ia mea uma ona manumalo mai ai i le alofa tunoa o le Atua e ala ia Iesu.

Aua o le alofa tunoa o le Atua e ala ia Keriso, o le malosi matalilo lea na te fa'amalosia le tagata fa'atuatua, na te fa'alototeleina le tagata talitonu, na te aumaia foi le mautinoa i le tagata fa'amaoni. Ae a la ona manumalo le malosi o le agasala, ona ua tatou filifili i ai. O le upu moni, e leai a sesi o tatou e atoatoa, o le tagata a ia e vaivai ma fa'atauva. A ua papatisoina i tatou i lona maliu, ina ia aveia i tatou o ni tagata fou. Ua oti o tatou tagata tuai i le agasala, ina ia tatou savavali i le ola toefuataiina.

O lea ua toetu Iesu, o le fa'ailoga o le manumalo. A o le fa'amanatu foi i le tagata ua na iloa le fa'amoemoe i tua atu o puapuaga. O le tagata foi na ia onosaia le malosi fa'aletagata, ma tuinanau o le ola, ae tepa ma le fa'atuatua i le malosi o le Atua, e ala i le toetu manumalo. Po o tatou vaai i le toetu? O tatou vaai i le aso a taeao? O tatou tagatagai i le fa'amoemoe fou o le isi aso? O le tagata fa'atuatua i le Atua, e iloa lava e i ai taeao. E sosoo afa ma maninoa. E tupu le moemoe fou. E lutia i Puava, ae mapu i Fagalele. Aua ua iloa e le toilalo le malosi o le Atua, o le malosi fa'aleagaga, o le malosi fa'atupu malosi.

Maneia foi sia fa'amanatu mo i tatou, tatou tepa i le fa'amoemoe o a taeao. Tatou talitonu o le toetu o Iesu, o le avanoa foi lea e toe tutu ai tatou – o lona uiga, aua nei fa'avaivaia i tatou pe a oo mai fita ma faigata, ae fa'aaoga le malosi o le Toetu e fa'amanatu mai, e i ai taeao! There's always tomorrow!

E pei ona tatou i ai i lenei Aso Sa ma lona fa'amoemoe, e tatou te fa'amanatuina ai le Toetu manumalo mai o lo tatou Alii Fa'aola o Iesu Keriso. O lo tatou manumalo fa'atasi lava lea ma ia e fa'avavau. O lona uiga ua le toe pule le agasala ia i tatou, a ua agavaa uma i tatou i le ola fa'avavau, e ala i le salamo mai agasala ma fa'atuatua pea ia te Ia.

.....

APERILA: SU'ESU'EINA O LE TUSI A PETERU MUAMUA, MA MANATU TALAFEAGAI MO TUPULAGA TALAVOU.

ASO SA: 07 APERILA 2024

MATĀ'UPU: TOFI E LĒ PALA

TUSI FAITAU: 1 Peteru 1: 3 – 9

FESOASOANI MO LE TA'ITA'I:

O le tusi lenei a Peteru, i le manatu o le au su'esu'e o le Tusi Pa'ia, sa tūsia e Peteru, fa'apea o le so'o o Iesu, o ia o le aposetolo a Iesu Keriso, e fa'ailoa le fe'au i tagata uma kerisiano ua fa'atā'apeapeina i Pono, Kalatia, Kapatokia, Asia ma Pitunia. O nai vāega ia o le mālō i Asia ititi.

O le fa'amoemoe lava ia na tūsia ai lenei tusi, ina ia fai ma fa'amalosiau i le 'au kerisiano uma o e ua sauāina ma fa'ataapeapeina i lo latou fa'atuatua, ma le talitonuga e ala i le fa'aolataga ia Iesu Keriso, ina ia mau pea le to'ovae, o lo o ia i le fa'amoemoe ola mo i latou uma.

O le fesili, O le a lea fa'amoemoe?

O le fa'amoemoe lea o lo o afua ai le matā'upu o lo o talanoaina i lenei asosa. O le tofi e lē pala, o le tofi fai mai e leai se leaga e pisia ai, e lē mate pe mamae, i ni fa'aosoosoga po o mailei o mea leaga o le lalolagi.

O lona uiga, o le fa'amalosi a Peteru, ina ia tumau pea i le fa'atuatuaga i le fa'aolataga tele sa tapena e le Atua, lea sa ofoina atoa mai ai le soifua o lona Alo pele e to'atasi, sa masa'a ai lona toto ma maumau ai lona ola, ma le toetu manumālō mai o Iesu Keriso mai le oti ma le tu'ugamau. O le mea moni, o le afuaga lea o lo latou i ai i tofotofoga e tele o lo latou soifua ma le vala'auina.

O tofotofoga foi ia i le mau a Peteru, e iloa ai le auro moni i le afi. O tofotofoga e iloa ai le tagata moni o le fa'atuatuaga ia Iesu Keriso, po o le tagata ua moni le fa'atuatua ma talitonu ia Iesu Keriso.

Ae o le mea pito sili ona taua ile fa'amalosi a Peteru, ina ia tumau pea lo latou molimau i le fa'aolataga ia Iesu Keriso. O lo latou tofi lea e lē pala, e lē leaga, pe pisipisia i mea leaga o le lalolagi, pe mate foi lona tāua, auā o lo latou tofi lea ua ma'ea fa'amauina i le lagi i le tusi o le ola.

O lona uiga, o le tofi e lē pala, e fa'amatalina ai se 'au'auna ua lelei ma fa'amaoni, ma tūmau lana molimau i le Tala Lelei ia Iesu Keriso. O le tofi mai le Atua, e pale, sei, ma teu fatu e le tagata kerisiano po o le talavou foi ua ola ia Keriso.

FA'ATINOGA O LE MATĀ'UPU:

Tu'u le avanoa i tupulaga e fa'atalanoa ai le manatu autu. I le fa'amoemoe, ia sasa'a mai ai le iloa ma le silafia i tupulaga talavou i so latou malamalama'aga e uiga i le matā'upu, ma aumai

ai ni fe'au tāua e talafeauga lelei ma lo latou ola taumafai ai mo le Atua ma lona finagalo.

O le tāua fo'i o le tu'u o avanoa i tupulaga talavou, e mafai ai ona lu'i le talavou ina ia su'esu'e le Tusi Paia ma ia fiafia ai e faitau le Tusi Paia i taimi uma.

AOTELEGA O LE MATĀ'UPU:

I le aotelega o mafaufauga o le manatu autū o lenei Aso Sa, o lo o fa'amamafa mai ai le fa'ataua o lou vala'auina o oe o le talavou ua ola ia Keriso. O lou tofi lenā, ina ia fa'aogaina lelei e 'au'auna, ma tautua ai mātua, 'aiga, o le nu'u aemaise lava o le Tala Lelei. O le mea ia mautinoa, e i ai tofotofoga e tele o le vaitau lenei i le ola fa'a-tupulaga talavou e taumafai mo le Alii. Ae fai mai Peteru o inā e iloa ai le auro i le afi. O le avanoa e iloa ai le talavou tūmau lona fa'atuatua i le fa'aolataga ia Iesu Keriso.

O lou vala'auina o le tupulaga talavou ua ola ia Keriso, o lou tofi lenā e lē pala ma leaga, pe afai e moni lou fa'atuatua ma le fa'amaoni ia Iesu Keriso.

.....

ASO SA: 14 APERILA 2024

MATAUPU: IA FAI LOU TALAVOU MA MA'AOLA

TUSI FAITAU: 1 Peteru 2: 4 – 9

FESOASOANI MO LE TA'ITA'I:

O lo o tatou i ai pea i lēnei māsina i Aso Sa ta'itasi i le fa'atalanoaina, ma le su'esu'eina o le tusi a Peteru muamua. O

lenei la Aso Sa o lo o fa'apea mai ai le manatu autū, *Ia fai lou talavou ma ma'aola.*

O le vāega lenei o le fa'amalosi a Peteru i le 'au kerisiano e pei ona tā'ua i le Aso Sa na te'a nei, o lo o fa'amanatu ai pea Peteru i le ata o le tagata e tūmau lana molimau ma le fa'atuatua iā Iesu Keriso ma le fa'aolataga. O lo o manino lava, o Iesu o ia o le ma'aola na lafoa'iina e ona lava tagata, ae ua avea ma ma'a tulimanu aupitoiluga.

Ma'a tulimanu lea fai mai le fuai'upu e 6, na tu'uina i Siona, ma lona tāua, ma e lē mā foi se tasi e fa'atuatua i ai. O ē uma la ua fa'atuatua i ai, ua i ai foi ma le mamalu o le Atua i le soifua ma le ola vala'auina.

Po o a la tīgā ma faigata, o tofotofoga o le ola o lo o feagai ma le Kerisiano i ia vaitau, 'aue le popole, auā o lo o i ai le ma'aola i totonu iā i latou. Ua iā te i latou le mamalu o le Atua. Auā ua soifua Keriso i totonu o latou loto.

Ae mo ē fa'alogotatā, ma tausui i lea ma'aola, Talofa, e tevateva, ma tausui i latou i aso uma o lo latou ola. Ae mo tupulaga e pei ona talia lēnei ma'aola i le fa'atuatua, ma le talitonu fa'amaoni i ai. O tupulaga na ua ia i latou le mamalu o le Atua.

FA'ATINOGA O LE MATĀ'UPU:

Tu'u le avanoa i tupulaga, se'i va'ili'ili ma sasa'a mai ai le tofā a'o le iloa e uiga i le matā'upu, se i fa'ailoa le silafia ma se malamalama'aga i le ma'aola ma lona uiga o lo o fa'aaogaina ai, ma le so'otaga i le soifuaga lautele, ma ia maua ai se a'oa'oga taua tele mo tupulaga talavou o le ekalesia.

AOTELEGA:

I le aotelega o māfaufauga o lēnei mataupu, ia fa'atāua e le talavou, o ia o le talavou ua ola ia Keriso. Ua talia le ma'aola a le Atua e fai ma tapasā o le soifua ma le ola, i so o se fe'au ma se vala'auina ua tu'uina i ai e le Atua. Ma ia avea ai loa le talavou ma ma'aola i totonu o aiga, nu'u ma le ekalesia. O le ma'aola e manuia ai aiga, manuia ai nu'u, ae fa'asilisili ai lava ona vi'ia le Tala Lelei i le soifua ma le ola tautua.

.....

ASO SA: 21 APERILA 2024

MATĀ'UPU: TEUGĀ'OA E LĒ PALA

TUSI FAITAU: 1 Peteru 3: 1 – 6

FESOASOANI MO LE TA'ITA'I:

O lo o fa'agasolo pea le talanoaina o su'esu'ega i a'oa'oga mai i le tusi muamua a Peteru i lenei māsina, auā se fe'au tāua mo tatou tupulaga.

O le teuga'oa, o le ata o se nofoaga e teu, pe tu'u, pe fa'aputu i ai le 'oa ina ia malu, ma ia lelei ona teu. Ia 'aue ne'i sātia, pe sautia foi i matagi vale o le ola, pe gaoia foi.

Fa'apena fo'i manatu o lo o laualuga i le matā'upu lenei e 3, o lo o tomua ai lava 'upu a Peteru i le va o le tane ma lana avā. i le tāua o le usita'i i le va fa'aulugali'i, po o so'otaga i le alofa fa'a-so'otino i le va o le tane ma le avā. O le fa'amoemoe lava i le manatu o Peteru. E iloa le so'otaga lelei, i le amio lelei. O le uiga o 'upu a Peteru o lo o i le fuai'upu e 3, ina ia 'aue nei faia i le tino tēuga, e pei o le va'aiga fa'a-le-tagata lenā, i lauulu, filifili, ma

sasa’o, o tautaliga auro ma anagata, o ofu ilaila, ma sei, e lē iloa ai inā se amio lelei.

A’o le tagata lilo po o le teugā’oa fa’aleagaga, o le loto lea. O le teuga ‘oa lē pala, o le nofoaga e faitau ai le filemu, o le agamalu, ma mea tau tele i luma o le Atua.

O le a le uiga o ia ‘upu? O lona uiga i le fa’amalosiaiu a Peteru i kerisiano o lo o sauāina, i tofotofoga o le ola, e le tāua fafo, a’o totonu o le loto e iloa ai oe.

O lona uiga o le teugā’oa le pala lea o lo o talanoa ai Peteru, o le loto, auā o le loto e ala mai ai le filemu, agamalu, agaalofo, onosa’i, fa’apalepale, ma isi lava mea tau tele i luma o le Atua.

FA’ATINOGA O LE MATĀ’UPU:

Tu’u pea le avanoa i tupulaga talavou e fa’asoa mai ai i le matā’upu e pei ona tu’uina i ai, aemaise lava i so latou malamalama’aga i le tusi pa’ia, ma le so’otaga lautele i le soifuaga o lo o ola ai fa’a-tupulaga talavou EFKS o lo o ola iā Keriso.

AOTELEGA O LE MATĀ’UPU:

I le aotelega o māfaufauga e pei ona i ai le manatu autū i lenei Aso Sa, ia iloa ma malamalama le tupulaga talavou, po o fea tonu o lo o taoto ai le teugā’oa sili, fai mai e lē pala. Lea ua manino a i le manatu o Peteru, o le loto, ae lē o le vaaiga lautele i le tino e tāua i le fa’a-kerisiano. O lona uiga, o le fe’au fo’i lea mo tupulaga talavou. E lē tāua teugā’oa fa’a-le-lalolagi, o mea e pala, po o a tamao’aiga, o sikaili, ilaila ma auro ae leaga le loto, e lē aogā lea i le Atua. Ae o le teugā’oa sili, i le ola fa’aleagaga, o le loto. Auā o le loto le afuaga o mea lelei uma, pe afai e usitai ma fa’alogo i le Atua.

.....

ASO SA: 28 APERILA 2024

MATĀ’UPU: O LE TALAVOU USITA’I, E ‘OFU I LE LOTO MAULALO

TUSI FAITAU: 1 Peteru 5: 5 – 7

FESOASOANI MO LE TA’ITA’I:

O lea ua o tatou o’o mai i le matā’upu mulimuli o le tusi muamua lenei a Peteru, ae o lo o fa’amamafa ai le tausiana o le lafu māmoe, ina ia mataala, ma ia tete’e atu i le tiapolo.

Peita’i i le vāega lēnei o le matā’upu, mai i le fuai’upu e 5 aga’i i le 7, o lo o manino ai lava upu a Peteru i taulele’a, ina ia lē gata e usita’i ma fa’alogo i e matutua, ae ‘ia fa’apena fo’i ona ava lē tasi tupulaga i lē tasi tupulaga.

E āfua nei mea uma pe afai e o’ofu i le loto maulalo. O lona uiga, e tupu le usita’i ma le fa’alogo e fa’atino ai mea uma, ina ua i ai le loto maulalo i le tagata. Auā o le loto maulalo e i ai le agamalu, e i ai le amana’ia, o le ava, e i ai ma filēmū.

O le i ai la o la’ei o le loto maulalo i le tagata, o le fa’aosofia fo’i lea o lagona e āfua ai ona fa’atino mea uma i le fiafia, o le usita’i ma le fa’amaoni.

Ae ‘ese le manaia o nai vala ia e talanoa ai Peteru. Fai mai a ia, e tete’e le Atua i ē fa’amauualuga, ae foa’iina mai le alofa tunoa i ē fa’amaulalo. O lona uiga, e lē fiafia le Atua i le tagata fa’amauualuga lona loto ma fa’asausili i ona manatu, ae i ai le alofa tūnoa tele o le Atua i le tagata e fa’amaulalo lona loto.

Auā e fa’amauualugaina e le Atua le tagata e i ai le fa’amaulalo i fa’amanuiaga i lona loto, ae leai le tagata fa’amauualuga. O le

fa'aeaea lea a le Atua, e ala ai ona amana'iaina le fa'atauva'a o le tagata i ona manuia.

O lona uiga, o le usita'i lava ia ma le fa'alogo, e mafai ona tino ina ua 'ofu le tagata i le loto maulalo.

FA'ATINOGA O LE MATĀ'UPU:

Fa'atalanoa le matā'upu, ia manino le feso'otaiga o le usita'i ma le loto maulalo i tupulaga talavou, ma ia taumafai e fa'alautele le matā'upu ina ia maua ai se fe'au lelei mo tupulaga i olaga i aso nei ma le fe'au taumolimoli a le Tusi Pa'ia.

AOTELEGA O LE MATĀ'UPU:

I le aotelega o māfaufauga o le matā'upu i lenei Aso Sa, o lo o fa'amamafa lava le so'otaga o le usita'i ma le loto maulalo i le faitauga fa'a-tupulaga-talavou. O lea ua manino le fa'amoemoe o le taumafai o Peteru e fa'ailoa le tāua o le ola usita'i, e āfua mai ina ua o'ofu i le loto maulalo.

E leai se isi la'ei o lo o fia silasila i ai le Atua, ua na o le loto ua fa'amaulaloina, auā o le ala lea o manuia i le ola. O le talavou usitai la, o le talavou lea e 'ofu i le loto maulalo, ma e fa'apaleina fo'i i manuia o le Atua.

.....

ASO SA: 05 ME 2024

MATĀ'UPU: TAUTUA TUĀVAE

TUSI FAITAU: Ioane 13:3 – 11

FESOASOANI MO LE TA'ITA'I:

“Ona liligi lea e ia o le vai i le ipu e mulumulu ai, ua mulumulu i vae o ona so'o ma soloi ai i le solo ua ia fusi ai.”

O 'upu ia o lo o ta aofai ai le fa'amoemoe na faia ai e Iesu, le 'aiga fa'amavae ma le auso'o. Fai mai ua fa'aosofia o ia i le alofa i ona tagata, ona ua o'o mai ona toe taimi i le lalolagi. Mafua'aga lea na mulumulu ai e Iesu vae o le auso'o.

Ae o le mulumuluina o vae i tu ma aga fa'a-Iutaia, o le aganuu talimalo, o le tiute ma le matāfaioi e faia e le tagata pologa, po o tagata e maulalo o latou tūlaga i le sosaiete. I le mea moni, e lē tatau i le Alii Fa'aola ona mulumulu i vae o le auso'o, auā o Ia o le Mesia, o le Fa'aola, o le Alo o le Atua soifua.

Peita'i ua tūla'i lava e aunoa ma se 'upu, se'i fa'atino lona vala'auina, e tapena ai se fa'aoso lelei mo le auso'o. Tapena le loto, tapena le agaga o le so'o i auala e tatau ona faia ai le galuega o le tautua tuāvae.

Ae o le avea ma tautua, lea ua fa'ata'ita'i e Iesu. Ua tūla'i lava ma tō 'ese lona ofu tele, ae sulu i lona sulugatiti le ie sōloi. O le 'upu 'tu', o lo 'o fa'amatala ai le tulai a Iesu, o lo o fa'amatala ai le Toe Tu o Iesu Keriso.

O lona uiga, o le ata atoa o le ola tautua ua māfua ai ona 'tālai' Keriso, o le ata o le tautua, e toe fa'atupu ai le ola, le malosi, o le tagata ua fa'a-vaivai, le tagata pala'ai ma le fefe.

O le tūlai o Keriso ma ave'ese lona la'ei, e iloa ai lona tulaga mamalu. Ae sulu lona la'ei fa'a-'au'auna, la'ei fa'a-tagata tautua – o le ie sōloi. O le ata o le tautua ua sauni e tapena le vai fafano, e mulumulu ai vae o le auso'o.

O lona uiga, o lea ua fa'ailoa atu e Iesu i lona auso'o, o le avea ma so'o, e i ai ona mamalu, a'o mamalu e fa'ailoa i le avea ma 'au'auna po o le tagata tautua, a'o se 'au'aunaga fo'i e fa'aauau.

Tautua e fai gūgū, ae tautala ana fa’atinoga O uiga ma gaiōiga a le tagata tautua tuāvae. E lē popole i le palapala. E lē popole i le susu. Ae sei tapena lana auso’o, mo le galuega o lo o taoto mai i luma. Tapena mo i latou le fa’aoso, o le iloa ona punou ‘ifo, ma fai le faiva o le tautua.

E lē pei o le tapenaina o Peteru. E foliga mai e manaia ona lagona i le fa’alogo, i le amataga i le mafua’aga ua ala ai ona musu e mulumulu ona vae. Fai mai Peteru: “E te lē mulumulu lava i o’u vae.” E mafai ona fa’apea, o le va’ai lava ia a Peteru, o lo latou luma lea i le va’aiga fa’a-Iutaia ma lana aganu’u. O le tautua mai o lo latou ta’ita’i ia te i latou.

Peita’i, ina ua fa’alogo atu Peteru, e tele manuia e maua mai i le galuega ua faia e Keriso mo i latou. Sui loa ma lona tagata, ma fai mai, e mulumulu loa ma lona tino atoa. Le ituaiga tautua lea e ta’ua o le tautua fia-matai. Tautua e māfua ona fai, ona o le mana’o i le tau. E lē o se tautua lelei lea. Fai mai le sa’afi a le Alii fa’aola, A fia muamua, fai ma tagata tautua, fai ma ‘au’auna. E pei o le ‘upu ua māsanai ai le fa’alogo, “O le ala i le pule o le tautua.”

FA’ATINOGA O LE MATĀ’UPU:

Tatala pea le avanoa mo tupulaga e aumai ai lagona ma manatu e uiga i lea foi tautua, i se fa’asoa mo aso faisoo, so’otaga ma le aganu’u, aemaise o le Tala Lelei.

AOTELEGA:

I le aotelega o lenei matā’upu, o lo o aumai ai lava le ata o tagata tautua tuāvae. Fa’apei ona tapena ai e Iesu mo ona so’o, ia fa’apena foi ona a’oa’oina ai i tatou.

O le tautua na fa’amaite i le alofa, o le loto fuatia ifo lelei, o le fai mea sili, o le ofoina o le ola atoa e tautua ma ‘au’auna ai, mo le manuia o tagata uma.

E faia lava e aunoa ma se i’u leo, ae na avea ai lava o ia ma ‘au’auna, na tu’u ‘ese ai lona mamalu, ae na sulu a i lona sulugatiti le ie sōloi, o le ata o le tagata pologa, o le ata manino o le ola ‘au’auna. Ina ia ola i le alofa ma ia lagona le tāua.

O le tautua e tu’u ‘ese ai mamalu ma tūlaga fa’a-le-tagata, ae avea i tatou ma auauna, e tūlai, galue punoui, aunoa ma se leo, ina ia manuia ai aiga, nu’u, mālō, aemaise o le ekalesia ma lana talalelei.

Ia avea i tatou o tupulaga ma auauna a Keriso, e faia le tautua tuāvae, tapenaina se mea lelei, ina ia manuia ai nai o tatou aiga, fa’afealofani ai nu’u, ma ia tupu ma ola ai le ekalesia pele a Keriso nei, ma e lua.

.....

ASO SA: 12 ME 2024

MATĀ’UPU: TOREKA (Aso Sa o Tinā)

TUSI FAITAU: Galuega 9: 36 – 43

FESOASOANI MO LE TA’ITA’I:

O Toreka o le so’o fafine mai Iopa. O lē isi ona igoa o Tapita. A’o Tapita i le Gagana Eperu, o le sevi. O le sevi le manu, fa’a-peretaniaina *gazelle*. E fa’amatalaina, o se manu e uiga ese le manaia o lona lanu, e o’o fo’i i ona seu, e matuā manaia lava i le va’ai. O se manu fo’i e vave lana gaiōi.

O le ata fo’i lea o lo o fa’amatalaina ai le tinā lenei o Toreka ma ana galuega lelei na fai. E lē gata i lona aiga, totonu o lana aulotu,

ae fa'apea fo'i tagata uma. Fai mai le fa'aiuga o le fuai'upu e 36, 'ua tele ana galuega lelei ma mea alofa ne ia faia.' O Toreka e i ai lana tāleni, o le su'isu'i. Na ia fa'aaogaina lana tāleni su'isu'i, tusa lava pe fa'atauva'a i le va'ai a tagata, ae ua ia fa'aaogaina e momoli ai le fiafia i loto o tagata mafatia, tagata lima vaivai, tagata matitiva, o ē lē amana'ia, o i latou e maualalo lo latou tulaga i totonu o le sosaiete o tagata. Ae tusa ai ma le tala, o i latou ia sa pito sili ona alofa i ai Toreka.

O nisi o i latou nei o lo o tā'ua i le tala, o fafine ua oti a latou tane. O isi itu'aiga tagata ia, e lē amana'ia, e tau leai so latou tulaga i totonu o le sosaiete o tagata, e fa'asinosinomia, e fa'atagataesea fo'i. A'o tagata aupito i sili lena ona tāua i galuega alofa na faia e Toreka.

Fai mai le tala, na tīgāina lenei tinā i le ma'i ma i'u ai lava ina oti ai. A'o le mea mata'ina i lenei tala, o i latou uma nei na agalelei ma faia ai e Toreka galuega fesoasoani, ua o ane ua mulumulu (*fa'atā'ele*) i lona tino, ma ua tu'u i luga o le afeafe aupitoaluga. Ua alu fo'i le fe'au ia Peteru o lo o i le nu'u o Lita, se'i alu ane e fai se galuega alofa i lenei tinā lelei. O lo latou lea fa'atāua ma le misia o lenei tinā aogā.

E alu atu Peteru, na o le fetāgisi ma u'u i o latou lima ofu tino ma ofu tetele. O galuega ia na faia e lenei tinā. E ui lava la ina oti, ae o lo o iā i latou molimau o galuega lelei na ia faia. Ua tuli i fafo i latou e Peteru, e lē o se tuli ona o le ita, ae o le tuli se'i ta'u atu ai, e lē o le iuga lea o le tagata ta'uaogāina le ola. Fai mai, ua to'otuli Peteru ma tatalo, ona toe ola lea o Toreka. O fa'amanuiaga ma le iuga lea o le tagata e alofa ma agalelei atu i tagata o lo o fia maua se fesoasoani. Lea ua toe fafagu i luga e le Atua, se'i fa'aauau ana galuega lelei, o lo o tele fo'i ni agaga e tatau ona fa'afiafiaina e tauala atu iā te ia.

AOTELEGA:

Fia ni Toreka ma ni Tapita i totonu o lenei autalavou? Ni tagata e lē fa'atuaoia le alofa, e lē fuatia ina ua muamua alofa ma agalelei

mai. E ofo fua le galuega fesoasoani. A i ai lava se to'atasi, vi'ia le Atua. Ae afai e leai, o le fe'au lea mo lenei Aso Sa, agalelei ma alofa atu i e o fia maua se fesoasoani. E lē na 'o mea alofa e ofo atu i ai, e mana'omia fo'i lau tatalo.

GALUEGA FA'ATINO: Fa'atino le tala.

Fa'amanatu: Agalelei ma alofa atu i so o se tagata, e aunoa ma sou mana'o i se tau.

.....

ASO SA: 26 ME 2024

MATĀ'UPU: E ITIITI A LEGA MEA

TUSI FAITAU: Luka 19:1-10

Tasi lenei o alagā'upu na āfua mai ia Taemā ma Tilafaigā, a'o aumau ai i Tutuila. O lē tasi aso na sama ai lagimalofie a tamaita'i nei, ua logotala 'augafa'apae o Tutuila ma Manu'a, ona o ane lea e aisi i sina lega mo i latou. Manatua foi o le lega, o le mea e fa'aaoga e sama ai le tatau pea ma'ea ona talia. Peitai e avatu i ai le lega la'ititi, ae lē malilie ai, ona o le la'ititi. Ae fai mai Taema ma Tilafaiga. "O LE ITIITI A LEGA MEA" E la'ititi ma fa'atauva'a i le va'ai, ae tele lona tāua ma lona aogā.

FESOASOANI MO LE TA'ITA'I:

E fa'apea le ata o Sākaio o lo o atagia i le tala sa o tatou faitauina. Le tala ua tele ina faitau sesē e tagata ina ua iloa, o Sākaio o le ao lafoga. A'o le ao lāfoga, o le galuega ua tele ina fa'amatala ai tagata faomea. Peita'i a tu'utu'u i le loloto lona fa'amatalaina o le tala lenei. O Sākaio o le tagata pu'upu'u sa'asa'a, e tele lona tamao'aiga toe faigaluega i le aoina o lafoga a le mālō.

Ae mai i le tele o lea tamao'aiga, e le'i nātia ai lava lagona o le fia va'ai ma mulimuli ia Iesu ina ua i ai i laufanua o Ieriko. E lē i avea foi le pu'upu'u ma le itiiti o lona tagata e taotaomia ai le fia va'ai ia Iesu. Lea o lo o fai mai ai upu nei “..auā o le tagata sa'asa'a o ia”, ole ata manino o le tagata e la'ititi, ma pu'upu'u.

Ae i le faitauga fa'a-matā'upu-silisili. O le sa'asa'a, o le itiiti o lona tino, o le ata lea o le tagata lotomaulalo. O le ata o le tu'utu'u i lalo o lou tagata, ma ta'i alalo le i'a Sā Sa'umani, e lē gata i le loto, māfaufau, a'o le tagata atoa.

A mauaulalo lou tagata e faigōfie lava ona e iloa atu Iesu, ae a e mauauluga fa'apei o tagata sa iloa atu Iesu, e lē iloa fo'i e le Alii Fa'aola. O le mea moni, o le fia maimoa lava o Sākaio iā Iesu na ala ai ona a'e i le sukamoru sei va'ava'ai.

O le ata manino o le tagata e sa'asa'a i lalo lona fa'atauva'a, ae a'e ifo lava sei va'ai i le Alo o le Atua. A lea na manino ai le fetalaiga a Iesu. “Sākaio e, ia e vave ifoifo ia i lalo, auā e tatau ona ou nofo i lou fale i le aso nei.”

Le tau'i o le so'o moni o Iesu, o le ata manino o le so'o o le Tala Lelei o lo o sa'ili e Iesu, le tagata e fa'apu'upu'u ifo. Ae ua o'o mai lava le fa'aolataga i lona aiga i le aso nei, ina ua fai Sākaio ma atalii o Aperā'amo. O le tamā o le au fa'atuatua. O lona uiga, e itiiti ma fa'atauva'a i le va'aiga fa'a-le-tagata, ae fa'atumulia i le 'oa fa'a-le-Atua ona o le fa'atuatua ia Iesu Keriso le Alo o le Atua.

FA'ATINOGA O LE MATĀ'UPU:

Manaiā ae fa'atino le tala ina ia atagia ai le uiga o lea alagā'upu ma le feso'ota'iga ma le tala ua faitauina.

Ona tu'u lea o le avanoa i tupulaga e tatala mai ai so latou manatu ma lagona e uiga lava i le matā'upu, i nisi auā e feso'ota'i ai ma le olaga o aso uma, i le aganu'u, ma le Tala Lelei.

AOTELEGA:

I le aotelega lava ia o le matā'upu o lenei Aso Sa, o le faitauga lava lea o Sākaio o se tagata itiiti, pu'upu'u ma sa'asa'a, ae a'e lava i le la'au se'i molimau ia Iesu.

O le tāua la o lea va'aiga, o le a'oa'oina lelei ai o tupulaga talavou, e lē tāua lou umi ma lou iloa atoa o mea uma, ae leai se galuega e fa'atino ai. Fa'apei o Sākaio, e itiiti a i le va'ai, ae sa'ili lava se auā e va'ai ai ia Iesu, ona o lona fia molimauina o le Alo o le Atua ua o'o mai i ona laufanua.

Ae na manino a i le finagalo o Iesu, le tele o fa'amanuiaga na maua e le tagata e itiiti i le va'aiga fa'a-le-tagata, ae na 'oa i fa'amanuiaga i le silasila a le Alii Fa'aola.

A'oa'oga sili foi lea mo tupulaga, 'auā le va'ai fa'atauva'a i lou uso a tagata, o lē isi a mea tāua, e lē silasila le Alii i le tino, ae o le loto ma fa'atinoga.

.....

IUNI:

**SUESUEGA I LE TUSI A IAKOPO MA
MANATU TALAFEAGAI MO
TUPULAGA TALAVOU**

ASO SA:

02 IUNI 2024

MATAUPU:

**O MEA LELEI UMA, E MAI LE ATUA
IA**

TUSI FAITAU:

Iakopo 1: 16 – 18

FESOASOANI MO LE TA'ITA'I:

I le soifuaga o lo o tatou soifua ma ola ai nei, e tumu i mea lelei, ma mea leaga. E tele a ina fesiligia ai lava le auai o le Atua pe a

o’o ina tutupu fa’afitauli, ae a tutupu fo’i mea lelei i le ola, ua fa’aga’etia lagona, ae galo ai le mafua’aga o ia mea.

Mea la ia o lo o sa’afi ai māfaufauga o Iakopo i le āfuaga o mea lelei uma o lo o tutupu i le soifua ma le ola.

I le vāega lenei o le matā’upu muamua o le tusi lenei a Iakopo, o lo o fa’amanino ai lava e Iakopo, le āfuaga po o le tupu’aga o mea lelei uma o i le lagi ma le lalolagi. Lea o lo o manino lava i ana upu, o mea lelei uma e foa’iina mai, atoa ma mea alofa uma atoatoa ona lelei, mai luga lava ia.

O lona uiga i le manatu o Iakopo, o ā mea lelei uma ua tupu i le soifua ma le ola o le tagata kerisiano Iutaia i lea vaiata, o lona āfuaga ma lona tupu’aga, e mai le Atua ia. Auā e alu ifo mai le Tamā o malamalama, o le malamalama fo’i lea o lo o fa’amatalaina i le Kenese, o le malamalama e fa’amatalaina ai le lelei atoatoa o mea na faia e le Atua.

Lea fo’i o lo o fa’apea mai, e lē o ia te ia se mea fa’alētūmau, po o sina liliu itiiti. O lona uiga, o i o lo o fa’amatala manino ai lava, le atoatoa o le lelei o le Atua, auā e leai se mea e fa’alētūmau ia te ia, auā e tūmau lava lona lelei ma lona alofa, e lē liliu foi.

O le āfuaga lea na finagalo ai le Atua ina ia fanau i tatou i le ‘upu moni, ma avea ai i tatou ma fa’apolopolo i lana foafoaga. Ona o Ia o le Atua e tūmau, e lē liliu, o lona alofa atoatoa na āfua ai mea lelei uma.

O lona uiga o le fa’amanatu a Iakopo, ia mausali i manatu ma lagona o tagata kerisiano uma o le Atua o le āfuaga o mea lelei uma i le ola. E muamua ia te ia, na tupu ia te ia, o ia foi na faia.

FA’ATINOGA O LE MATĀ’UPU:

Ia fa’asoa tupulaga, o lē tasi i le isi, fai paga, ona ta’i to’atasi lea ma fa’ailoa mea lelei ua tupu i le soifua ma le ola, ina ia iloa po o le a se mafua’aga o ia mea lelei, po o ni mea lē lelei foi. Ia maua fo’i ma se feso’ota’iga i le matā’upu, o mea lelei uma, e mai le Atua ia.

AOTELEGA:

I le aotelega lava ia o mafaufauga ma le matā’upu i lenei Aso Sa, o le fa’amanatu a Iakopo i tagata kerisiano Iutaia i lea vaiata, o le fa’amanatu foi lea mo tupulaga talavou, o a mea lelei uma ua tupu i le soifua ma le ola, ‘aua ne’i fesiligia lona mafua’aga, po o ai na āfua ai ia mea lelei.

Ua manino le mata o le vai, o mea lelei uma, e mai le Atua ia. O lona uiga, ia ‘aua ne’i galo ona vi’ia ma fa’afetaia le agalelei ma le alofa o le Atua ua āfua ai mea lelei i le soifua ma le ola.

.....

ASO SA: 09 IUNI 2024

MATĀ’UPU: O LE TAGATA E ‘ANA’ANA I LE UPU.

TUSI FAITAU: Iakopo 1: 22 – 25

FESOASOANI MO LE TA’ITA’I:

O le matā’upu i lēnei Aso Sa, o le a se’i sa’ili’ili ai lava po o le a se va’ai a Iakopo i le uiga ma le ata o le tagata ‘ana’ana i le upu. Ae tasi lēnei matā’upu e talanoa tele lava i totonu o le tusi paia, mai lava i tusi o le Feagaiga Tuai, se’i o’o mai lava i Feagaiga

Fou. Ae o le uiga lava ia o le ‘ana’ana pe a fa’afaigofie, o le fefe, o le mata’u, fa’alogo ma usita’i.

Peita’i, pe a silasila i le fa’amatalaina e Iakopo o le ata o le tagata ‘ana’ana i le upu moni, ua fa’atusa i le tagata ma le fā’ata. A tilotilo i le fā’ata, ona iloa lea o le manaia po o le fa’alētonu foi o ona foliga. Ae pau foi lea o le taimi e manatua ai ona foliga ma lona ata, a alu ese loa ma le fā’ata, ua galo le uiga o ona mata. O lona uiga, o le fa’amamafa o lea ata fa’atusa, o le ata lea o le tagata ua le ‘ana’ana i ‘upu ma le tūlāfono. Ua lē tūmau lona iloa i le tūlāfono, ma le a’oa’o mai o le ‘upu moni mai le Atua. Ae lē gata i lea, o lo o toe fa’amamafa mai ai fo’i, le ‘aua na ‘ona fa’alogologo i ai, ae ia fa’alogo ma savali, ma usita’i, ma ia tūmau ai.

Ma le isi foi mea tāua, e manuia le tagata e ‘ana’ana i le upu a le Atua. Ae e iloa fa’apefea le ‘ana’ana o le tagata i le ‘upu?

A lea ua manino ‘au o fala i le manatu o Iakopo, ina se’i toe fa’amanatu a ma fa’amausalī le atoaga o le ola ‘ana’ana o le tagata i le ‘upu a le Atua, ‘aua na ‘ona fa’alogologo, ae ia fa’alogo ma usita’i, savali ai, ma ia tūmau ai.

FA’ATINOGA O LE MATĀ’UPU:

Manaia lava le fa’atalanoa o le matā’upu, ina ia i ai se fa’asoa a tupulaga talavou, i so latou fo’i manatu i le fa’auigaina o le ‘upu “anaana” i le olaga fai so’o, ma le feso’otaiga ma manatu o le tusi pa’ia e pei ona o tatou talanoa ai ia Iakopo i lenei māsina. E mafai fo’i ona aumai nisi mau o le tusi pa’ia e fa’alautele ai le tāua, pe fa’alautele ai fo’i le uiga o le manatu autū o lēnei Aso Sa.

AOTELEGA:

I le aotelega o le matā’upu i lēnei Aso Sa, o lo o ua manino lava ia i le manatu o Iakopo, o le tagata e ‘ana’ana i le upu a le Atua, o le tagata lenā e lē na ona fa’alogologo ma fa’agalogalo, ae o le tagata e fa’alogo ma usita’i, savali ai ma tūmau ai lava e fa’avavau.

E lē pine lona tau mai le Atua, e pale i manuia o le Atua. Ae o le fe’au fo’i lea mo tupulaga, ina ia iloa ona ‘ana’ana i le ‘upu a le Atua, tauala mai lava lona finagalo i le tusi o le ola, o le afioga a le Atua. Ia a’ua na ona faitau, fa’alogologo ma fa’a’galogalo, ae ia fa’alogo ma usita’i, savali ma tūmau ai e fa’avavau.

O le talavou e ola ‘ana’ana i le upu a le Atua, o le tupulaga manuia lenā.

.....

ASO SA: 16 IUNI 2024

MATĀ’UPU: FA’AILOGA TAGATA

TUSI FAITAU: Iakopo 2: 1 – 7

FESOASOANI MO LE TA’ITA’I:

O le vāega lenei o le tusi a Iakopo, o lo o matuā fa’amanino ai lava le ata o le fa’ailoga tagata ma le fa’ailoga lanu i totonu o le sosaiete o tagata kerisiano Iutaia i lea vaitau. Ona o le manatu o lo o ola ai ia tagata i le ola fia tausī mamalu i tulaga o i ai i le sosaiete.

Peita’i, o lo o manino a i le manatu o Iakopo, fa’ataitaiga talafeagai o lo o fa’ailoa ai le ata manino o le fa’afitauli o lo o tupu nei. O le ata o le tagata tauoloa, ma le lē tauoloa, ua i ai

fa'atasi i se fa'atasiga. Ona tupu lea o le manatu alofa ma le fa'aaloalo i le tagata o lo o tauoloa ona la'ei, mamā, ma tulaga lelei, ae fa'atuatua'ni le vaai i le tagata lē tauoloa ma palapala ona la'ei.

O le ata manino lea o le fa'afitauli o le fa'ailoga tagata, manatu fa'apito, va'ai maulalo, fa'ailoga lanu, ma le ola le amana'ia i avanoa tutusa o tagata o le sosaiete.

O le taumafai atu la a Iakopo, ina ia fa'ailoa le tāua o le ola amana'ia o avanoa tutusa i tagata uma. Ina ia faitauina tutusa ai le alofa ma le fa'aaloalo, i le tagata tauoloa, ma le tagata mativa. Auā o le ala tonu lea o le talalelei a Iesu Keriso mo kerisiano uma. O kerisiano Iutaia, ma kerisiano o nuu ese.

Fai mai le molimau a le toea'ina, “e lē ua filita'a ea outou ia te outou lava...” O le mafua'aga lea o tutupu o nei masei i totonu o le lotoifale o tagata kerisiano Iutaia lava ia, ona o le manatu fa'apito, ma ola fa'atusatusa fa'apei o ni fa'amasino, ua taotaomia ai lava i latou i o latou lava manatu, ma ua tupu ai loa le fa'ailoga tagata.

Molimau a ia a Iakopo, ia fa'atāua le alofa ma le ola amana'ia o so o se tasi, auā o le fa'ailoga tagata, o le agasala lava ia, auā o sē tausī i le tūlāfono ae agasala i se mea e tasi, ua nofo sala lava ia i mea uma.

FA'ATINOGA O LE MATĀ'UPU:

Vaevae le autalavou i ni vāega se lua, ona fa'atalanoa lea o le matā'upu, ina ia fa'amanino ai o lo o malamalama tupulaga i le uiga moni o le fa'ailoga tagata.

Mānaia ae fa'atalanoa le matā'upu i le vaaiga fa'a-le-aganu'u ma le fa'a-le-talalelei, ina ia maua ai se vaifofo mo lea fa'afitauli mo tupulaga talavou o le ekalesia.

O le isi vāega o le fa'a-le-aganuu po o aso faiso'o, a o lē isi vāega mo le fa'a-le-talalelei ina ia feso'ota'i ma le matā'upu e pei ona finau ai Iakopo mo Kerisiano.

AOTELEGA:

I le aotelega o lēnei matā'upu, o lo o ua matuā manino lelei lava i le manatu o Iakopo, ina ia avanoa tutusa tagata uma i lau va'ai, 'aua le fa'ailoga tagata, fa'ailoga lanu, ma le ola lē amanaiaina o nai tagata lima vaivai, ae ia tutusa lou alofa i le tagata tauoloa ma le tagata mativa.

O le fe'au tāua foi lea mo tupulaga talavou, ia taofi lagona ma manatu o lo o filita'a ai o latou manatu ma lagona i le va'ai maulalo, ma le ola fa'atusatusa, i uso ma tuafāfine tauoloa ma le lē tauoloa, ae ia tutusa tagata uma i le alofa ma le fa'aaloalo.

Lē gata i le va ma uso a tagata, ae fa'apena fo'i i le ola ai i le Tala Lelei a Iesu Keriso, o lo o fai ma fu'a taualuga o le vala'auina fa'a-tupulaga talavou o le soifua ma le ola o lo o tatou ola ma tautua ai i so o se mea. Tasi lea manulauti e iloga ai le talavou ua ola ia Keriso, e lē fa'ailoga tagata.

.....

ASO SA: 23 IUNI 2024

MATĀ'UPU: MAMANU O LE FA'ATUATUA

TUSI FAITAU: Iakopo 2: 14 – 26

FESOASOANI MO LE TA'ITA'I:

O le Aso Sa lenei o lo o talanoaina ai le uiga o mamanu o le fa'atuatua, o mamanu e fa'amatalaina e le au tusiata, o ata o lo o ta'oto ai ma uiga e feso'ota'i i le aganu'u ma le agaifanua o le ta gātatau i Samoa. O nei fo'i mamanu, e momoli mai ai le uiga atoa o se ata. Pe a tu'u la i tulaga fa'a-tagata su'esu'e i le tusi pa'ia, o lo o i ai mamanu o 'upu o lo o afei ai le uiga o se matā'upu. Po o mamanu o 'upu o mamanu ai se ata atoa o se matā'upu e tasi. Fa'apei la ona talanoaina ai le fa'atuatua.

O le uiga lava ia ua māsani ai tatou i le va'aiga fa'a-matā'upu silisili i le fa'atuatua, o le talitonu i mea e lē 'o va'aia e mata. Ae o le molimau fo'i a le aposetolo o Paulo, o le fa'atuatua lava ia, o le talitonu ma le loto atoa i le fa'atuatua ia Iesu Keriso e ala i lona maliu ma lona toe tu manumālō mai i le oti ma le tu'ugamau, o le ala sili lea i le fa'aolataga. Peita'i, e lē 'o fa'apēnā le silasila a Iakopo i le uiga o le fa'atuatua.

Lea la e pei ona ta'oto i le matā'upu lenei e 2, mai i le fuai'upu 14 i le 26. O lo o matuā talatala lelei ai lava e Iakopo i lana ia fa'a-matā'upu silisiliina o le fa'atuatua, e lē iloa se fa'atuatua pe afai e lē o fa'atasi ma galuega fa'atino.

Lea o lo o aumai ai fa'ata'ita'iga. Pe afai ua lē ofu se uso po o se tuafafine, po ua lē 'ai foi ona ua leai se mea e maua ai, ae lē tali atu ai i lona mana'oga, lona uiga, e lē 'o se ata lelei lenā o se tagata fa'atuatua. O le uiga lava ia o le fa'atuatua, a fia 'ai, fia inu, po o le a lava se mea e mana'omia ai e le uso po o le tuafafine, po o so o se tagata lava se fesoasoani, ia tali atu i ai ma le atoatoa, po o sina mea ina ia fa'amalieina le mana'o, ona moni lea o le uiga o le fa'atuatua.

O lona uiga, a tu'u i sē isi itu, e mafai ona fa'alautele le uiga o le fa'atuatua, e lē gata ina talitonu, ae ia tali atu. Tali fa'apefea? Tali i le alofa ma le ola amana'ia o mana'oga o so o se tagata o fia

mo'omia se fesoasoani, po o se fa'alapotopotoga fo'i, ma se sosaiete o gapatia i le fia maua o se fesoasoani.

Auā o le molimau lenā a Iakopo, o le a se aogā o lou fai mai e te fa'atuatua ae leai sau galuega o faia ai, o lona uiga, e mate le fa'atuatua lena. O le mea moni, e iloa le fa'atuatua i galuega, ae mate le fa'atuatua pe afai e leai ni galuega e iloga ai.

O le mafua'aga fo'i lea na aumai ai e Iakopo fa'ataitaiga mai le tala'aga o le talafa'asolopito o Isaraelu, ia Aperā'amo le ulua'i Tamā o augatamā na filifilia e le Atua e fa'atupuina ai le nuu, ae o lana taulaga sa ofoina ai le ola o lona alo e to'atasi, o le ata manino lenā o le fa'atuatua e o fa'atasi ma galuega.

Ina se'i fa'amanatu i kerisiano Iutaia, le ata manino o le fa'atuatua e tataua ona ola ai le kerisiano ua talitonu ia Iesu Keriso, ma ua fa'alupeina o tagata kerisiano.

O mamanu ia o le fa'atuatua o lo o fa'ailo e Iakopo, mamanu o le ola talitonu, o mamanu o le galue, ma le faia i le amana'ia i le alofa.

FA'ATINOGA O LE MATĀ'UPU:

Mānaia ae fa'a-talanoa le matā'upu i se fa'asoa a nai fanau tupulaga talavou i le uiga o mamanu o le fa'atuatua o lo o aumai e Iakopo, fa'atusatusa i le soifua tautua fa'a-EFKS o lo o ola ai tagata lotu o le ekalesia.

AOTELEGA:

I le aotelega lava ia o le matā'upu, o lo o matuā manino lava i māfaufauga o Iakopo, o le fa'atuatua moni lava ia, e lē iloa pe a leai ni galuega. Auā a leai ni galuega, e mate le fa'atuatua, ae a fa'apea e talitonu ma le atoatoa ia Iesu ma lana galuega fa'aola ma

fa'atino ia fo'i galuega i le ola vala'auina, e lē tau mate i le 'ete lona aogā, ma lona tāua i le Atua o lenā fa'atuatua. O se fa'atuatua ua moni ma e ola fo'i.

Upu a ua māsani ai, e leotele atu galuega nai lo o upu. *“Work speaks louder than words.”*

.....

ASO SA: 30 IUNI 2024

MATĀ'UPU: LEAGA O LE LAULAFAIVA

TUSI FAITAU: Iakopo 3: 1 – 12

FESOASOANI MO LE TA'ITA'I:

O lea o lo o fa'aauau lava i vaiaso ta'itasi, le su'esu'eina o le tusi Iakopo, ma o lo o atagia ai pea matā'upu 'ese'ese o lo o agai i ai le fa'amamafa, ina ia lelei, ma sagatonu le ola o tagata kerisiano lutaia o lo o i ai i le sosaiete i lea vaitau.

O lē isi lea fa'afitauli, o le laulaufaiva, o le mea moni, tele mau o le Tusi Pa'ia o lo o tā'ua ai le mātuiā o faiga, ma a'afiaga o le laulaufaiva i le tafatolu o le ola o le tagata. Ae a va'ili'ili lelei le anofale o le matā'upu lenei a Iakopo, oka se manaia o ata fa'atusa o lo o aumai ai le malosi o ave o le laulaufaiva e femilosa'i ai mea o le ola nei.

Muamua, o le fa'agutu o le solofanua, lona lua o le va'a tele, lona tolu fai mai o le laulaufaiva o le afi, o le laulaufaiva fo'i, o le fa'aupuega o amio leaga.

O ata fa'atusa uma ia o lo o fa'amatala ai e Iakopo le ma'ema'ea o le laulaufaiva. Auā e fetosoa'ina pe femilosa'i solo e le

laulaufaiva le tino lapo'a i mea e leaga ai. E lafo le upu, ona mālōlō lea o le laulaufaiva ae ua faitauina ai le tagata i le olaga atoa. O le laulaufaiva foi o le afuaga o fe'ese'ese'iga i totonu o mafutaga, na te susunuina le filemu ina ia sasao le mumu o le femisaa'i ma le felotoa'i i lotoifale o mafutaga.

A fa'alautele foi, o le fetu'u ma le fa'amanuia e mai i le laulaufaiva, o lona uiga e fai a si ma'ale'ale ma le mata'utia o faiga a le laulaufaiva pe a fua fa'a-le-maufau i ai.

O le finau atu la a Iakopo, ia fa'aeteete i le tautalatala fai mai o le Atua, ma a'oa'o atu, ae o lo o a'afia ai le ola o tagata. Fa'aeteete i mea e tautalatala ai, ae ia mafaufau muamua ma le toto'a ona fa'alele lea.

FA'ATINOGA O LE MATĀ'UPU:

Fa'amalosia lava le tu'u o le avanoa i tupulaga se'i aumai se silafia ma se iloa e uiga i le matā'upu, i le leaga o le laulaufaiva, ma ia aumai ni fa'ata'ita'iga fa'alaua'itele o lo o latou silafia i le olaga faiso'o i aso uma, fa'a-le-aganu'u, i aiga, nuu ma aogā, ae fa'apena fo'i i le lotoifale fa'a-le-ekalesia.

AOTELEGA:

I le aotelega o mafaufauga o Iakopo, o lo o matuā fa'amamafa lava le fa'atāua ona iloa tautala, tautala i mea e tatau, ma e lelei ai mea uma, ma fa'aeteete i le tautala i mea e o'o ai le fa'alētonu i tagata. Auā o a'afiaga uma ia o le laulaufaiva, e lē gata na te femilosa'i, fa'aleaga, fa'atupu masei, e susunu, ma o'o ai lava le oti i le tagata.

O le fe'au fo'i lea mo tupulaga, fa'aeteete le tautala i mea e leaga ai le ola, ae fa'aaoga tatau le laulaufaiva e talanoa ai i le Alii, ina

ia fa'ailoa ai o oe o le talavou ua ola ia Keriso, e fa'atupuina le filēmū i aiga, nu'u, ma le ekalesia.

.....

ASO SA: 07 IULAI 2024

MATĀ'UPU: O IESU MA LE TŪLĀFONO

TUSI FAITAU: Mataio 5: 17 – 20

FESOASOANI MO LE TA'ITA'I:

O Tūlāfono na ave iā Mose, sa fai ma ta'ita'itama ia Isaraelu ina ua lata ona ulufale i le nu'u folafolaina. Ua fa'apei o se talalelei ua mae'a tapenaina e le Atua ina ia ola ai tagata o lona nu'u i aso uma. (Esoto 20:2-16). Ae peita'i, sa lē uma ai lava le ola femoumoua'i o tagata.

O le matā'upu muamua lava lea na soso'o ma fa'a-amu'ia a Iesu i le amataga o lana lāuga i luga o le mauga. Ua silafia lelei e Iesu, manatu ma lagona o le motu o tagata i le tele o tūlāfono o lo o latou tausisi i ai i aso uma. Silafia foi e Iesu, nisi o tūlāfono a Roma o lo o fa'asaga ia te ia, e fete'ena'i ma ana a'oa'oga o le a fai. Atonu o le ala foi lea na fa'amamua ai e Mataio le tūlāfono ma Iesu, ona o lo o soifua ai tagata Iutaia aemaise o le latou va feagai ai ma le latou Atua.

O Mataio o le Iutaia fa'amaoni, o le ao lafoga, e malamalama foi i le tūlāfono; o le ala foi lea e ese ai lava lana molimau i le tūlāfono. "O le o'o mai o le Atua i le olaga o le tagata talitonu", o lana lea fa'amamafa.

Manino lelei le fetalaiga a Iesu, "Aua nei o outou manatu ua ou sau e tatalaina le tūlāfono po o le au perofeta, a ia fa'ataunuuina. Aua e moni, e mavae atu le lagi ma le lalolagi, ae lē mavae atu lava se iota o le tūlāfono, se'ia taunuu mea uma".

O se fesili fiamalamalama, o a nei tūlāfono ua fetalai i ai Iesu?

-Tūlāfono a Iutaia- tūlāfono e 10 na ave ia Mose i luga o le Mauga o Sinai. 6 i le va o le isi tagata ma lona uso, ma le 4 i le va feagai o le tagata ma lona Atua.

-Ma le tele o isi tūlāfono fa'aopoopo a le Lotu Iutaia ua ola ma tausisi ai tagata Isaraelu.

-Mata i le mata, nifo i le nifo.

Tūlāfono ia e fete'ena'i ma a'oa'oga a Iesu, e pei: a po mai le isi itu o lou gutu; ia liliu i ai ma le isi itu. Lea ua taumafai Iesu e fa'ailoa atu, ua fa'ataunu'uina uma nei tūlāfono ia te ia. O lona finagalo, ia nonofo fealofani tagata uma, ma alofa lē isi tagata i lē isi tagata (Ioane 13:34-35). O le fa'amamafa lea a Iesu, ina ia vave ona talia e tagata lautele ma ola ai i aso uma o le ola.

O le itu lea o lo o fia fa'amamafaina e le matā'upu o lenei aso, O Iesu ma le Tūlāfono. Silafia lelei e Iesu, e lē mafai e se tagata ona ola ma tausisi tūlāfono i aso uma ma taimi uma o lona olaga. O le fili e lē moe e taumafai lava e fa'aoso le mana'o. O le lalolagi o fa'afitauli ma fa'aosoosoga ma filifiliga fai.

E aogā tūlāfono ina ia fai ma ta'iala i le olaga o le tagata. E fa'atonu ma fa'amanatu mai ina ia 'aua nei faia se mea o lo o fa'asaina ona faia. A'o le mea ua manino, ua taunu'u mea uma ia Iesu Keriso, ua tatou ola nei i tūlāfono fa'a-Iesu.

O le so'otaga lea o Iesu ma le Tūlāfono, ua mavae muamua atu Mose, ua toe afio Iesu i le lagi, ae o ana a'oa'oga ma tūlāfono, ina ia ola fiafia lana tagata i le lalolagi.

GALUEGA FA'ATINO:

Fesiligia le tupulaga, po o le a se latou tali atu i tūlāfono fa'a-le-nuu, mālō ma le lotu, o lo o ola ai?

- O le a se aogā o tūlāfono fa'a'Iesu?
- O fea o tūlāfono nei e faigofie ona e ola ai?

AOTELEGA:

Tupulaga talavou, o lou olaina o tulāfono fa’a-Iesu, e manuia ai o tatou olaga i le lumana’i. O le lumanai o o tatou aiga, nu’u ma le Ekalesia, o lo o i o tatou lima. E ui e ‘ese’ese o tatou nofoaga ma le vala’auina, ae tasi lava tulāfono o lo o tatou tausia ma ola ai i aso uma. E tele faigata ma fa’aosoosoga i le vaitau lenei o le mālosi o le tino, ae a tatou ola ia Keriso, e faigatā lava ona a’afia i tatou i ni fa’alavelave po o ni fa’afitauli o le olaga nei.

***Fa’amanatu:** O le a le Tulāfono sili o lo o i le Tusi Paia e tatau ona ola ai le tagata?(Mataio 22:38-40)*

.....

ASO SA: 14 IULAI 2024

MATAUPU: O LE OA NATIA

TUSI FAITAU: Mataio 6: 25 – 33

FESOASOANI MO LE TA’ITA’I:

O lo o fa’aauau pea le lauga apoapoa’i a Iesu mo lona au so’o ina ia ‘aua le sa’ili pe naunau muamua i le oa o le lalolagi nei. O le ‘Oa, o mea ia e tausiniō ai tagata uma, e ‘ave i ai le fa’amuamua ma le fa’amamafa. E mafai ona fa’apea o ma’a tāua, tupe, mafutaga tagata, tauleleia, o matāti’a ma isi. ‘Oa ia o le lalolagi o lo o tu’ualalo ai Iesu mo lona au so’o. ‘Aua le fa’aalu le aogā i ai le taimi o le tagata ae ia sa’ili muamua le mea e manuia ai.

I le fuai’upu 33, e pei o lea ua manino mai le itu’aiga ‘oa e tatau ona sa’ili i ai le tagata fa’atuatua. “A ia outou mua’i sa’ili lona mālō ma lana amiotonu; ona fa’aopoopoina atu lea o ia mea uma iā te outou”.

O se fesili fa’atupu manatu, ua lē aogā ea le ‘oa i le olaga aso uma o le tagata fa’atuatua i lenei lalolagi? E tofu lava le tagata ma lana tali i ai. E aogā ma tāua i le tagata nei mea uma, ae ia ‘aua nei ave i ai le fa’amuamua.

O le sa’iliga o le manuia mo le tagata, e lē faigofie. Ae o le telē o lou taimi e alu i le su’eina o le ‘oa, o le telē foi lenā o le avanoa o tofotofoga ma puapuagā e o’o mai i le tagata.

O le olaga o fa’alavelave o lo o tatou i ai i Samoa nei, ma atunuu o lo o aumau ai; ae o le mea sili, ua i ai se tapasā mo le tagata ua talitonu ma fa’atuatua i le Atua. E faigata ona malamalama le fetalaiga a Iesu. Ae o le mea ua manino, o lo o fetalai Iesu i le tagata o lo o taumafai, finau pea ma galue ma le talitonu i le Atua, e fesoasoani mai iā te ia.

O le ‘Oa sili o lo o talanoa agai i ai Iesu, e pei o le fa’amasinoga tonu, avanoa mo tagata uma, ia fa’atupuina pea e lē uma, ma ia alofa lē isi i lē isi.

O lona uiga, o le Atua lava e fa’amuamua i mea uma i totonu o lo tatou ola. Afai e lē mafai ona tatou auauna i ni atua se 2 i le taimi e tasi, o lona uiga, ia tatou auauna lava ua na o le Atua, e ala i le tatou taumafai e olaina i aso uma o ana a’oa’oga ma fa’ata’ita’iga o lo o tatou a’oa’oina i lenei taimi.

I le Matā’upu e 13:44 “E tusa foi le mālō o le lagi i le ‘oa ua nātia i le fanua, ua iloa e lē tasi, ona nanā ai lea e ia; ua alu foi ma le fiafia, ma fa’atau atu ana mea uma, i le fa’atau a’i ma lea fanua”

FA’ATINOGA O LE MATAUPU - Fa’atalanoaga i fesili

1. O le a le ‘Oa o lo o e sa’ilia i le taimi lenei?
2. O le a se ‘Oa sili o lo o e fia mauaina?
3. O fea e te mauaina ai lena ‘Oa?

AOTELEGA:

O ‘Oa nātia lava ua su’esu’eina, o le “Malo o le Atua”. Afai tatou te sa’ili ma mulimuli ia Iesu, e fa’aali mai lava lona alofa ia te oe

ma a'u, e ala i manuia ua tatou maua. O le ola fa'avavau lava le tau i lo o finau i ai tagata Kerisiano, ae tatou te maua, pe afai e lafoa'i ia Iesu o tatou mana'o.

Manatu mulimuli mo le Ta'ita'i:

E tāua mea uma i le olaga nei, ae ua a'oa'o mai Iesu, o le Atua lava le 'oa sili, e tatau ona maua e tagata uma. I le Isaia 45:3 – 25, e fa'apena le ata ua fa'ataoto e le Atua mo tagata uma.

.....

ASO SA: 21 IULAI 2024

MATAUPU: FA'ALOGO A LE TAGATA POTO

TUSI FAITAU: Mataio 7: 24 – 29

FESOASOANI MO LE TA'ITA'I:

O le tau fa'aiuga lenei o le lāuga a Iesu i luga o le mauga, e pei ua fa'aiu lava i perofeta pepelo, ia outou ma perofeta pepelo (f.15), e lē sao atu i le mālō o le lagi i latou uma o e fai mai, Le Alii e, le Alii e; na o lē na te faia le finagalo o lo'u Tamā o i le lagi".

'Aua tou te fa'amasino atu, ina ne'i fa'amasinoina outou. Ia outou ole atu, ona foa'iina mai ai lea ia te outou; ia outou sa'ili, ona outou maua ai lea; ia outou tu'itu'i atu, ona toina ai lea ia te outou. O nisi ia o matā'upu lautele sa fa'aiu i ai a'oa'oga a Iesu, ina ia manino ma malamalama lelei i ai tagata uma.

Fuaiupu 24 – 27, "O lenei, ai se fa'alogo i a'u upu nei, ma faia e ia, ou te fa'atusaina o ia i le tagata poto, ua na faia lona fale i luga o le papa; ona to mai lea o uaga, ua o'o mai foi tāfega, ua agi mai foi o matagi, ua pesi mai i lea fale, a e lē i pa'u lava ia; auā ua fa'avaeina i luga o le papa."

E lua ni ituaiga tagata fa'alogo o lo o tā'ua i le tala, tagata poto ma le tagata valea. Tagata sa fau lona fale i luga o le papa ma le tagata sa fai lona fale i luga o le oneone.

Molimau Paulo i le 1 Korinito 3:18-19 "Aua ne'i i ai se tasi e fa'asesēina o ia e ia. Afai ua ia te outou sē tasi o manatu e poto ia i lenei lalolagi, ia avea ia ma vale ina ia poto ai o ia. Auā o le poto o lenei lalolagi, o le valea lea i luma o le Atua.

Ae molimau foi Tavita i le Salamo 14:1 "Ua fai ifo le tagata valea i lona loto, E leai se Atua. Ua leaga lava i latou; ua inosia a latou amioga; e leai se tasi e amio lelei.

E pei o lo o aga'i tasi lava i le o'o mai o le Mālō o le Atua i le olaga o le tagata fa'atuatua o lo o i le lalolagi. I lona ola taumafai ma galue i aso uma, ae o lo o i ai pea ma le Atua i mea uma.

O le fa'alogo a le tagata poto o lo o fa'amamafa i le matā'upu, o le fa'alogo fo'i e o fa'atasi ma le usitai.

FA'ATINOGA O LE MATĀ'UPU:

Fesiligia le tupulaga, po o fea o fau ai lona fale i le taimi lenei? O a ni fautuaga a le Tusi Paia mo le tagata fa'alogo ina ia poto ai?

AOTELEGA:

E tele suiga fou ua tatou i ai i lenei vaitau. O le tele foi lea o fa'alavelave ma fa'afitauli ua tatou feagai ai. Ae o le fa'amanatu lea mo tatou i lenei Aso Sa, ia tatou fa'a'logo ma le poto. Ia tatou 'alo ese mai amio lē lelei, o Iesu lava le papa o lo tatou ola.

Fa'amanatu: O fea e sili, o le f'aalogo po o le poto?

I le Fa'ataoto 12, o lo o fesoasoani mai ai i le Matā'upu.

.....

ASO SA: 28 IULAI 2024

MATAUPU: O IESU MA AGAGA LEAGA

TUSI FAITAU: Mataio 8: 28 – 34

FESOASOANI MO LE MATAUPU:

O se tasi lenei o vaaiga fa’a-le-tagata i aso uma, o le itu i agaga leaga. O le fa’amoemoe o le autu, ina ia fia iloa po o ai e sili atu lona mālosi, po o Iesu po o agaga leaga o lo o tā’ua i le tala o lo o fa’amauina e Mataio.

Ua o’o atu Iesu ma ona so’o i le nu’u o Kerekese, ua fetaia’i ai lea ma tagata e toalua, ua ulutinoina e agaga leaga. E tulaga ‘ese lo la malolosi mai le malosi e tatau ona i ai le tagata soifua.

Ae ua iloa lelei e nei agaga leaga, e mālosi atu Iesu ia te i latou. “Se a lau na ia te i matou nei, Iesu e, le Alo o le Atua? Ua e maliu mai ea iinei, e te fa’atigā ia te i matou a o le i o’o i ona po? Ua fa’aaogaina e agaga leaga nei tamaloloa e toalua, e fa’aali mai ai lo latou malosi. Ua fesili fo’i po o ua sau Iesu e tuli ese i latou mai le nofoaga o lo o fa’amautū ai i lea taimi.

Ae ‘ese foi le mana’o o agaga leaga, lea o le a alu ese ma le tagata ua ulutino ai, ae toe mana’o e ulutino i pua’a. O le latou aunagi mulimuli lea ia Iesu, ia tu’u atu i latou i le lafu pua’a, ua feosofi i le tofe, ma mamate uma ai le lafu puaa. O se fesili, sa mamate ai la ma agaga leaga nei? E tofua a le tagata ia ma lana tali.

O le mea ua manino, o le fa’aalia o le pule aoao a Iesu i mea uma. E usitai mea uma ia te Ia. Na afio mai lava Iesu ina ia fa’aola le tagata o lo o fiaola ma mafatia i le agasala. Ua fa’a’muamua e Iesu lona alofa i le tagata na i lō pua’a fafaga a tagata.

O le mea moni, e i ai pea tagata o lo o talitonu i agaga leaga. Ae o le molimau a Esoto 20:3-4, ‘Aua nei e fai mo oe ni atua ese i o’u luma. ‘Aua e te fai mo oe se tupua ua ta, po o se fa’atusa lava o se mea o i le lagi i lugā, po o i le fanua..

O se fa’amanatu lea mo tagata uma, ina ia ‘aua nei talitonu i isi mea. Ua na o Iesu e maua ai le filemū o lo tatou ola.

]

FA’ATINOGA O LE MATĀ’UPU:

Fesiligia le tupulaga, i fa’afitauli po o ni agaga leaga sa va’ai i ai, fa’asoa ma talanoa fa’atasi ina ia malamalama ai isi tupulaga.

I le fa’a-Samoa a ia, o le ma’i aitu lava e mafai ai ona fa’aali mai se agaga leaga, aisea e māfua ai nei mea uma?

AOTELEGA:

O le lalolagi nei o lo o tatou soifua ai, o lo o filo fa’atasi tagata ola ma agaga leaga, ae o lo o muamua ma mulimuli le mana o le Atua. O le mea ua mautinoa, e mālosi lava le mana o le Atua, na ala mai ia Iesu Keriso. E usita’i mea uma i le Atua. O agaga leaga nei ua fai ma fa’afitauli ma fa’alavelave i le olaga fa’a-Kerisiano, ae ‘aua tatou te popole, ua manumālō Iesu Keriso i mea faigata uma o le olaga.

Manatu mulimuli mo le Ta’ita’i

E i ai agaga leaga o lo o i le lalolagi, ae ‘aua nei tatou atua pe fefefe i ai. O Iesu lava e malosi ai lo tatou ola fa’atuatua ma le ola galue i so o se galuega o lo o tatou i ai. E ‘ese’ese uma ituaiga nofoaga ma ona tapu o lo o tatou nonofo ai. Ae o Iesu lava le tali o mea uma.

.....

ASO SA: 04 AOKUSO 2024

MATAUPU: O LE LELEIGA

TUSI FAITAU: 1 Korinito 1:10 – 17

FESOASOANI MO LE MATĀ'UPU:

O lenei ua tatou o'o mai i le Aposetolo o Nu'u ese, le toeaina o Paulo. O lana malaga lona 3 lenei, ua fa'alogo mai Efeso, ua i ai fe'ese'esea'iga i totonu o le Ekalesia i Korinito. O le tele o fa'afitauli ua tutupu ma vaevaeina ai tagata o le Ekalesia. Ua femisaa'i po o ai e sili, po o ai foi e sa'o; ua tumu fa'amasinoga ua faia i va o tagata, ua sesē le fa'atinoina o fa'amanatuga ma le tele o le faita'aga ma le ola lē fa'apaiaina ua i ai tagata o le Ekalesia. Pei ona fa'amauiina e le au sã Keloē i le f11.

O lea na ia tūsia ai loa lana tusi muamua lenei mo Korinito. Ina ia toe fa'amanatu, fa'asa'o ma fa'amālosi i tagata uma o le Ekalesia. Ia tūtūmau i a'oa'oga a Keriso ua uma ona ia totō i loto o le Ekalesia. Ia nonofo fealofani ma ia fa'aaloalo ma alofa lē isi tagata i lē isi tagata.

O lona uiga o Paulo ua fai ma foma'i ina ia fofō ma toe aumai fa'atasi tagata Korinito i totonu o le Ekalesia. E tele ituaiga tagata o lo o aumau ai i totonu o Korinito, o sã Paulō, sã Apolō, sã Kefā ma sã Kerisō. Finauga ia ua tutupu ma vevesi solo ai totonu le Ekalesia, ma ua a'afia ai uma ai tagata.

Tolu a fesili a Paulo, po ua vaevaeina ea Keriso? Pe na fa'a-satauroina ea Paulo mo outou? Pe na papatisoina ea outou i le igoa o Paulo? O fesili ia o lo o fa'aali mai ai le naunau o Paulo ina ia i ai se Leleiga i tagata o le Ekalesia.

Ua tu'usa'o lava upu a Paulo ina ia vave ona malamalama ma iloa e tagata uma ma fai loa se leleiga i le va o tagata o le Ekalesia aemaise o se leleiga i le va o le Ekalesia ma le Atua. Ina ia foia ai fa'afitauli ua tutupu mai totonu o le Ekalesia.

O le autu lea mo lenei aso, o le Leleiga i le va tagata aemaise o le va tapuia o le tagata ma le Atua. Ia maopoopo outou i le loto e tasi ma le manatu e tasi. 'Aua ne'i i ai ni maseiga ia te outou.

FA'ATINOGA O LE MATĀ'UPU:

Fa'a-talanoa le Tupulaga i ni o latou fa'afitauli, po o le a se auala e fo'ia ai?

AOTELEGA:

Pau lava lea o le fa'amamafa a Paulo mo Korinito, ia maua le nonofo lelei ma ia fealofani tagata uma o le Ekalesia. E lē o ni a'oa'oga a Paulo, a'o Iesu Keriso lava le autū o mea uma.

E tele maseiga ma fa'afitauli o le olaga, ae o le fa'amanatu lea mo lenei aso Sa, ia malamalama lē isi i fa'afitauli o lē isi tagata, ona mafai lea ona maua ai se fesoasoani.

Manatu mulimuli mo le Ta'ita'i:

O le Leleiga i le va ma lē isi ou uso a tagata e tatau ona fa'amamama. Va'ai po o i ai se fa'aletonu po o se sesē sa e faia, e tatau lava ona e fa'amaulalo ma fa'atoese i lena tagata. O se auala faigofie ma filemu, auā e vave ona toe fa'alelei ai le mafutaga i le va tagata. Ae 'aua le faia i le malosi ma le atamai, auā e leai se mea aogā e maua ai.

.....

ASO SA: 11 AOKUSO 2024

**MATAUPU: TALAVOU MO LE ATUA
(Aso o Tamā)**

TUSI FAITAU: Failauga 11: 7 – 10

FESOASOANI MO LE MATĀ'UPU:

O le olaga lenei o le olaga o filifiliga ma fa'aiuga fai. E amata mai lava i le la'itiiti, talavou, ma fa'asolo atu ai ina avea ma tagata matua. A'o le autū ole matā'upu, o le taimi o le talavou o le soifua ma le ola. "Le taulealea e, ina olioli ia i lou tama itiiti, ia fiafia foi lou loto i aso o lou taule'ale'a, ma ia e savali i ala ua e loto i ai, ma mea e va'ai i ai ou mata; a ia e iloa e fa'amasinoina oe e le Atua ona o na mea uma"

O lona uiga, ia tatou fiafia ma olioli ina ua tatou i ai i le taimi o le tama ma le teine talavou. Ia fa'aaoga tatau le mālosi e 'au'auna ai i so o se vala'auina ua vala'auina ai lo tatou ola. O le vaitau tonu foi lenei o le ola o le tagata, e fa'aosooina gōfie ai e le fili, auā o lo o mālosi le tino ma le māfaufau. E faigofie ona fa'aosooina i tuinanau o le tino ae ua vaivai ai le itu fa'a-le-agaga.

E lē 'o mautinoa lelei le tusitala o le Failauga, pau se tau fa'amaoniga o Solomona, o lo o i le Mataupu 1:1, le atali'i o Tavita, le tupu i Ierusalem. O lona uiga o Solomona le tupu atamai o Isaraelu. I lona vaitau ua matua lona soifua, ae o lea ua fautua mai mo le tama ma le teine talavou.

E leai ma se mea e lilo i le Atua, e i ai o Ia i mea uma, o galuega, mea lilo, mea lelei atoa ma mea leaga uma. (12:14)

O le vaitau foi lenei o le olaga, e lei mautu lo tatou ola, o lo o fa'amoemoe i mātua, ma ē matutua i totonu o aiga lo tatou ola i aso uma. Latou te aumaia fautuaga ma lapata'iga lelei ina ia sa'o le auala tatou te savavali ai.

A'o le fautuaga foi lea a le Failauga, o lo o fautua fa'a-perofeta mai ina ia ola maloloina lou agaga mai le tele o fa'aosoosoga o lenei lalolagi.

Fesoasoani a le Fa'ataoto 1:8-9, Lo'u atali'i e, fa'alogi mai ia i le a'oa'o atu a lou tamā, aua fo'i e te tu'ulafoa'iina le upu a lou tinā; 'aia e fai ia mea ma pale matagofie i lou ulu, ma mea e asoa i lou ua.

O le fe'au a le Failauga, ua mae'a tapena fuafuaga silisili ese a le Atua, e sili atu nai lo le mālosi ma le iloa o le tagata. Ina ia tatou talia le mea moni, ae lē o le ola le mautonu.

FA'ATINOGA O LE MATĀ'UPU:

Fa'atalanoa le tupulaga, po o le a so latou manatu i le avea ai ma tupulaga talavou i le taimi lenei.

Fa'asoa lautele fa'afitauli, ina ia mafai ona maua se tali mai le Tusi Paia mo nisi e le o mautonu fa'aiuga e fai.

AOTELEGA:

O le ola 'au'auna i le Atua e aofia ai le alofa atu, maua'a le fa'atuatua, ma ia ola e tusa o le alofa tūnoa o le Atua. Ia tatou fiafia ma olioli ina ua avea ma tupulaga talavou i le taimi lenei. Ia tatou manatua, e tasi le taimi e avea ai ma talavou, ona o'o atu foi lea i le isi la'asaga o le olaga, ua avea ma tagata matua.

Manatu mulimuli mo le Ta'ita'i:

O lo tatou taimi lava lenei, ia fa'aaoga tatau le malosi ma le poto. A maua'a ma fa'avae lelei ia Iesu lo tatou ola talavou taumafai, e le pine le i'u i le manuia ma le fiafia ua mae'a tapena e le Atua mo tatou uma.

O tupulaga o le lumana'i o aiga, nuu ma ekalesia. E tatau ona a'oa'o ina lelei, ina ia malamalama i le tu ma le aga e tatau ona ola ai.

.....

ASO SA:

18 AOKUSO 2024

MATAUPU:

O LOU TAIMI LENEI

TUSI FAITAU: 1 Timoteo 4:11 – 16

FESOASOANI MO LE MATĀ’UPU:

O nisi ia o fautuaga fa’amalosi a Paulo i lona atalii fa’a-le-agaga o Timoteo, ina ia tausisi i le amio-Atua. Ia ‘aua ne’i fa’avaivai i le va’ai mai o tagata i lona talavou, ae ia fai o ia ma fa’ataitaiga lelei i tagata uma o le Ekalesia i Efeso ma Asia Itiiti. Ia ‘aua ne’i mapu lana a’oa’o ma fa’amanatu atu pea i tagata le tĀua o le ola fa’apaiaina ona ua i ai nisi o tala’iga sesē ua i ai i totonu o le sosaiete i lea vaitau.

O le ola fa’a-le-agaga lava o lo o fa’amamafa i ai Paulo ia Timoteo. O Timoteo o lo o ia va’aia le Ekalesia, o se ta’ita’i talavou toe laitiiti. E 3 lava ni fa’amamafa o lo o mana’o Paulo e fa’amuamua:

- (1)Fafagaina o tagata mai le afioga a le Atua.
- (2)Aoaoga o le amio-Atua.
- (3)Fa’atinoina o le galuega tala’i.

O galuega ia o lo o mana’o Paulo e fa’amanatu iā Timoteo lona tiute, ina ia ‘aua ne’i fa’avaivai pe solomuli ai. Ia fa’amuamua le Tusi Paia o lo o i ai upu ma a’oa’oga e tusa ma lona vala’auina.

E tele mea fa’afiafia o le olaga nei o lo o tĀ’ua e Paulo, pei o tupe, fa’amauuluga, o le lē usitai i mātua, fa’alata ma le amio leaga. O tu’inanau o le tino ma le ola fa’a-foliga. Nisi ia o matā’upu o lo o tu’ualalo ai Paulo ia Timoteo. A ia e maua le lotomau, fa’atuatua, fa’apalepale, alofa ma le onosai. Amioga ia e mana’o Paulo ia ola ai Timoteo.

I le 2 Timoteo 1:8, “O lenei, ‘aua e te mā i le molimau i lo tatou Alii, po o ona o a’u o lo o noanoatia ona o Ia; a ia tigā fa’atasi i tatou ona o le Tala Lelei, e tusa ma le mana o le Atua.”

O le mā o le natura o le tiapolo, o lo o tele ina maua ai tatou i le vaitaimi lenei, ‘aua e te mā, o le mea a Satani lena o lo o taotaomia ai lagona lelei o le tagata.

FA’ATINOGA O LE MATAUPU:

Vaevae i ni vaega se lua, ae fa’a-talanoa le matā’upu i nisi o autu e tatau ma aogā mo tupulaga talavou.

AOTELEGA:

O se fa’amanatu taua foi lea mo tatou talavou i lenei Aso Sa. Ia fa’aaoga lelei lo tatou mālosi ma le iloa e tautua ai so o se galuega o i ai. O lo tatou taimi lenei. ‘Aua e te fa’atali se’i e matua auā e lē iloa le mea e tupu a taeao.

O le Atua lava e taula i ai le ola o le tagata. Ia tatou galulue ma fa’amoemoe i le Atua Soifua, o Ia o le Fa’aola o tagata uma. Ia fa’ata’ita’i iā Timoteo, ua lē o le tino a’o le agaga Tatou te lē maua se fiafia moni i mea o le lalolagi. Ua na o le Atua lava le tali o mea lelei uma mo tatou.

Manatu mulimuli mo le Ta’ita’i:

O le taimi lava lenei o tatou e tapena ai mo le lumana’i. E tele tupulaga ua ma’imau le soifua ona ua sesē le fa’aiuga e fai. Ae o le tagata e to’aga i le lotu ma so o se mea e fai, e o fa’atasi lava ma le Atua.

.....

ASO SA: 25 AOKUSO 2024

MATAUPU: E LAVEA’I MAI LE ATUA

TUSI FAITAU: Salamo 13

FESOASOANI MO LE MATĀ'UPU:

Ua tagi atu Tavita i le Atua, ona ua agaleaga mai o tagata ia te ia. E i ai le Atua i mea uma. E lelei le Atua i taimi uma. E i ai fo'i le Atua i mea uma lava.

I le Salamo lenei, o le tatalo a le tagata ua matuā mana'omia se fesoasoani i le tino ma le mafaufau. Ua lē mautinoa po o le a se lumana'i o ta'oto mai ona luma, pe ola pe oti ai.

E tele ni mafaufauga o le au su'esu'e o le Feagaiga Tuai, i le mafua'aga na ala ai ona tūsia e Tavita lenei Salamo. Fai mai isi, na tusia i le vaitau na taumafai ai Apisaloma e fōua le ta'ita'iga o le faigamālō a Tavita lona tamā. Ae fai mai fo'i isi, o le vaitau na taumafai ai Saulo e fasioti ia Tavita, na tūsia ai.

O se ata o le tagata ua ia talitonu atoa i le Atua, mai le ola femoumoua'i ma faitio aga'i le ola vivi'i ma fa'afetai i le Atua. Ua fa'aalia mai ai fo'i le alofa tūnoa o le Atua mo so o se tagata. O le Atua e u'umauina pea le ola o le tagata i taimi uma, taimi le sologa lelei o le ola, ae sili ai taimi e o'o mai ai faigatā.

E 3 ni vāega ua mafai ona vaevaeina i ai le Salamo lenei:

1. O le va tagata o Tavita ma lona Atua.
2. O le mautinoa o le fa'amoemoe.
3. O le va ma lē ua ita mai.

E fa'a-fa ona tā'ua le se'ia afea? O le fesili o le fia mautinoa o le fa'amoemoe ina ua lē manino i le tulaga ua i ai lona saogalemu mai le isi tagata o lo o ita mai ia te ia. Lea ua tagi ai i le Atua mo lana pupuiga i lona ola.

FA'ATINOGA O LE MATĀ'UPU:

Pule lava le Ta'ita'i i le faiga e malamalama atili ai le tupulaga i le Atua e lavea'i mai lo tatou ola.

Fesili- E te talitonu, e lavea'i oe e le Atua i se taimi?

AOTELEGA:

O le tatalo a le tagata ua mana'omia le fesoasoani mai o le Atua ia te ia mo se lavea'i. O se fa'ata'ita'iga foi lea mo i tatou uma. O a lava mea o lo o mamafa i o tatou loto, ia ole atu i le Atua e ala i le tatalo. Fa'asoa atu i lē isi ou uso po o lau uo ni mafatiaga ua o'o mai. Ia tatou manatua pea, e i ai lava le Atua i mea uma tatou te faia. E fesoasoani mai lava o Ia ia te i tatou uma.

Manatu mulimuli mo le Ta'ita'i:

O le Atua lava ia o le Atua e lavea'i tatou uma mai le leaga. Ae e taui foi le tagata ma lana e fai. O le alofa fa'aali tino mai o le Atua e ala ia Iesu Keriso, lona Alo pele e to'atasi, o le atoaga lea o le fa'aolataga mo tagata uma. Tatou te mauaina lea fa'aolataga, pe afai e moni lo tatou ola taumafai ma tautua i so o mea, i le loto maulalo ma le fa'atauvaā.

.....

ASO SA: 01 SETEMA 2024

MATAUPU: O LE GALUEGA FA'A-LE-AUTALAVOU (Aso Sa o le Tala Lelei)

TUSI FAITAU: Luka 10: 29 – 37

FESOASOANI MO LE MATĀ'UPU:

O se tasi lenei o fa'ataoto o lo o fa'amauina e Luka, ua fa'aalia ai le naunau o Iesu ia iloa e le tagata ona alofa atu i le tagata e maulalo lona tamao'aiga ma fa'atauvaā i totonu o le sosaiete, le

tagata mativa. A’o le tatou tusi faitau, ua a’afia le tagata ese, ae po o ai fo’i na alofa i ai.

O le tali lenei a Iesu na fai aga’i i se a’oa’o tulāfono po o se loia Eperu, na fesili ia Iesu. Pe fa’apefea ona ia maua le ola fa’avavau? Tali manino lava Iesu o lo o i le f27. Ae toe fesili fo’i, po o ai foi lona tuaoi?

Tali Iesu i le isi foi tala malie, tagata na alu malaga mai Ierusalem i Ieriko, maua e le au faomea i le ala, fao ana mea ma fasi ia te ia, ma fa’ataatia i le auala. To’atolu tagata na o mai, sau le ositaulaga, e ‘alo’alo mamao. Sau le sa Levī, e lē ‘i fia fesoasoani fo’i, ae sau le tagata ese na te leiloaina lenei tagata puapuagatia, ma ua alofa ma fesoasoani loa i ai.

O le fe’au autu o lo o momoli mai e lenei tala, tusa lava po o le a lau aganu’u, lotu ma lou matua o lo o i ai, ia tatau lava ona e alofa atu i so o se tagata o lo o mana’omia le fesoasoani. Po o le a foi se tulaga ma se tofi o lo o e i ai, ia alofa atu i lē ua fia ola.

O le upu fa’a-Samoa, o le uō mo aso uma, ae o le uso mo aso vale. Ae fetalai Iesu, o le tagata e faia le finagalo o le Atua, o lona uso ma lona tuafafine lea tagata.

Galuega fa’a-le-Autalavou e lē faigofie. O o tatou nafa ma tiute i totonu o aiga ma le ekalesia, ua fa’apei o se galuega fa’a-perofeta o lo o fai. Ia faia e tusa ma le mālosi ua i ai, ma ia faia e tusa o a’oa’oga a Iesu.

Fa’atinoga o le Matā’upu:

Fa’atalanoa ma fesiligia le sui ta’itoatasi i sona finagalo o lo o i ai, ina ia tatala ai le matā’upu mo tagata uma.

E i ai nisi a’oa’oga mo Tupulaga o lo o i le Tusi Paia?

AOTELEGA:

O le galuega fa’a-le-Autalavou e lē fa’asino i se mea e tasi. Ia maua ai pea le onosa’i ma le fa’apalepale i so’o se vala’auina o lo

o i ai tatou uma. Ia ‘aua nei gata le va’ai i le tagata e māsani i ai, ona fa’atoa fesoasoani lea i ai. Ae ia tatou fa’ataitai i le Samaria agalelei o lo o molimau ai le fa’ataoto. E lē faigofie ae ia tatou taumafai e fai, ona iloa ai lea o le lelei.

Manatu mulimuli o le Ta’ita’i:

O le tasi lenei o Itutino tāua o le Ekalesia, ia tatou faia ma le loto maualalo ma le onosa’i. E tele fe’au ma galuega a le tagata o lo o fai, ae ia fa’aavanoa sina taimi e fai ai se tautua i le Atua ma lana galuega.

.....

ASO SA: 08 SETEMA 2024

MATĀ’UPU: TU’U LE FA’A-TAMAITITI, AE FA’A-TAGATA MATUA

TUSI FAITAU: 1 Korinito 13: 11

FESOASOANI MO LE MATĀ’UPU:

O le tatou matā’upu i lenei Aso Sa, o lo o fa’atusaina ai lo tatou ola fa’a-le-agaga, i le suia mai i le olaga fa’a-tamaitiiti e avea ma tagata matua.

E masani lava ona fa’alogoina i fautuaga a faifeau, mātua ma e matutua mo tatou tupulaga talavou, *IA TU’U LE FA’A-TAMAITITI, AE IA FA’A-TAGATA MATUA.*

O se fiafiaga tele i mātua le fa’alogoina i se tamaitiiti pepe, ua amata ona memumemu se’ia o’o lava ina matala le tautala. A’o se popolega fo’i i mātua, ina ua fa’asolosolo ina matua le tamaitiiti, ae lē ‘i matala lava le tautala. E fa’apēnā lo tatou ola fa’a-le-agaga tupulaga talavou. Se a le aogā o le tō’a’aga i le lotu, o a’oga a Autalavou ma fautuaga a mātua, ae lē mafai ona suia lau amio, suia lou olaga ma ‘upu e te tautala ai?

O le suia o 'upu e tautala ai, ma le amio e amio ai, o lē tasi lea fa'ailoga e iloa ai le talavou ua fa'a-tagata matua ma ana mea e fai. Ua a'oa'oina lelei. Ua telē le mafaufau. Ua lē 'o toe mafaufau fa'a-tamaitiiti.

Fai mai le Aposetolo o Paulo, a'o tamaitiiti, o ana mea uma lava na fai, e iloa ai lava o ia o le tamaitiiti. Ae ina ua avea ma tagata matua, ua tatau ai ona ia ave'ese le olaga fa'a-tamaitiiti, ae ola e tusa ma le matua ua i ai. E tusa ma lona manatu, e matuā matagā ma ta'uvalea, a'o upu fo'i ma tala e fai i se tagata ua matua, a'o lana amio ua lē tutusa ai lava.

GALUEGA FA'ATINO: Su'esu'ega i le Tusi Pa'ia

Vaevae le autalavou i vāega e 3. Fai se su'esu'ega i le tusi pa'ia, po o a ni uiga fa'a-tamaitiiti o lo o tā'ua ai.

Vāega 1: Tautala fa'a-tamaitiiti.

Fa'ata'ita'iga: e aofia ai le tautala i 'upu sa; 'upu fa'amaualuga; 'upu mimita; ma isi.

Tusi Faitau: Efeso 4: 29; Iakopo 1: 26; Mataio 12: 36-37; Efeso 5:4

Vāega 2: Manatu fa'a-tamaitiiti.

Fa'ata'ita'iga: e manatu fa'apito mo ia lava; fia iloa ma mimita; fa'amaualuga ma va'ai maualalo i isi; e 'ai'ū; ma isi.

Tusi Faitau: Kolose 3:2; 1 Korinito 10:24; 2 Timoteo 3: 2-5

Vāega 3: Filifiliga fa'a-tamaitiiti.

Fa'ata'ita'iga: ola tautu'ua'i solo le leaga; e lē to'a e fai se fa'aiuga talafeagai; fiafia e fa'alologotala; vevesivale solo; ma isi.

Tusi Faitau: 1 Korinito 14: 20; Fa'ataoto 25:8; Fa'ataoto 12:16.

AOTELEGA:

O nisi na o uiga fa'a-tamaitiiti, e lē tatau ona toe atagia i se talavou. Ia sui le amio, sui fo'i upu e tautala ai, mai le leaga i le lelei, ona ta'umatuaina lea o lou talavou. Manatua, e ese le fa'a-tagata matua, ese le fia matua.

Fa'amanatu: E inosia le talavou ae fia laititi, a'o le talavou ae fa'a-tagata- matua, e vi'ia ma ta'uileleia.

.....

ASO SA: 15 SETEMA 2024

MATĀ'UPU: O LE OTI FA'A-MĀTURO

TUSI FAITAU: Galuega 7: 54 – 74

FESOASOANI MO LE TA'ITA'I:

O le oti fa'a-māturo, o le oti sauāina ona o Iesu. O le oti e māfua, ona o le fa'atuatua ma le talitonu ua maua'a i le Keriso Toe Tu. Tusa lava po o le a le fa'afefefefe mai o le oti, e tumau pea le molimau i le Keriso Toe Tu.

O le ituaiga oti lea na oti ai Setefano, o lo o tā'ua i le tusi faitau. E lē 'i avea le tau fa'amata'u mai o le oti e suia ai lana molimau i lona Atua. Sa tūmau pea lona talitonu ma lona fa'atuatua. A'o lē 'i tau'ai Setefano i ma'a ma oti ai, e fa (4) lava va'aiga na iloa ai.

(1) Ua tumu o ia i le Agaga Pa'ia. O le fa'atumuina lea o ia e le Agaga Pa'ia, na lē fefe ai i se mea e tasi.

(2) Ua pulato'a i le lagi. O le ata va'aia lea o le tagata, ua tu'u tasi i le Atua lona ola ma lona fa'amoemoe. Ua lē toe fa'alavelaveina lava i se mea o le lalolagi.

(3) Ua ia iloa atu le pupula o le Atua, ma Iesu o lo o tu i le itu taumatau o le Atua. O le taunu'uga lea o lana molimau tumau, e ui lava i faigata ma fa'afitauli o lo o la fetaia'i. O lona iloa atu o le silisili ese o le Atua ma lona Alo o Iesu Keriso, o le fa'ailoga o lona sauni e feiloa'i ma lona Matai, i le ola e fa'avavau.

(4) Lana ta'utinoga. E lē gata na ia iloa atu le silisili ese o le Atua, ae na ia ta'utino fo'i. O le fa'amoemoe lea mo le au kerisiano uma, 'aue ne'i na ona iloa ma nofonofu, ae iloa ma fa'ailoa atu, ina ia fai ma fa'amalosia'u i isi fo'i o puapugatia ona o le Keriso Toe Tu.

Fai mai le tala, na avea le oti fa'a-māturo o Setefano, ma ala na fa'atuputeleina ai le Ekalesia Kerisiano. Ua lagona le misialofa o le to'atele o tagata ma i'u ai lava ina liliu o latou loto faigata e avea ma kerisiano talitonu. Ua taunu'u ai le mau a se tasi fai matā'upu silisili o le tusi pa'ia ia Tertullian, fa'apea, *the blood of the Martyrs is the seed of the church*. O le toto o ē na feoti fa'a-māturo, ua avea ma fatu na tupu a'e ai le Ekalesia. O sē tasi o nei tagata liliu, o Saulo, o le tāofi'ofu, o ia lea na taofia ofu o Setefano i le taimi o lona fa'asalaga. Lea na liliu ma avea ma Aposetolo o Nu'u Ese. O 'ofu o le fa'ailoga o le mamalu. O lona līua la e avea ma kerisiano, o lona taliaina lava lea o le mamalu o le Atua e ola ai.

AOTELEGA:

I totonu lava ia o lo tatou lotoifale, ua lē 'o toe sauāina kerisiano i nei aso i le tino, a'o le mea mautinoa, o lo o sauāina pea i tatou e le ti'apolo, o fa'afitauli ma luitau, o faigata fo'i ma fitā o le ola. A'oa'o mai le tatou matā'upu i lenei Aso Sa, ia tūmau pea la tatou molimau i le Keriso Toe Tu. Na te lē tu'ulafoa'i lava i lo tatou ola vaivai. Ia fa'atumuina i tatou e le Agaga Pa'ia, ona tatou lē toe fefefe lea i se mea e tasi. Ia tau fo'i o Keriso e taula'i ai la tatou va'ai, ona tatou iloa lea o lona silisili ese, ma ia tatou fa'ailoa atu ina ia fa'amalosia mai ai ma isi talavou o tau fa'avaivai.

Fa'amanatu- Tumau pea i le Atua e manuia ai.

.....

ASO SA: 22 SETEMA 2024

MATĀ'UPU: TOE TIMATA LE UPEGA

FESOASOANI MO LE TA'ITA'I:

Ta'oto ia le mafua'aga o lenei fuaitau ua fai ma matā'upu o lenei Aso Sa, auā e tala lasi Samoa. Ae fia fa'amamafaina lona uiga. E masani lava ona fa'alogoia fa'aupuga nei, pei ona fai ma tatou matā'upu; *toe ti mata le upega; toe sasa'a le fafao; toe afua se taeao fou*, i taimi o tima'iga. Aemaise lava pe'a o'o ina ave se fautuaga ona o se sesē ua fai. O le fa'amoemoe, *ia aogā mea e tutupu, e toe fuata'ina ai le ola*. Ia aogā le sesē e fa'asa'osa'o ai le lumana'i.

➤ **Ioelu 1: 1-7**

O le tau'alaga a le perofeta o Ioelu, e momoli se lapata'iga i tagata o le nu'u o le Atua, ina ia nofo sauni ma tāpenapena ina ne'i o'o mai le Fa'amasinoga a le Atua, ae o lo o faia pea le agasala. O le tau'alaga ina ia toe timata le upega o le ola fa'a-le-agaga. Afai lava e lē suia, o le iuga lava lea, e fa'aumatia e le autau a sē. O lo o fa'amatalaina le ese'ese o ituaiga sē ae tasi lava lo latou fa'amoemoe, e fa'aumatia tagata agasala. O se vala'au e toe fa'asa'osa'o mea ua sese. Toe faufau se isi amataga fou.

➤ **Fa'amasino 2: 11-23**

O lo o tā'ua ma fa'amatalaina ai le mamanu (*pattern*) na ola ai le nu'u o le Atua i taimi o Fa'amasino. E fa'atusaina i se fa'ata'amilosaga. Agasala le nu'u ona o le ifo i tupua; aumai e le Atua le nu'u e fa'asala le nu'u, salamō le nu'u ma tagi i le Atua; ona fa'atuina lea e le Atua o le Fa'amasino e fai ma lavea'i;

filemu lea o le nu'u; mavae atu lenā Fa'amasino ae toe fo'i le nu'u i le agasala, ma fa'apenā ai lava ona fa'aauau le fa'ata'amilosaga lea. A'o le manatu e fia fa'atāuaina, o le fa'atuina e le Atua o le Fa'amasino e fa'ato'ilalo fili o le nu'u, o iinā o lo o atagia ai le galuega timata. Toe fa'amanatu ia Isara'elu le Atua na latou osi feagaiga. Toe fa'amanatu i ai le alofa o le Atua ia te i latou. O le fa'amoemoe, ia toe fuata'ina le ola. Lafoa'i loa tupua, ae mulimuli i le Atua.

FA'ATINOGA O LE MATĀ'UPU: *Sa'ili'iliga i le Tusi Pa'ia.*

Vaevae le autalavou i vāega se lua.

Fa'amatala le uiga o le fuaitau ua fai ma matā'upu. Fai se sa'ili'iliga i le tusi pa'ia, po o i ai ni tala po o ni mau e atagia ai le tatou matā'upu. A ma'ea ona tu'u fo'i lea o le avanoa i vāega ta'itasi, i so latou sui se to'atasi e fa'aleoina le latou sa'ili'iliga.

AOTELEGA:

Talavou, afai ua fa'alētonu le gasologa o le ola, 'aua le nofonofo i le fa'aletonu ua i ai. Ae toe timata le upega. Toe faufau se isi taeao fou. Ia aogā mea e tutupu, e poupou ai le lumana'i. E alofa mai pea le Atua, ma tu'uavanoa mai. Ae fa'amolemole, 'aua ne'i fa'atuai, auā e telegese lona to'asa, ae o'o mai lava. *Fa'amanatu: Salamō ma fo'i i le Atua manū o maua lou avanoa.*

.....

ASO SA: 29 SETEMA 2024

MATĀ'UPU: FA'ATŪMAUINA LE OLA
FETAUSIA'I

TUSI FAITAU: Mataio 22: 34 – 40

FESOASOANI MO LE TA'ITA'I:

O le ola fetausia'i, o lē isi lea tu ma aga fa'a-Samoa moni. E atagia ai le alofa fa'amaoni o lē isi i lē isi. E iloa ai le nofo lelei ma le fealofani o tagata o le sosaiete. O le fa'afitauli ua tupu i nei aso, ua tau leai se ola fetausia'i, ua malosi mai lava le mafauauga, ua ola lava le tagata ia ma lona to'alua ma lana fanau. Ua fa'asolo ina fāoa e tu ma aga fa'aonaponei le ola fetausia'i na fa'avae ai le nofo lelei ma le fealofaniga o aiga, nu'u ma ekalesia i na aso. Lea ua tele ai ina oia le va nonofo, le va o mātua ma fanau, o le tuagane ma le tuafafine ma lē isi uso i lē isi, ma ua lē toe maua ai le nofo lelei o tagata. E i ai fo'i le manatu, e moni o lo o i ai pea le ola fetausia'i, a'o lona lave, e lē moni ma fa'amaoni le fa'atinoina. E alofa i le va'aiga o mata; e alofa na 'o laugutu; e alofa ona ua alofa mai; alofa ona o le fia vi'ia.

A'o lea ua fetalai manino Iesu, pei ona i ai le tatou tusi faitau, 'e te alofa atu i le Ali'i lou Atua ma lou atoa, ma lou agaga atoa, ma lou manatu atoa. E te alofa atu i lē lua te tua'oi, ia pei o oe lava ia te oe. '

O lo o amata le a'oa'o mai o Iesu, i le muamua e alofa i le Atua. O le mafua'aga lea o le alofa i so'o se tagata. Le alofa fa'a-le-Atua (*agape*). A talanoa loa i le alofa o le Atua, ua tatou talanoa i lona alofa tunoa. Le alofa e lē fa'atuaioia, le alofa fa'amaoni, le alofa tu'uavanoa, le alofa fa'amagalalo ma isi lava uiga lelei o le alofa o le Atua. Le alofa lea, o lo o finagalalo le Atua, ia maua uma e tagata. Ia lē gata ia alofa i le Atua, ae ia alofa fo'i i lē isi tagata. A maua le alofa lea, ona fa'atumauiina lea o le ola fetausia'i i totonu o aiga, nu'u, ekalesia, so o se fa'alapotopotoga ma le atunu'u.

FA'ATINOGA O LE MATĀ'UPU: *FA'AALIGĀ MANATU*

Fa'atalatalanoa le Matā'upu.

Tu'u le avanoa i sui ta'ito'atasi o le autalavou, e fa'aalia ai o latou manatu i le matā'upu.

Ua tu'uina atu i lalo fesili fa'atupu manatu, e fua aga'i i ai manatu fa'aalia.

Ia uma ane le matā'upu, ua i ai ni a'oa'oga tāua ua maua mai ai.

Fesili fa'a-tupu manatu

1. O le a le ola fetausia'i?
2. A aunoa ma le ola fetausia'i, o le a se va'aiga i le si'osi'omaga o tagata?
3. O a ni auala e fa'atūmauina ai le ola fetausia'i?
4. A fa'atūmauina la le ola fetausia'i, o le a se va'aiga i le si'osi'omaga o tagata?
5. A'o le a se feso'ota'iga ma le tusi faitau o le tatou matā'upu i lenei Aso Sa?

AOTELEGA:

O se fa'amanatu fo'i lea mo le tatou autalavou i lenei Aso Sa, o le ola fetausia'i i totonu o le autalavou, o le ola fealofani ma le galulue fa'atasi. E moni o lo o fealofani ma galulue fa'atasi, a'o le fa'afitauli, e lē atoatoa, e lē moni ma fa'amaoni lona fa'atinoina. A tatou ola i le alofa o le Atua, o le a maopoopo ma manuia a tatou fuafuaga uma. O le a tūmau pea le nofo lelei ma le fealofani o tupulaga o le ekalesia ma le nu'u.

Fa'amanatu: Tatou taumafai e olaina le alofa fa'a-le-Atua.

.....

ASO SA: 27 OKETOPA 2024

MATĀ'UPU: TOE FO'I I LE AMATAGA

TUSI FAITAU: Isaia 55: 6 – 9

FESOASOANI MO LE TA'ITA'I:

Ua autausagā o nofo pologa Sā Iutā i Papelonia. Peita'i ane, lea ua matala noataga o le pologa, ina ua fa'ato'ilalo e Kuresa ma le mālō o Metai ma Peresia le malosi o Papelonia, ma se'e ane e pulea Sā Iutā i le TLM 539. O le amataga o le latou nofoa'iga, na maua ai le avanoa fa'a-auro, e toe 'ainā ai Ierusalemā le aai e pele i loto o le nu'u, ua leva ona tu'ulafoa'iina ma fa'atāfunaina. A'o lea ua toe maua le avanoa e toe fo'i i Ierusalemā e toe atia'e.

Aepeita'i, ua vaeluaina le filifiliga a tagata o le nu'u o lo o fa'aaunu'ua i Papelonia. Ua fa'afaigatā ona toe foi i Ierusalemā. O ai a toe fia fo'i i tua e toe amata mai ai le ola? Le aai ua leva ona tu'ufua ma soloia ona pa. A'o lea ua mautū aiga, o fale ma fanua, o fa'ato'aga ma lafumanu, o pisinisi i Papelonia. O le a la se isi mea? Ua lē toe fia fo'i se isi i Ierusalemā, ua sili atu le matagofie ma le fe'ilafi o le tamaoaiga i Papelonia.

Lea la e alaga ai le perofeta o Isaia, pei ona i ai le tusi faitau o le tatou matā'upu o lenei Aso Sa. Pe foliga mai i le finagalo o le perofeta, '*Sā Iutā, a i ai ni tou alofa, ia fo'i Sina i futu.*' O le toe fo'i i Ierusalemā, o le toe fo'i lava lea i le Atua. Toe fo'i i le Amataga, o le Atua lea. Lafoa'i uiga o Papelonia ua pēsia ai o outou ola ma ona atua, ae toe fo'i i le Atua manū o mafai ona maua o Ia, na te fa'amagaloina fo'i a outou agasala. O le Atua e finagalo i mea e manuia ai le tagata, a'o le tagata e loto i mea a le lalolagi, e mavae ma pala. O le uiga lea o le tala a Isaia, e fa'apei ona sili ona maua o le lalolagi, e fa'apēnā le 'ese'esega o le finagalo o le Atua ma le tagata.

AOTELEGA:

O se fe’au toe fa’amanatu lea mo le tatou autalavou i lenei Aso Sa, toe fo’i i le amataga. Toe fo’i i le Atua e te manuia ai. Tu’u ese ma lafoa’i uiga fa’a- Papelonía, ae toe fo’i i le ola tatalo, ma mafuta i le Atua i taimi uma. ‘Aua le se’etia gofie i le matagofie ma le felanulanua’i o le lalolagi, ona galo lea o lo tatou amataga.

Fa’amanatu: Tautuanā lo tatou Amataga.

.....

ASO SA: 03 NOVEMA 2024

MATĀ’UPU: A’OA’OGA MAI LE LOI

TUSI FAITAU: Fa’ataoto 6: 6 – 11

FESOASOANI MO LE TA’ITA’I:

O le Tusi o Fa’ataoto, o le tusi a le Poto. Ua tatou talia lautele lava o Solomona na tusia. O le tagata ua ia silafia lelei le ituaiga ola e ola ai i taimi o le sologa lelei ma taimi o faigata. Lea la ua ia aumai ai se fautuaga mo tupulaga o lona nu’u, po o le a le ituaiga ola e ola ai e maua ai manuia. O le fautuaga fo’i lea mo le au kerisiano, fa’apea tupulaga talavou o nei aso.

O le loi, o se iniseti e tau lē iloa e mata. A’o lea fai mai le Poto, e leai sona ta’ita’i, po o sē pule ia te ia. Na te fa’aputu ana mea’ai i aso uma, a o’o mai aso leaga ona mālōlō lea ma fa’aaoga.

O nisi nei o a’oa’oga ua maua mai i le olaga o le loi:

➤ **Galulue fa’atasi mo se fa’amoemoe lelei.**

A tatou matamata lelei i galuega a le loi, e seāseā va’aia o galue mo ia. E masani ona tatou va’aia se laina umī a loi, e feavea’i ai meaai latou te maua. E pasi mai e lē isi i lē isi, se ia o’o lava ina

taunu’u i le nofoaga o lo o fa’aputu ai a latou meaai. O le fa’amoemoe fo’i lea mo tatou tupulaga talavou, ia galulue fa’atasi e atia’e lea itutino o le ekalesia, e ala i le autalavou. A galulue fa’atasi, e mautū ma manuia taumafaiga uma, ae a felotoa’i ma ese’ese loto, e lē i’u lelei se fa’amoemoe.

➤ **Galue tusa lava pe leai se ta’ita’i.**

O lo o manino lelei i upu a le poto, o le loi e leai sona ta’ita’i po o se isi e pule ia te ia. Ae galue lava ia, e lē fa’atalitali i se fa’atonuga, e lē seiloga e fai atu se tala fa’atoa minoi lea. O lea fo’i se fe’au mo i tatou tupulaga. ‘Aua seiloga e i ai le faifeau po o ai lava, fa’atoa galue fa’amaoni lea. O le fa’afoliga le mea na. Galue lava ma le loto mamā o lo o silasila mai le Atua.

➤ **Galue ne’i o’o mai aso leaga.**

O le natura o le loi, e fa’aputu ana meaai i aso o le lagi lelei, a o’o mai aso leaga, ona mālōlō lea ma fa’aaoga ana meaai. E fa’apēnā fo’i lo tatou ola fa’a-le-agaga, fa’aputu le ‘oa fa’a-le-agaga, auā a o’o mai puapuaga ma faigata o le ola, ae o lo o mau pea le to’ovae, ma mau taga e ai i vasa. Ae leaga le o’o mai o itu aso fa’apea, ae e lē ‘o tapena ma sauni.

FA’ATINOGA O LE MATĀ’UPU:

Vaevae le autalavou i ni vāega se 3.

Taumafai e fa’amatala le olaga o le loi, po o a fo’i ni a’oa’oga tatou te maua mai ai.

GALUEGA FA’ATINO: Tusigā Solo

A ma’ea, tofu vāega e 3 ma le solo, fa’atatau i a’oa’oga na latou maua mai le loi.

4 fuai’upu o le Solo ta’i 8 laina.

AOTELEGA:

Tupulaga talavou, ia galulue ma le fa'atuatua i le Atua. A leai se galue ma le fa'atuatua, e leai foi se galulue fa'atasi, e fiafia i le ola fīfīlēmū, paiē ma le fa'apalapala. A ia galulue ma le mautinoa, e fa'amanuia mai le Atua. E leaga le iloa e le loi o se iniseti fa'atauva'a i le va'ai o le mea e tatau ona fai, nai lo le talavou malosi ae lē mana'o e tigaina.

Fa'amanatu: Galue manū o ao.

.....

ASO SA: 10 NOVEMA 2024

MATĀ'UPU: AVE UMA

TUSI FAITAU: Mataio 26: 6 – 13

FESOASOANI MO LE TA'ITA'I:

Ua tatou i ai i lenei vaitau o Faigātaulaga a le Ekalesia. Ae o se fe'au toe fa'amanatu mo le fa'atinoga o a tatou taulaga ua faia mo le Atua. Auā tasi lenei matā'upu o lo o tele ina faitioina ai le ekalesia ma ana faigātaulaga.

Pei lava ona manino ma malamalama le fa'avae ma le fa'apogai o le soifua fo'ai a tagata lotu a le ekalesia, ina ua tatou lagonaina le alofa tūnoa tele o le Atua, lea na ia aumaia ai lona Alo pele o Iesu Keriso, e fa'amagaloina a tatou agasala. O se fa'ata'ita'iga sili o se foa'i ua ofo mai ma le atoatoa. E tatau fo'i la ona tatou tali atu i le ofoina atu o mea atoatoa mo ia, e ui e lē tusa ai, ae tau ia o se mea e iloga ai lo tatou loto fa'afetai ona o le taulaga sili na saunia e Iesu Keriso.

O le tatou tusi faitau, o le tala lauiloa i le tinā e lē 'o tā'ua se igoa, ma lana fagu alapasa ua tumu i le u'u manogi taugata na ia u'uina ai Iesu. O se fa'atinoga na tīgā ai loto o le au so'o. Auā e tusa ma

lo latou manatu, ua ma'uma'u le u'u manogi, e fa'avae i le talitonuga o faiaoga Iutaia po o Rapi, e 2 lava galuega lelei:

- (1) O le fo'ai mo e matitiva.
- (2) O le u'uina o tino o tagata maliliu.

O lo o iloa ai ii, ua leva na mafuta so'o ma Iesu, ae latou te le'i lagonaina lava le alofa mo Ia. A'o lea ua sau le fafine lē igoā fai le galuega lelei mo Iesu. Ua lava le lē tā'ua o sona igoa, e iloa ai o se tinā maualalo lona tulaga i le sosaiete o lo o ola ai. O lana lea faigātaulaga mo Ia.

E 2 lava mea e iloa ai le tulaga ese o le foa'i a lenei fafine.

1. O le fagu alapasa ua i ai le u'u manogi taugata. E mafua ona taugata lenei u'u, ona e lē maua gofie la'au o lo o gaosi ai le suau'u. E lē gata e lē faigofie lona gaosiga, a'o le tele fo'i o mea manogi o lo o gaosi ai. A'o le mea mautinoa fo'i, o se u'u ua leva ona teu ma fa'apelepele i ai.

2. O le fa'atinoga o lana foa'i, fai mai na liligi uma. E lē i fa'atotoe e le fafine se mea. O le fa'aailoga o se foa'i ua faia ma le loto atoa, ina ua ia lagonaina le alofa o le Atua ia te ia. E lē 'i fa'aleogalua lava le fa'atinoga o lana foa'i, ae na ave uma.

AOTELEGA:

O le fautuaga fo'i lea mo tatou o tupulaga talavou, po o le a lava lau foa'i e faia mo le Atua, ia faia ma le loto atoa. E lē o le ave uma o mea ua e maua le uiga o le matā'upu, ae o le foa'i e faia ma le loto malie, ma le loto fuatiaifo lelei. Ofo ma le loto atoa.

Fa'amanatu: Foa'i ma le loto atoa, e fia silasila i ai le Atua.

.....

ASO SA: 17 NOVEMA 2024

MATĀ'UPU: 'ESE'ESEGA O FEAGAIGA

TUSI FAITAU: Feagaiga Tuai (Old Covenant)
- Kenese 17: 1 – 14; Esoto 6: 1 – 8.
Feagaiga Fou (New Covenant)
- Ieremia 31: 31 – 34.

FESOASOANI MO LE TA'ITA'I:

O Isara'elu o le nu'u filifiliga o le Atua. Le nu'u na osi feagaiga ma le Atua (Feagaiga Tuai). Lea na fa'aigoaina e le Atua, 'o lona nu'u', 'o ona tagata'. Le nu'u na fa'asa'oloto mai e le Atua a'o nofo pologa ai i Aikupito. Le nu'u na matamata ma iloatino vāvega na faia e le Atua, a'o ta'asē ai i le vao i le fia tausaga, se'ia o'o lava ina latou nofoia Kanana le nu'u folafolaina.

Ae peita'i, o se nu'u soli feagaiga, o se nu'u soli tulāfono, e lē usita'i ma lē fa'alogo i le Atua. Ua fai pa'aga ma ifo i tupua o nu'u ese. O lea na tupu ai le to'asa o le Atua, ma o'o ai lava ina fa'asala.

Fa'asalaga 1- Pulea e le mālō o Asuria, ma aumai tagata o nu'u ese e nofoia le nu'u sa folafolaina e le Atua mo i latou.

Fa'asalaga 2- Pulea Sā Iūtā e le mālō o Papelonia, ma ave fa'atagataotauaina i latou i Papelonia. Lea na fa'atāfunaina ai le a'ai o Ierusalem ma soloia pa o le malumalu.

Ae peita'i, na maua lava le avanoa lona lua mo Isara'elu. Lea i ai le valo'aga a le perofeta a Ieremia (Feagaiga Fou). Ua toe tu'uavanoa mai ai le Atua i ona tagata, ina ia maua pea le mafutaga mafanafana ma Ia. O le fa'aalia lava lea o lona Alofa Tunoa.

FA'ATINOGA O LE MATĀ'UPU:

Vaevae le autalavou i vāega e 2.

Vāega 1- Fa'amatala le Feagaiga Tuai po o le Feagaiga lea na osia e le Atua ma augātamā o Isara'elu.

Vāega 2- Fa'amatala le Feagaiga Fou po o le Feagaiga lea o lo o tā'ua i le Ieremia 31.

A ma'ea, ona aotele lea o manatu e lau susuga i le Ta'ita'i ina ia manino ma malamalama le autalavou i 'ese'esega o Feagaiga nei.

AOTELEGA: 'Ese'esega o Feagaiga

- Feagaiga muamua- o le feagaiga na fai lava fa'apitoa mo na'o Isara'elu.
- Feagaiga lona lua- valo'ia e Ieremia, o le feagaiga mo tagata uma ma le lalolagi atoa.
- Feagaiga muamua- o le feagaiga e tau e le oti.
- Feagaiga lona lua- fai mai Ieremia, fetalai le Atua, "ou te fa'amagalo i a latou amio leaga, ma 'ou lē toe manatua a latou agasala." O lona uiga, o le feagaiga o le togiola ma le Alofa Tunoa.
- Feagaiga muamua- o le feagaiga na tusia i papa ma'a, e pei o tūlāfono e lima ta'ita'iina ai le ola lelei o tagata.
- Feagaiga lona lua- fai mai Ieremia, ia tusia i papa o loto o tagata, ia tupu ai le fa'atuatua ma le talitonu i le Atua.
- Feagaiga muamua- o upu mai le Atua.
- Feagaiga lona lua- ua liutino tagata mai le Atua, militino fa'atasi ma tagata.

Ia tatou lagona pea le loto fa'afetai i lo tatou Atua, ona o lea ua tatou mautinoa, o lo o tu'uavanoa mai pea e ui i lo tatou ola agasala. O le fa'aalia lava lea o lona alofa e televave, ae telegese

lona to'asa. Ae ia tatou mautinoa lelei fo'i, e lē tu'uaunoaina e le Atua le agasala e alu loa e aunoa ma se fa'asalaga.

Fa'amanatu: 'Aua tatou te ola fa'atalalē i avanoa ua tu'uina mai, ae ia tatou fa'aaoga ma le tatau.

.....

ASO SA: 24 NOVEMA 2024

MATĀ'UPU: MALOSI O LE MANUFE'AI

TUSI FAITAU: Fa'aaliga 13: 1 – 18

FESOASOANI MO LE TA'ITA'I:

E lua (2) ituaiga manufe'ai o lo o tā'ua i le tatou tusi faitau o lenei Aso Sa.

1. O le manu muamua (fuai'upu 1-8). Ua fa'atusa i ai Roma ma ana pulega sauā ua taotaomia ai le ola o tagata o le Atua. O lo o fa'amatalaina e pei o se nameri, o ona vae e pei o vae o le urosa, a'o lona gutu e pei o le leona. O manu malolosi ia ma le saosaoa o le lalolagi, ua fa'amatalaina ai faiga fa'a-lē-alofa ma le pule so'ona fai a Roma. Ua ifo ai tagata. Fa'atusa i ai le ifo o tagata i Emeperoa o le mālō. Auā o le tūlāfono, *e fa'asaoina le tagata e tautō e tapua'i i le Emeperoa, ae fasiotia le tagata e tumau pea ia Iesu ma avea ma ona Atua.*

2. O le manufe'ai lona lua (fuai'upu 11-18). O lo o fa'amatalaina e i ai ona nifo e lua e pei o le mamoe, ae tautala mai pei o le tarako. A'o lana pule fo'i e fa'apei o le manufe'ai muamua. Ua fa'atusaina ai tala'iga pepelo o lo o taumafai e fa'asesē tagata kerisiano mai le talia o Iesu Keriso. Ae lē gata fo'i i lea, ua ia fa'amaufa'ailogaina tagata, 666 i le lima taumatau, po o le muāulu. O le fa'amoemoe, ia iloa lelei le 'ese'esega o tagata

kerisiano ma tagata ua talia a latou tala'iga sese. E ola fa'afoliga, e fa'amata e filemu ana 'upu, ae oti ai le tagata.

FA'ATINOGA O LE MATĀ'UPU:

Vaevae le autalavou i ni vāega se 2.

O fa'aaliga na iloa e Ioane i Patamo, o lo o afifi mai ai se fe'au fa'amalosi mo kerisiano o lo o sauāina i le ulua'i seneturi. E mafai fo'i ona tāafofa'i i se mafaufauga fa'a-matā'upu silisili fa'apea: MOLIMAU TŪMAU. Ia tūmau pea lau molimau mo le Keriso Toe Tu, tusa lava po o a faigata e feagai ai.

Vāega 1- Fa'amatala le manufe'ai muamua (*fuai'upu 1-8*), ma taumafai e fa'auiga.

Vāega 2- Fa'amatala le manufe'ai lona lua (*fuai'upu 11-18*), ma taumafai e fa'auiga, ina ia faigofie ona malamalama, ma maua ai se fe'au fa'a-le-agaga mo tupulaga talavou.

AOTELEGA:

O le fe'au lea fia momoli mo lenei Aso Sa, 'aua ne'i se'etia gofie i pulega ma faiga fa'a-Roma ma tala'iga taufa'asesē. E foliga e lelei i le taimi nei, ae oti ai le fa'amoemoe o le tagata. Tele mailei a le fili e taumafai e fa'aleaga lo tatou ola taumafai mo le Atua. A'o le talavou e tūmau ma pipii i le Atua e ala i le fiafia e faitau le tusi pa'ia, fiafia e tatalo, auai ma fa'alologologo i aoga Autalavou, e lē solomuli ma maluelue lona fa'atuatua.

Fa'amanatu: Ia tatou mata'alia pea ma matala.

.....

ASO SA: 01 TESEMA 2024

MATĀ'UPU: TAUSIGA ALOFA A LE ATUA

TUSI FAITAU: Mataio 6: 25 – 34

FESOASOANI MO LE TA'ITA'I:

O le tausiga alofa a le Atua i lo tatou, o se tausiga e lē mavae, e lē uma ma e lē liliu fo'i. O se tausiga e tumau e o'o lava i le fa'avavau. O fa'ailoga va'aia ia o lona alofa tunoa mo i tatou, o ia fo'i o le Atua auai mai fa'atasi ma le tagata. Lea fo'i ua tatou aulia fiafia mai le masina mulimuli o le tatou savaliga i lenei tausiga, ona o lana tausiga alofa i lo tatou ola.

A'o le fa'afitauli ua pei o se fa'ama'i i le olaga o aso uma, ua tupu le popole ma le atuatuva'e i mea e tausii ai le ola. E ese'ese uma lava mafua'aga e tutupu ai lagona nei, ae i ai le manatu, e mafua ona tutupu lagona o le popole ma le atuatuva'e, **ona ua lē fa'alagolago ma fa'amoemoe i le Atua.** Afai o le Atua na Ia auamaia le ola, o le mea mautinoa fo'i, e mafai ona ia aumaia mea uma tatou te manana'o ai.

O le tusi faitau o le tatou matā'upu i lenei Aso Sa, e lua (2) lava ni ata fa'atusa o lo o fa'amatala ai e Iesu le tausiga alofa a le Atua.

1. O le olaga o manu felelei. Fetalai le Ali'i, e lē fa'atauina e manu felelei ni o latou fanua, ma totō ai ni fatu la'au latou te selesele ma a'ai ai i o latou fuga. Leai! E o'o lava i manu felelei e tausii e le Atua ma fafaga ia te i latou i lona tamaoaiga.

2. O lautalotalo o le vao. E lē 'i totōina, ae e tupu fua e aunoa ma se galuega a le tagata e fai i ai. Peita'i, e uiga ese le matagofie ma le manaia o ona fua. E o'o lava i le tupu o Solomona na lauiloa i le matagofie o ona la'ei i Feagaiga Tuai, fai mai e sili atu ai le mananaia o fua felanulanua'i o lautalotalo o le vao. E māfua nei mea uma, o le Atua. E mai le Atua lona matagofie.

O lona uiga, afai e sili atu le tulaga o le tagata na faia i le fa'atusa o le Atua nai lo manu felelei ma lautalotalo o le vao, e lē mafai la ona la'a loa lana tausiga alofa i le tagata na ia faia.

GALUEGA FAATINO:

Vaevae le Autalavou i vāega se 3. Māfaufau i nisi ata fa'atusa se 2 mai mea o le foafoaga po'o lo tatou si'osi'omaga, pei o ata fa'atusa o lo o tā'ua i le Tusi Faitau e fa'amatalaina ai le Tausiga Alofa a le Atua i lo tatou ola.

A ma'ea, tu'u le avanoa i sui ta'itasi o vāega nei e 2, e fa'amatala o latou manatu.

AOTELEGA:

Tupulaga, po o a lava a tatou sa'iliga i mea tatou te manuia ai, 'aua tatou te popole, 'aua le atuatuva'e, e foa'iina mai lava e le Atua e tusa ma lona finagalo. Auā o lana tausiga alofa e fa'auau pea ia i tatou. E le'i tu'uina mai e le Atua se tamaoaiga, tatou te popole ma atuatuva'e ai, a'o mea e tatau mo le ola.

Fa'amanatu: Ia fa'atuatua ma fa'amoemoe i le tausiga alofa a le Atua, na te saunia mea uma tatou te mo'omia mo le ola.

.....

ASO SA: 08 TESEMA 2024

MATĀ'UPU: FESO'OTA'IGA O LE MESIA MA LE EKALEZIA

**TUSI FAITAU: Isaia 11: 1 – 2; 10 – 12
Isaia 42: 1**

FESOASOANI MO LE TA'ITA'I:

O 'upu ia a le valo'aga a le perofeta o Isaia, o lo o manino mai ai, o le fa'amoemoe o le Mesia o le a afio mai, e mai le aiga o Iese, e lē gata na te fa'aola tagata uma, ae na te fa'apotopotoina fo'i i latou e ma nu'u e tasi, pe fai ma fa'apotopotoga e tasi. A'o le Mesia lea, fai mai Isaia, e i ona luga le Agaga o le Ali'i.

Le Mesia lea o lo o fa'amatalaina e fai-Evagelia i le Feagaiga Fou e pei o Mataio. O le Mesia ua afio mai, o Iesu Keriso lea. Na te fa'apotopotoina Isara'elu ma nu'u ese, e avea ma fa'apotopotoga o tagata fa'atuatua. Le fa'apotopotoga lea, o lo o tā'ua e fai-Evagelia o le 'Ekalesia'. Fa'aliliuina mai le upu Eleni e fa'auigaina, *'o le fa'apotopotoga o tagata ua vala'auina e galulue fa'atasi mo se galuega fa'apitoa.'*

FA'ATINOGA O LE MATĀ'UPU:

Vaevae le Autalavou i ni vaega se 2.

Vaega 1: Fa'amatala le uiga o le upu 'Mesia'. Aumai ni mau ai le Feagaiga Tuai, pei o valo'aga a perofeta, po le Feagaiga Fou fo'i.

Vaega 2. Fa'amatala le uiga o le upu Ekalesia. Aumai ni mau mai le Tusi Paia e lagolagoina ai lo outou manatu.

A ma'ea ona tu'ufa'atasi lea e lau susuga i le Ta'ita'i se manatu fa'atupu manatu o lo o tā'ua i lalo ia atagia ai le feso'otaiga o le Mesia ma le Ekalesia.

AOTELEGA:

O se fe'au tāua fo'i lea mo tatou o tupulaga talavou i lenei vaitau o aso fiafia. Po'o a lava fiafiaga o le lēnei vaitau, 'aua lava nei galo, o i tatou o se vāega o le fa'apotopotoga o tagata ua vala'auina e le Mesia e galulue mo lana galuega. O le fiafiaga sili fo'i mo i tatou, o lo o i luga iā te i tatou le Agaga Pa'ia o le Ali'i. O le tele lava o tupulaga o le latou vaivaiga lava o le pia ma le mariuana, o le mimita ma le malōvale, o le fia toa ma le fa'amisa, e lē o ni uiga na o ni tupulaga ua vala'auina e le Atua mo lana fe'au. E nā o le felotoa'i ma femisaa'i e mau ai.

Fa'amanatu: Galulue fa'atasi, e tala'i le Mesia ua afio mai.

Manuia tele le Kerisimasi ma le Tausaga Fou.